



WANTOK

Great Quality

Affordable Price



Niuspepa bilong yumi ol PNG stret!

Wan Wik,

Jenuari 27 - Februari 2, 2005

NAMBA 1592

K1 tasol

**Ol nius bilong skul fi-P2
Tavurvur i paia gen - P3**

**Sunami ripot - P13
Stail bilong Morata lig - P30**

Pamuk pasin i bikpela long PNG

...Isi long AIDS i kilim PNG

Yakam Kelo i raitim

PAMUK pasin long Papua Niugini i bikpela tru na dispela pasin inap mekim namba bilong sik AIDS i bikpela tru long 10-pela yia bihian. Tude long Papua Niugini rekot bilong ol manmeri i gat sik AIDS i sanap olsem 10,184 we 855 em ol pikinini aninit long 18 krimas.

Dokta Susan Hunter husat i wok wantaim UNICEF i kamapim wanpela ripot bilong wok painimaut bilong em olsem pasin bilong ol pipel long slip nabaut wantaim man na meri i bikpela moa hia long PNG. Dokta Hunter i kamapim dispela ripot bihain long ol i lukluk insait long sindaun na laip bilong ol liklik pikinini na ol meri we planti bilong ol dispela pikinin i nogat papamama na arapela i lukautim ol.

Dokta Hunter i gat ripot bilong wok painimaut bilong we em bai mekim kila long Fonde tude.

Em i tok rekot bilong PNG tude long mak bilong sik AIDS i ron long en i bikpela samting bikos namba i wok long go antap hariap tru winim arapela kantri we ol i gat ol rot na wei bilong daunim namba bilong sik

AIDS long i noken kamap planti.

Ol opisa bilong UNICEF i bin toktok wantaim ol manmeri long Is Sepik, Morobe, Isten Hailans, Westen Hailans, Simbu na Pot Mosbi long kisim tingting bilong ol long laip na sindaun bilong ol tude. Ol i toktok tu wantaim sampela manmeri husat i gat sik AIDS. Na ol dispela toktok bilong ol manmeri i kamapim dispela ripot.

Dokta Huter i tokaut olsem rekot bilong PNG bai bikpela moa long ol kantri long Esia bikos nau yet mak bilong PNG i antap moa long pasin bilong pamuk pasin bikos:

- Nau yet planti manmeri i gat sik nogut olsem gonoria, sipilis na ol kain sik bilong pamuk pasin.
- Planti pipel bilong PNG i gat moa poroman o pren bilong ol long sait sait.
- Planti meri i wok long kisim mani long salim bodi bilong ol.
- Planti manmeri i no save laik yusim kondom.
- Ol program bilong stopim kain hevi olsem i no bikpela tumas.

I go moa long pes 2.



Bihain taim bilong PNG?...Wanpela mama na tupela pikinini bilong em. Em i wanpela bilong tupela siklain long kantri long yusim ARV tritmen. Namba wan program bilong fri tritmen wantaim antiretroviral (ARV) drag bilong ol lain i stap wantaim HIV AIDS long Ethiopia i bin kirap long Kahsay Abera Haus Sik long Humera long 2004. Medecins Sans Frontieres (MSF) i bin kirapim dispela. Sapos PNG i no was gut, hevi bilong HIV AIDS long hia, bai i kamap bikpela tru olsem ol kantri olsem Ethiopia. *Pota: PANOS/PEP BONET*

**Nau igat liklik
80 gm
paket**



Papamama kisim strongpela askim long peim skul fi

Veronica Hatutasi i raitim

OL PAMAMAMA i kisim strongpela askim long luksave long wok bilong ol na peim skul fi bilong ol pikinini.

2005 skul yia bai stat long neks wik Mande Jenuari 31 na long dispela wik, ol tisa i go long ol wan wan skul bilong ol long mekim ol wok redi long skul bai ol neks wik.

Edukesen em i rait bilong ol pikinini tasol em i no wanpela fri samting. Papamama i mas peim fi long putim pikinini i go long skul.

Gavman i save givim helpim long skul bilong ol sumatin wantaim edukesen sab-sidi mani em save katim olgeta yia na peim long wan wan kwata olgeta yia. Na narapela wok em bilong papamama long peim hapmak bilong skul fi.

Toktok we Edukesen Dipatmen i bin salim i go aut long Disemba las yia i go long olgeta skul em long stat bilong 2005 skul yia, ol sumatin i mas go wantaim skul fi peimen beng risit i soim olsem ol i wokim ful peimen long skul fi. Skul i no inap long kisim pikinini i go insait husat i no peim ful skul fi.

Insait long wanpela skul yia, planti skul i save givim sans na taim long ol papamama long peim skul fi long liklik hap inap

ol i pinisim na tu, sapos ol i no inap stret, wokim sampela sevis wok o givim kaikai na ol arapela samting long helpim skul. Dispela em wanpela rot we ol i ken peim skul fi.

Mak bilong ol skul fi long dispela yia long Nesenei Kapitel Distrik we Dsitrik Edukesen Bod Sekula namba 01/2001 na em bin givim aut long Disemba 2,2004 i go olsem. Mak bilong skul fi bilong ol Elementeri em K90 na K2 moa ejensi fi long ol sios ejensi skul,

Grets 3 inap long 6 em K140 na K4 ejensi fi, Grets 7-8 em K240 na K4 ejensi fi. Ol Hai skul, Sekonderi, Nesenei na Vokesenei skul i gat ol wan wan skul fi mak bilong ol tu na ol i antap moa long ol praimer skul.

Wantok i bin ring na toktok wantaim sampela skul insait long Nesenei Kapitel Distrik na kisim tingting bilong ol long dispela samting.

"Moabeta long ol papamama i peim ful skul fi. Tasol bikpela samting long skul bilong mipela em long olgeta sumatin i mas kam skul long Mande taim 2005 skul yia i stat. Na wok bilong peim skul fi em i wok bilong ol papamama na gadien. Mipela i sanap strong long ol papamama i mas wokim ful peimen. Ol i mas luksave long wok bilong ol bikos gavman tu i

wokim hap bilong em long peim skul sab-sidi.

"Tasol mipela bai ino inap rausim ol pikinini sapos i gat hevi long skul fi, nogat. Bai mipela i singautim ol papamama na toktok wantaim ol long sampela samting ol i ken wokim long peim skul fi. Olsem long las yia, mipela i bin givim sampela rot ol papamama i ken mekim na helpim long peim skul fi. Wanpela em long wokim sevis long skul na dispela em kariamut wok mentenens na ol arapela rot moa skul i gat nit long em. Narapela em long givim ol sampela samting skul i laikim long wok bilong em na tu, kaikai samting," wanpela sinia opisa bilong bikpela skul long Nesenei Kapitel Distrik em Ward Strip Demonstresen Skul i tok.

Opisa it ok skul i gat sampela skul fi dinau ol papamama i no peim yet. Na e mi askim ol dispela papamama long stretim dispela dinau we bai bung wantaim bilong dispela yia gen.

Em i tok ol gret 8 sumatin i bin gat K34,000 skul fi dinau tasol ol i peim olgeta nau bikos taim ol i laik kisim setifiket bilong ol, ol i mas pinisim olgeta skul fi.

Wards Strip Praimeri e mi bikpela skul long NCD na e mi gat moa long 2,000 sumatin long Elementeri i go inap long Gret 8 level. Em i gat 56 tisa.

Pot Mosbi: Bikpela ranawe i bin kamap long Bomana Haus Kalabus ausait long Pot Mosbi las wik we i lukim 65 kalabus man i ranawe taim bikpela ren i pundaun. Long dispela 65 kalabus man, tupela i dring wara na dai o draun long bikpela Laloki wara taim ol i traim long kalapim i go apsait. Narapela 8-pela em ol polis, woda o pablik i holim pasim ol taim ol i kam bek insait long siti. Ol polis i wok long painim yet ol arapela.

TRAIN FOR SUCCESS IN 2005!

Professional accredited
British Career Training

YOUR professional accredited Certificate or Diploma or Degree.

Cambridge International is the key to a successful career. Invest in accredited qualifications and skills for a great future.

International Diplomas (£130 or US\$260)

- * Accounting, Hotels, Tourism, Computers
- * Business, Management, Stores, English
- * Personnel, Marketing, Advertising, Insurance
- * Economics, Secretary, Purchasing, Stores

Advanced & Honours Diplomas and MBAs

- * Business, Marketing, Finance, Personnel

For your FREE information book contact:
CAMBRIDGE INTERNATIONAL COLLEGE
P O Box 53, Southampton,
SO14 0YP, England, Britain.
Fax: + 44 2380 337200
Web: www.cambridgecollege.co.uk
Email: info@cambridgecollege.co.uk

Accredited British Training & Education registered with the National Training Council & Ministry of Labour of Papua New Guinea

Helpim Esia

SAPOS yu laik givim liklik mani long halivim ol turangu i kisim bagarap, yu ken putim mani bilong yu i go long ol dispela ples:

PNG RED CROSS SOCIETY
Akaun Nem: PNG Red Cross Society Asia Tsunami
Benk/Akaun #/Brens: 6000 947 066, WESTPAC Waigani
1001 035 135, BSP, Port Moresby
Telepon namba: 325 8577 / 325 0617
Kontak Manmeri: Jacqueline Boga (Secretary General PNGRCS), Vini Talai o Hilda Wayne

CARITAS PNG
Akaun Nem: Southeast Asia Tsunami Appeal
Benk/Akaun #/Brens: 717856801, WESTPAC, Waigani
Telepon namba: 325 6255 / 325 6485
Fax namba: 325 9626
Kontak Manmeri: Raymond Ton (Deputy National Director, CPNG)

Pasin pamuk pulap long PNG Nogat wok

I kam long pes 1.

Long ol asples nau em sik AIDS i go bikpela pinis bikos pasin bilong i go i kam long taun na arapela provins i opim rot long sik nogut ya i go insait long ol asples. Narapela as tu sik AIDS bai kamap bikpela long ol asples em ol kampani na bisnis i kamap long ples olsem maining, timba kampani na arapela bisnis projek we i save kisim ol wokman i kam long arapela hap provins na taun we ol inap karim sik nogut ya i kam givim ol meri bilong ples. Bikos ol meri bilong ples bai seksek long ol wokman bilong ol dispela kampani long prenim ol na ol bai inap kisim sik AIDS na go bek givim long ples.

Dokta Huter i tok pasin bilong ol man na meri long laik pren o pamuk i wankain tasol. Planti meri i gat planti poroman bikos ol i laik slip wantaim ol long kism mani. Planti man tu i laik amamas tasol na planti yangpela meri nau i mekim pamuk pasin olsem wok, ripot bilong Dokta Hunter i tok.

Dokta Huter i tok tu olsem Papua Niugini i gat bikpela nem long pasin bilong pait na bagarapim o reipim ol meri.

Insait long rekot bilong ol arapela kantri long Pasifik na wol tu, PNG i gat dispela bikpela nem nogut. Long sampela ples taim man i paitim meri em yumi tok em

skul pasin. Long PNG i gat planti pait pasin i save kamap long long ples na taun taun na ol pikinini i save lukim ol dispela pasin na kisim save long en we ol tu inap surukim pasin pait yet taim ol i bikpela. Pasin bilong holim na bagarapim ol meri o reip em bikpela tru long PNG.

Em i tok ol dispela pasin i kamap bikos wok panimaut bilong ol tu i soim olsem ol lida long ples na komyuniti nau i no gat strong moa olsem bipo.

Ol manmeri tude i bikhet moa na sakim lo na oda o kastom bilong ples na komyuniti. Narapela tu em em atoriti bilong gavman long daunim hevi bilong lo na oda na ol pasin nogut o trabel nabaut tu i no wok gut moa.

Olsem na wantaim ol kainkain hevi na trabel ol pipel i save mekim tude bai mekim isi tru long sik AIDS bai karamapim olgeta na bagarapim planti tausen manmeri tru, Dokta Hunter i tok.

Bikpela samting mipela i mas mekim nau em;

kirapim Nesenei Rispons bilong ol dispela hevi long tokaut na traim stretim ol hevi bilong pait, pasin pamuk nabaut, sik AIDS.

Na kamapim ol gutpela edukesen plen na gutpela lo bilong stretim ol kain hevi olsem.


Maisan Pahun i raitim

EDUKESAN Minista Michael Laimo i tokaut long taim bilong statim skul yia bilong 2005 olsem edukesen i namba wan samting long plen bilong Gavman long longpela taim i kam bihain long kirapim ikonomi na groa bilong Papua Niugini.

Mista Michael Laimo i bin tok dispela bikos long 2004 Nesenei Gavman i bin sevim K100 milien na bin peim ol tisa K650 bones long skul yia i pinis na tu i apim pei bilong ol tisa long 4 pesen (%) long las yia.

Mista Laimo i tok tu olsem 360 elementari skul bai kirap long dispela yia na 150 nupela praimer skul gret 7 bai kamap.

Ol training kolis, tisa kolis na bisnis kolis tu bai kisim planti sumatin long dispela yia we olgeta wantaim bai lukim namba i go 38,500. Dispela namba i kaunim ol inseyvis sumatin long tisa kolis, elementari na vokesenei kolis. Dipatmen bilong Edukesen tu i kamapim planti sans long ol levul bilong edukesen. Klostu long 65,000 sumatin bai sindaun long gret eksem, 30,000 sumatin long gret 10 eksem na 10,000 long gret 12 eksem. Dispela namba i bikpela tumas na tingim hamas bai i go long bikpela skul bihain. Bikpela askim na komplek i raun i olsem ol nesenei hai, sekendari na yuni-vesti graduet i skul na kisim save long wokim wok tasol husat bai givim ol wok.



Tavurvur i paia gen

Sua Kilis i raitim

OLMANMERI long Rabaul taun long Is Nu Briten provins nau i wok long pilim gen das i kamaut long Maunten Tavurvur.

Tavurvur i bin stat pairap bek long 6 kilok long Mande apinun wantaim wanpela bikpela pairap na liklik guria. Taim maunten i pairap, das i sut i go antap long skai.

Dispela em i namba wan taim gen long maunten i pairap bihain long das i bin pinis long 11 mun i go pinis.

Taim das i bin pinis na maunten i bin stap isi, wok bisnis i bin kirap bek long Rabaul na ol ples klostu olsem Matupit, Malaguna na Rapolo.


Long mun Februari yet Tavurvur i bin pinis long tromoi pipia na das na pablik na pravit sekta long Rabaul taun i bin sanap strong gen.

Ol rot i bin klia long das na bikpela wok mentenens na klinap i bin kamap long ol haus, ol stua na ol arapela bisnis. Tingting bilong kirapim bek Rabaul i bin strong tru.

Tasol nau maunten i stat long paia bek gen, em bai daunim tingting bilong ol manmeri insait long provins husat i wok long wok hat long painim bek gutpela sindaun.

Maski maunten i stat paia bek gen, ol manmeri i stap long taun i gat strongpela tingting long strongim bek Rabaul.

Bihain long maunten i stat pairap long Mande, Ekting Dairekta bilong Rabaul Volkanolojikol Obsevetri (RVO), Ima Itikarai i tok bihain long paia i pinis long Februari 17 las yia, ol i wok long was yet long Maunten Tavurvur long glasim sapos pairap bai stat bek gen.



• Poto i soim Maunten Tavurvur i pairap na tromoi nupela das i kamaut.

Mista Itikarai i tok saismik infomesen i kamap i soim maunten i kirap gen long mun Mei, Jun na Julai 2004. Namba bilong ol liklik guria i bin go bikpela tu.

Em i tok olsem olgeta samting ol i painimaut i bin go aut long pablik long wanpela kibung long Rabaul long Septemba las yia, tasol nogat planti manmeri i bin kamap.

Mista Itikarai i tok ol i bin save olsem maunten bai kirap gen taim ol guria i wok long go bikpela aninit long Tavurvur long mun Novemba las yia.

Tasol em i hat tru long traime makim taim we maunten bai pairap gen.

Em i tok klia tu olsem RVO i gat ol masin i sanap long ol kainkain hap long Rabaul, Ula-mona na Hoskins long Wes Nu Briten, Lamington long Oro na Manam long Madang provins bilong mas long ol maunten paia.

Itikarai i tok ol dispeka masin i ken save sapos maunten bai pairap na em i askim ol manmeri long ol dispela ples bilong lukautim ol dispela masin na noken bagarapim ol nabaut.



Tru o nogat? I gat tokwin olsem sampela papamama i wok long givim mani long ol skul na tisa long putim pikinini bilong i go insait long skul bilong ol. Maski pikinini i no kisim gutpela mak long tes bilong em long las yia na i no kisim spes long gret 9 o gret 11, tasol papamama i gat we bilong ol long soim mani tasol na tisa i kisim nem bilong pikinini na putim long skul. Sapos dispela kain pasin i kamap tru long Mosbi, orait plis tokaut long bos bilong Edukesen long dispela kain pasin nogut ya.

Toktok long skul na tripela pikinini i nogat spes long Nesenel Hai Skul long dispela yia. Tasol taim yu lukim gret 10 setifiket bilong ol, oloman save kilim ol stret ya. Maks bilong ol em Credit na Distinction ya (C na D). Olsem wane mol seleksen komiti jeles long ol manki ya o ol i no lukim pepa bilong ol. Nau ol papamama bilong ol i hatwok tru long go kam long Edukesen opis long stretim nem bilong ol na ol bosman bilong Edukesen opis i paul nogut tru ya.

Sori ol lain bilong Mosbi, tude bai yu harim nius bilong nupela pmv bas fea bilong Mosbi. Nau bai ICC i tokaut long nupela bas fea bilong Mosbi na yumi mas redi long dispela nau. Ol bas i bin laikim 80 toea olsem na yumi wet na harim bai 80 toea o K1.00.

I gat tokwin olsem wanpela disko ples long Mosbi em ol yangpela meri i save danis long fran na olgeta manmeri bai lukim em. I no longtaim bai em i rausim siot na wokabaut susu nating long fran na ol manmeri bai singaut na amamas long lukim em i mekim stail danis bilong em long fran. Ol mama, plis sekim sampela papa bilong yupela nogut ol i no go hariap long haus long olgeta Tunde nait. Nogut ol i go lukim ol yangpela meri i danis skin nating long dispela klap haus. I gat tokwin olsem tupela papa i bin go lukim pinis.

Taim bilong ren nau long Mosbi na planti manmeri bilong setalmen i singaut na kalap wantaim na amamas bikos em taim bilong planim kaikai long gaden nau. Nau Mosbi i senis kamap grin long olgeta hap. Ol diwai na gras i kamap grin olsem na yumi save olsem kumu tu bai pulap long maket. Plis pasim long bikpela bandoi. I noken pasim liklik bun han olsem pastaim. Amamas long ren na amamas long salim planti kumu.

Tok stia i go long ol sumatin husat i go skul nau. Lukautim yupela yet na skul gut, noken larim ol gris bilong graun bagarap tingting, pasin na bihain taim bilong yu. I gat taim bilong olgeta samting, na nau mamapapa o husat i baim skul fi bilong yu, yu amamasim na soim tok tenkyu bilong yu long ol long bilip olsem yu ken i kamap wanpela bikpela man i gat planti save.

Hariap na NRL sisen i stat gen. Planti i no inap wet long lukim ol tim bilong ol i pilai na soim stail na kala na mekimsave long ol narapela tim. Bai i gat planti nupela pes long ol sampela tim, na em bai gutpela long lukim ol yangpela pilaia i kisim ples bilong ol olupela, tasol sori tu long sampela ol olupela pilala husat i save mekim yumi amamas long lukim ol.

Bisnisman i no wanbel long graun long Simbu

Arthur-Louis Kengoa i raitim

WANPELA liklik bisnisman long Simbu provins i tokaut olsem em i no wanbel long Nesenel Lens Bod i bin givim wanpela hap graun long Kundiawa taun i go long wanpela kampani i no stap long Kundiawa.

Chris Gena, papa bilong 6 K Limited, i tok olsem disisen bilong Lens Bod long Miting bilong en Namba 8/2004, Namba 51 (9), long graun em Seksen 1 na alotmen 1 i stap insait long Kundiawa taun, Lens Bod i no bihainim stretpela pasin.

Mista Gena i tok olsem Lens Bod i bin givim dispela graun long wanpela kampani nem bilong en em Ninsulu Lodge Limited. Tasol em i tok olsem taim em i mekim wok painimaut long Invesmen Promosen Atorit (IPA), bihain

tasol long Lens Bod i bin mekim dispela disisen, em i lukim olsem disisen bilong Lens Bod i no stret.

"Taim mi mekim wok painimaut long Invesmen Promosen Atorit mi no wanbel taim mi lukim olsem dispela kampani (husat i winim dispela graun - Seksen 1 Alotmen 1 long Kundiawa taun) - Ninsulu Lodge Limited, i bin rejista olsem kampani long 26 Mas 2003 tasol na tu em i famili kampani bilong wanpela Nesenel Minista bilong palamen, Mista Gena i tok

Mista Gena i givim nem bilong ol dairekta bilong Ninsulu Lodge Ltd long *Wantok Niuspepa* na i tok ol dispela dairekta em ol famili memba bilong dispela Minista. Dispela Minista tu em wanpela dairekta bilong Ninsulu Lodge Ltd.

Olsem na Mista Gena i tok olsem long tingting na lukluk bi-

long em, dispela i no bihainim stretpela pasin i bihainim Lo bilong ol kain lain olsem Len Bod.

Na tu Mista Gena i tok olsem long wanpela Minista i kisim mekim olsem i no stret long Lidasip Kod bikos em mas tok klia long posisen bilong em olsem Nesenel Minista na wanem kain interes bilong em long dispela kain famili kampani.

"Askim bilong mi em olsem: Olsem wanem na wanpela kampani em wanpela Gavman Minista i papa long en i kisim dispela kain luksave long Len Bod disisen na mipela ol narapela lain husat i aplai tu olsem 6K Limited i no kisim?"

Mista Gena i putim pinis 6-pela astingting bilong wanem em i ting olsem dispela disisen bilong Len Bod i no stret. Em i tok em i givim pinis dispela ol tingting bilong em long apil i go pinis long Ombuds-



• Mista Gena.

men Komisen, Pablik Prosekyuta na Trensperensi Intanesenel.

Mista Gena i tok tu olsem i gat ol 8 ol narapela lain husat i bin aplai long dispela graun na ol tu i no wanbel long dispela disisen. Olsem na em i tok ol dispela lain bai i ken kamap olsem ol witness bilong em long dispela apil bilong em.

Wantok Niuspepa i traime long toktok wantaim dispela Minista long aste tasol em i no stap long opis.

DESK & POCKET CALCULATORS

From **K13²⁰** ea

EXERCISE BOOKS (Biggest Range in Town)

From **66^t** ea

SCHOOL BAGS (Assorted Colours & Styles)

From **K22⁰⁰** ea

BACK TO SCHOOL

THEODIST LTD PORT MORESBY & LAE
 THE STATIONERY SUPERMARKET

(All Prices includes GST)

Hap Hap Nius

Turis manmeri pulap long Rabaul

Klostu samting olsem 1000 turis man na meri i bin kam lukluk raun long Rabaul na sampela hap long Gazelle Peninsula taim wanpela bikpela turis sip i kamap long Rabaul long las wik Sarere. Planti long ol dispela turis em ol Siapan husat i gat sampela intares long Rabaul i go bek long taim bilong Wol Woa 2 inap nau long ol kain wok halivim mani samting. Ol turis hia i lukluk raun long ol tanof we ol siapan i bin dikim long taim bilong woa. Musium long Kokopo we ol masin gan na balus na ol ka ol i bin yusim long woa i stap na ol arapela hap long Gazelle. Dispela si ol i kolim "Peace Boat" i raunim wol klostu samting olsem 100 pela dei na bai go bek long Siapan, bihain long em i stop long Rabaul.

-Sua Kilis

Bogenvil lida no wanbel

James Taraisi, wanpela lida bilong Bogenvil i no wanbel long bikpela hap namba bilong ol manmeri bilong Esia i opim ol stua long Buka. Mista Taraisi i tok olsem taim nau i no stret bilong ol binis i kam long ausait long Bogenvil bilong wanem nau tasol Bogenvil i sanapim mama lo bilong ol na provinsel gavman bai i sanap long bihain long dispela yia.

Kisim tingting long brukim Talasea

Sua Kilis i raitim

ILEKTOREL Baundris Komisn bai mekim lukluk raun na holim kibung wantaim ol pablik seven, ol lida man na ol pipel long Wes Nu Briten long kisim tingting bilong ol long brukim Talasea i go tupela distrik.

WNB Iektorel Menesa Jacob Voivoi i tok wanpela delegesen bilong komisn bai kisim tingting

long ol wok kaunsel wantaim ol pipel na ol lida man tu long baundri bilong Talasea Open Iektoret.

Mista Voivoi i tok wok painim aut i soim olsem kaundim bilong ol pipel insait long Talasea ilektoret i bikpela tru na abrusim mak.

Ol lida man long provins bipo yet i bin singaut long brukim Talasea i go tupela distrik.

Mista Voivoi i tok delegesen bilong komisn bai

kamap long WNB long mun Februari 11 na bai tok-tok wantaim Gavana Clement Nakmai na provinsel eksekutiv kaunsel, ekting edministreta Kingston Jimbade na ol pablik seven long kisim tingting bilong ol sapos ol i sapatim tingting long brukim Talasea i go tupela distrik.

Komisn i mas kisim gut tingting bilong olgeta lain bipo long brukim bilong Talasea.



Kirapim Das...Klia long ol dispela manki Pororan Ailan long Buka i kirapim das long pilaim musik wantaim kain stail mambu ben na gita. Ol i amamasim bikpela de long peris bilong ol.

Foto: ALOYSIUS LAUKAI

Tripela raskol ol polis i wok long painim tanim bel

Sua Kilis i raitim

TRIPLELA man husat ol polis long Is Nu Briten i wok long painim ol bihain long ol pasin stil, i bin givim ol yet i go long han bilong polis long Kokopo long Trinde long wik i go pinis.

Dispela i bin kamap long Bitapabeke ples ausait tasol long Kokopo taun.

Ekting Provinsel Polis Komanda Inspekta Samuel Niba, husat i bin lukim dispela sarena we i bin kamap long Bitapabeke Yunaitet Sios graun i tok pasin tripela man hia i mekim long givim ol yet i go long polis i soim olsem ol i laik tru long kamap gutpela man insait long komyuniti.

Tripela man hia em Tata Tommy, 18 krismas, Junior Tading, 19 krismas, Junior Tamai, 18 krismas bilong Bitapabeke yet.

Polis i wok long painim ol long roberi, reip, brukim na go insait long haus na planti ol arapela pasin nogut insait long Kokopo taun na ol ples klostu long Kokopo.

Kaunsel bilong Bitapabeke, Alan Tama, trening pasto Ronald Tamai, Pasto Kova ToVue na ol lida man long ples Bitapabeke yet i bin halivim tripela man hia long sarena na givim tu wanpela hommet sot gan i go long Inspekta Niba. Ol manmeri long ples i bin lukim dispela sarena.

Inspekta Niba i tokim tripela man hia olsem laip insait long pasin stil i hat tru bikos i nogat gutpela sindaun, amamas na lo bai bihainim ol yet.

Em i givim tok amams long tripela long pasin tripela i mekim long givim ol yet i go long han bilong polis.

Inspekta Niba i singaut tu long ol pipel bilong

Bitapabeke long bringim narapela 5-pela man husat polis i laikim ol tu. Wantaim em wanpela man husat i bin ronawe long Kerevat Haus Kalabus tupela yia i go pinis.

Inspekta Niba i took polis i kisim ripot olsem i gat wanpela M16 raifel i stap nabaut long hap bilong Bitapabeke. Em i tok polis i ting dispela gan i kam long Bogenvil.

Inspekta Niba i givim bikpela tok tenkyu long ol lida long halivim ol givim tripela man hia i kam long han bilong polis.

Dispela i soim gutpela wok bung namel long komyuniti na polis long strongim wok bilong lo na oda.

Pasto Tama ii tok ol lida long ples bai wok hat yet long kisim ol dispela arapela faipela man long sarena.



Ol papamama wari

Sua Kilis i raitim

OL PAPA mama bilong ol sumatin husat i pinisim gret 10 12 insait long Nu Ailan long 2004 i gat wari na sakim long edukesen sistem bihain long planti sumatin i no winim mak long go long haia edukesen.

Memba bilong Namatanai Byron Chan i bin autim wanpela stetmen we em i autim dispela wari bilong ol papa mama long Nu Ailan.

Em i tok planti papa mama i askim wanem samting nau bai kamap long ol pikinini husat i no inap go het long gret 11 na ol narapela yunivesiti.

Toktok antap long 2004 risal bilong ol sumatin, Mista Chan i tok long 960 Gred 10 sumatin, 120 tasol bai go long gret 11 long Namatanai Sekenderi Hai Skul.

Sampela bai go long Nesenel Hai Skul tasol namba i liklik tumas long tokaut long en, Mista Chan i tok.

Em i tok ol Nu Ailan pipel i gat

bikpela save na long taim bipo, planti ii bin kisim ol gutpela risal na kisim ol gutpela wok. Planti long ol i go bek na wok long provins.

Mista Chan i tok ol papamama i wari olsem nau planti pikinini i no save kisim gutpela mak na ol i gat planti wari na askim long edukesen sistem.

Em i ol papamama i sore long ol pikinini taim ol i painim olsem ol i drop aut long gret 10 na 12.

Em i tok divisen bilong edukesen na ol bikman insait long provins i noken giaman na tok ol samting i orait, tasol ol i mas kirap na painim sampela rot long halivim o givim edukesen long pikinini husat i drop aut long gret 10 na 12.

Mista Chan i tok ol Nu ailan i gat laik long skul na kisim save na gavman i mas luksave long dispela na givim halivim bai ol i ken kisim wankain skul olsem long ol narapela hap long kantri.

Kabwum fama na TDC laikim rot long kisim sevis

James Kila i raitim

WANPELA kopi fama na man i go pas long kopi developmen insait long Kabwum distrik long Morobe provins i mekim bikpela singaut i go long Morobe Provinset Gavman na Gavana Songang Luther Wenge long putim mani long stretim rot i go long distrik bilong em.

Appolos Ziwe i bilong Derim viles na em i go pas olsem siaman bilong wanpela kopi fektori long Kabwum we i ron aninit long nem Timbe Developmen Koporesin (TDC). Dispela fektori em ol rurel fama bilong Kabwum yet i kirapim long helpim ol long kisim liklik mani na helpim sindaun bilong ol insait long komyuniti.

Wok bilong TDC i bin winim lewa bilong ol lain bilong ba'im kopi long Japan, husat i bin raun i go long Kabwum long yia 1999.

Tasol bikpela hevi long rot tasol i mekim na turangu ol fama long hap i bin painim hat tru long promotim gut kopi bilong Kabwum long wol. Dispela bikpela hatwok bilong TDC na Kabwum famas em Morobe Provinset Gavman i no luksave tumas long en.

Appolos Ziwe em wanpela strongpela kopi fama tru bilong Kabwum distrik husat i go pas long mekim planti ol wok long strong bilong em yet long givim sevis i go long ol rurel pipel long ilektoret bilong em.

Wantok Niuspepa i luksave olsem Mista Ziwe em wanpela smatpela smol industri man husat i bin wokim wanpela hom meid liklik kopi masin bilong em yet long stretim kopi.

Em i yusim kopi tu long wokim kain kain marasin na tu putim kopi long kontena. Dispela ol kain kain liklik aidia na informal wok bilong Ziwe i winim tru lewa bilong planti ogenaisesen olsem Smolholder Sapot Sevis Pailot Projek (SSSP) na ol i bin bringim i go aut na em i bin soim ol prodak bilong em planti taim long Morobe Agrikalsa So.

Mista Ziwe i tok Morobe gavana Luther Wenge na Morobe Provinset Gavman i mas noken pilai politik na i mas stretim rot long helpim ol rurel fama



• Mista Ziwe i soim ol kopi wain em i wokim long kopi bilong Kabwum. Foto: JAMES KILA

bilong Kabwum husat i save painim hatpela taim tru long karim kopi bilong ol i go aut long salim.

I no longtaim i go pinis Mista Ziwe i bin stap insait long wanpela miting long Goroka we em i tok strong tru olsem Morobe Provinset Gavman i save pilai politik tasol na i no save luktur stret long

helpim wok bilong kopi developmen long provins. Dispela bung long Goroka em ol lain Japanis Ekstenol Tred Ogenaisesen (JETRO), Kofi Industri Koporesin (CIC) na Invesmen Promosen Atoriti (IPA) i bin kamapim na i lukim planti ol bikman na ol ekspota i bin stap long en.

Lae Distrik Kot sasim tripela man Esia

LAE Distrik Kot long dispela wik i bin givim mekimsave long tripela yangpela man

Esia long peim K6,000 long as bilong stap insait long kantri wantaim nogat tok orait pepa.

Tupela em man Saina na wanpela em bilong Tailan.

Long dispela wik Tunde, Majistret Posain Poloh i bin harim kotkeis bilong Cheng Guang Biao husat i gat 27 krismas na Cheng Ming Qing husat i gat 20 krismas bilong Saina na Kamseang Thawec husat i gat 36 krismas na i bin bin kam long PNG las yia Epril olsem ol i asua long stap long kantri bikos ol i nogat gupela tok orait pepa.

Tripela i bin gat visa tasol long stap long sotpela taim na ol i tambu long wok na ol i mas gat tiket long go bek long ples bilong ol long taim bilong ol i pinis.

Long taim majistret Poloh i givim mekim save long wan wan i peim K2,000 fain, em

bin tok em i luksave long ripot we loya bilong ol na polis loya i bin putim kamap.

Loya bilong ol i bin putim ripot long kot i daunim mekim save bikos tripela man i bin wok gut wantaim ol polis, ol i no birua long komyuniti na dispela em namba wan taim ol i wokim rong.

Loya i bin askim kot long wan wan long tripela man i peim K500 na i no K5,000 fain i brukim maigresen lo i mas peim long wanem, ol klain bilong e mi bin lusim tingting long rinyuwim visa bilong ol.

Tasol majistret Poloh i tok dispela i no gupela as na Kkriminel lo i tok klia olsem lusim tingting o i no bisi long lo em i no ekskius.

Majistret Poloh bin tokim tripela man olsem i nogat evidens olsem ol bin traim long rinyuwim visa bilong ol na ol i no bin bihainim lo na ol i amamas i stap long dispela kantri olsem ol sitisen o manmeri stret bilong Papua Niugini.

Ol yangpela long Manam Ailan i kros long saplai

OL MANMERI bilong Manam ailan long Madang provins i belhat na paitim ol wokman bilong givim aut ol kaikai na ol saplai long ol long dispela wik.

Long Mangem kea senta ol yangpela manki bilong ples i no amamas long pasin ol i ting ol opisa husat i go pas long skelim ol kaikai na saplai i mekim long ol.

Kodineta bilong Madang Disasta na Emejensi Peter Lavida i tokaut olsem olsem ol pipel i ting olsem ol opisel i no skelim stret ol saplai na i wok long salim ol dispela saplai bilong ol gen long ol pipel.

Ol pipel i ting ol dispela saplai em ol helpim we gavman na olgeta pipel long Papua Niugini na ol kinkain grup na bisnis insait long kantri i bungim bilong givim i long helpim ol. Tasol nau ol i sutim tok olsem sampela opisel i wok long salim ol dispela kago na saplai bilong ol na kamapim dispela pait.

Mista Lavida i tok tripela opisa i kisim bagarap long dispela pait we ol yangpela bilong Manam i kamapim long ol.

Dispela hevi em Mista Lavida i tok bai ol i luktur insait na skelim sapos i tru o i no tru.



• Birua long Manam i mekim ol manmeri sindaun olsem.

Ol ami i tokaut tu olsem wok bilong stretim ol rot na ol samting bilong ol kaikai na saplai i ron bihainim i go long ol pipel i no stap klia tumas. Na dispela i mekim wok bilong skelim ol samting i no ron gut.

Pablik Rilesens opisa bilong PNG Difens Fos Lutenen Thomas Kilala i tokaut olsem ol ami i painimaut olsem ol lain i no skelim gut ol kaikai na ol sapalai olsem na sampela kea senta i no kisim inap saplai na sampela i kisim moa long arapela.

Mista Kilala i tok sampela senta i kisim saplai bilong ol long olgeta fotnait na sampela long

olgeta mun.

Mista Kilala i tok i luk olsem ol opisa i nogat rekot long amas manmeri stret long wanwan kea senta na ripot bilong sindaun bilong ol olsem na kain hevi bilong skelim ol kaikai na ol samting i no ron gut.

Em i tok provinsal disasta opisa long Madang i gat olgeta saplai na ol samting i stap pinis tasol bikpela hevi em long ol saveman bilong mekim dispela kain wok bilong skelim ol samting long kain hevi olsem i nogat. Olsem na ol opisa bilong PNG Difens Fos bai wok klostu long karimaut dispela wok.

Hap Hap Nius

Madang sumatin winim skolasip

Tripela sumatin bilong St Michael's Praimeri skul long Madang Provins i kisim skolasip i kam long RD Tuna Cannery long go wokim gred 9 long Malala Catholic hai skul. Dispela tripela sumatin em Raymund Lambert, Collins Iwap na Allison Balim. Olgeta yet i bilong Kanam ples na nara-pela ptes klostu long Tuna fektori. Dispela skolasip progrem em seken wan bilong Kampani long sponsorim ol pikinini i go wokim gred 9. Fes wan i bin kamap long 2004 we i lukim nau 3-pela sumatin bai wokim gred 10 i stap long Malala High Skul. Aninit long dispela skolasip progrem RD Tuna bai baim skul fi na ples bilong slip na kaikai. Na tu bai peim alawens i go long sumatin long wanwan mun. Bihain taim skul i pinis kampani bai baim trenspot fi bilong ol sumatin long kam bek gen long ples. Dispela em wanpela helpim RD tuna Cannery i save givim i go long ol asples i stap klostu long fis fektori long Madang Provins.

FM Morobe kisim taim long CHM

Sampela ben we i save rekod wantaim Chin Hoi Min (CHM) studio i tanim na go rekod wantaim sista studio bilong FM Morobe Power House studio na dispela i wokim ol CHM bel nogut. Long dispela ol i stopim FM Morobe long noken pilaim ol song bilong CHM i rekodim. Toksave i kam long ol listena bilong FM Morobe i tok olsem nau yet Radio stesin i wok long pilaim ol singsing bilong Power House studio tasol. Power House studio em ol Papindo grup ov bisnis i ronim na ol ben olsem P2UIF we bipo i bin rekod wantaim Pacific Gold Studio i nau rekod wantaim Power House. Pacific Gold Studio em wanpela rekoding studio we i save givim salens long CHM long 1980's na 90's. Bihain long sampela yia i go pinis CHM i baim Pacific Gold Studio na Kumul Studio long Goroka na wok long salim kaset na CD bilong dispela tupela studio.

Hap Hap Nius

Asples askim long pei bilong turis sevis

Ol papagraun long hap bilong Maunten Wilhem long Simbu provins i givim tok lukaut long ol turis bisnis husat i laik kisim ol turis i go antap long maunten Wilhem bikos long sampela hevi bilong pei. Dispela asples lain i tok olsem wanpela turis bisnis long Goroka i redi long kisim ol ovasis turis i go wokabaut long maunten Wilhem tasol i ol i no stretim sampela peimen yet. Dispela singaut bilong peimen i kam taim wanpela bos bilong turis kampani ya i singaut antap long wanpela papagraun taim papagraun ya i askim long ol peimen kampani ya i no bin stretim yet wantaim ol. Wanpela mausman bilong asples i tok dispela turis kampani i gat sampela peimen em i no stretim yet wantaim ol asples long ol sevis ol ples lain i bin givim long ol pinis.

Ol pipel bilong Nebilyer stretim rot bilong ol yet

James Kila i raitim

OL PIPEL bilong Kuwar long lowa Nebilyer insait long Westen Hailans provins i soim tru olsem self rilaiens i ken senisim laipstail na bringim sevis long komyuniti bilong ol.

Las wik ol manmeri insait long Kuwar i karim sawol, bus naip na ol narapela samting bilong wok na stat long stretim rot stat long Kaugle Praimeri Skul i go olgeta long Okuk Haiwe.

Dispela rot seksin ol 1 klinim na stretim em klostu 8 kilomita. Rot ya tasol i save bringim gavman sevis long ol na tu helpim ol long karim kopi bilong ol i go salim long Maunten Hagen.

Moa long 7,000 manmeri i tok orait na amamas long stretim rot na planim ol gutpela flaua long sait bilong rot. Dispela seksen bilong rot em ol i bin mekim long taim bilong Australia gavman i go insait long eria bilong ol i bin bagarap tru. Las taim rot meintenens i kamap em long 2002, tasol bihain rot ya i go bagarap gen.

Dispela rot i karamapim 5-pela kaunsel wol long Lowa Nebilyer. Olsem na ol manmeri i pasim tok na i tokorait long ol manmeri long wanwan dispela wod bai wok long 1.5

kilomita seksen bilong rot long eria bilong ol.


Kaunsola bilong Kuwar eria Thomas Nimba i tok olsem komyuniti yet i laik yusim taim bilong ol long stretim rot na bringim sevis i go insait long eria bilong ol.

"Mipela ol komyuniti yet i laik traim long sanap olsem self rilaiens. Mipela ino laik wetim tasol gavman long mekim wok," kaunsola Nimba i tok.

"Mipela i pilim tu olsem taim mipela i wet tasol gavman long mekim samting em i save kisim longpela taim. Olsem na mipela laik wok na helpim na bringim ol sevis i kam long eria bilong mipela long sapotim sindaun bilong mipela insait long komyuniti." Kaunsola Nimba i tok.

Em i tok tu olsem dispela wok bilong stretim rot na planim ol gutpela flaua arere long rot long mekim ples i luk nais em namba wan projek komuyuniti i laik kamapim long dispela yia.

Nimba i tok dispela seksen bilong rot we i bagarap i bin stopim planti ol kar long go insait long eria bilong ol na bringim sevis. Planti taim ol bikpela trak na ka i save pas long graun na planti taim ol manmeri i save pusim ka na westim taim bilong ol.



• Wanpela yangpela bilong Nebilyer i yusim savol long stretim sait bilong rot. Foto: JAMES KILA

PABLIK NOTIS



FAN MENESA BILONG PACIFIC BALANCED FUND (PBF) NA PACIFIC PROPERTY TRUST (PPT), I LAIK TOKSAVE LONG OLYUNIT HOLDA OLSEM FAN ADMINISTRESEN OPIS I MUV PINIS LUSIM LEVEL 2 ERA RUMANA NA NAU I STAP LONG LEVEL 1 PACIFIC MMI BILDING I STAT LONG MANDE, JANUARI 24, 2005.

TELEPON NA FAX NAMBA NA EMAIL ADRES I STAP WANKAIN YET, OLSEM:

Telepon: 321 2855, 321 2207, 321 2724, 321 2820 na 321 2073

Fax: 321 1240

Email: edfund@peil.com.pg

**JOHN K RUIMB
MENESING DAIREKTA
PACIFIC EQUITIES & INVESTMENTS LIMITED**

OL INVESMEN MENESA, FAN ADMINISTRESEN NA ASET (PROPETI) MENESA
HELPIM LONG GROIM OL INVESMEN NA MANI BILONG YU

Kainantu tu givim han long Esia na Manam

KAINANTU distrik long Isten Hailans provins i soim sapot bilong ol tu long bungim helpim bilong givim i go long ol manmeri bilong Manam Ailan long Madang provins na tu long ol manmeri i kisim bagarap long Esia long bikpela birua bilong solwara.

Memba bilong Kainantu Yuntuvi Bao i makim llektorel Opisa bilong em Conroy Inape long go pas long wanpela komiti we ol i kamapim sampela wok bilong putim mani stat long hap bilong Yonki, Aiyura, Kainantu na ol eria klostu long Summer Institute of Linguistics.

Mista Inape i tok tupela wik bihain bai ol i statim dispela wok bilong fan reising long pulim ol mani na kago bilong salim i go long ol manmeri i kisim bagarap long hap bilong Esia

wantaim ol lain long Indonesia na tu long Manam Ailan long Madang provins we bagarap i bin kamap long ol taim volkanu i bin pairap na tromoi ol hot ston na graun long ol manmeri.

Mista Inape i tok Kainantu i laik go het tu long givim sapot na helpim long ol pipel bilong PNG na tu long ovasis long soim olsem ol nem nogut na ripot nogut ol manmeri i save harim long Kainantu i no olsem. Ol pipel bilong Kainantu tu i gat sori na bel wari long ol arapela i kisim bagarap long kain bikpela bagarap olsem.

Em i tok taim dispela olgeta wok i pinis na redi, bai ol i askim wanpela opisa bilong Gavana Jenerel i go antap long Kainantu na kisim ol samting ol pipel i bungim i stap.

Bao askim pipel long noken bagarapim bris projek

MEMBA bilong Kainantu Yuntuvi Bao i askim ol pipel bilong Aimontenu eria long wok bung gut wantaim Maybe and Johnson bris kampani taim ol i mekim bris long hap bilong ol.

Elektorel opisa bilong Mista Bao i tok kampani i wok long mekim bris long Aimontenu Wara.

Em i askim ol pipel long noken singaut long kompensesen o noken askim bikpela kompensesen tumas long kampani bikos dispela bris projek em bilong helpim olgeta pipel bilong dispela hap eria long longpela taim i kam bihain.

Mista Bao i tok dispela projek i bin stat long nu yia na bai pinis long mun Februari samting.

Em i tok dispela bris bai sevim moa long 20,000 manmeri bilong dispela hap eria olsem na ol pipel i mas amamas long dispela projek.

Em i tok dispela bris bai opim rot i go tu long nupela maining long Bill Moi gol main long Kainantu na tu dispela hap eria i save planim kainkain kaikai bilong gaden long sevim maket long provins na arapela provins tu.

Opis bilong memba bai tokaut long wanem taim bai ol i redi long opim dispela projek taim projek i pinis.

Plantu taim ol gutpela wok projek i save kamap long ol ples tasol pasin nogut bilong sampela ol lain tasol i save bagarapim ol dispela projek na amamas bilong ol narapela lain tu.

ICCC i givim tok orait long apim PMV fea long NCD

Joe Ivaharia i raitim

INDIPENDEN Konsuma na Kompetisen Komisen (ICCC), opis bilong lukautim na makim ol prais bilong ol kaikai na ol arapela samting wantaim ol sevis insait long kantri long tude bai i givim tok orait bilong en long apim PMV fea insait long Nesenel Kapitel Distrik (NCD).

Long wanpela pas bilong ICCC i kam long ol nius oganaisesen, Taunao Vai, Menesa bilong Prais na Regulatori Afeas Divisen bilong komisen i tok tok orait bilong dispela bai ol i mekim long wanpela konferens we bai i kamap long 10 kilok long Fonde tude.

Dispela tok orait bilong ICCC i bin bihainim wanpela askim i kam long ol NCD PMV Onas

Asosiesen husat i bin mekim dispela askim long las yia.

Ol PMV onas i bin komplem olsem prais bilong ol PMV pats na petrol wantaim disel i wok long go antap we i mekim ol i painim hat tru long lukautim ol PMV bilong ol.

Wankain tu planti ol pasindia i no save baim ol bas fe gut na planti bilong ol ona i kisim taim long baim bek ol benk lon ol i bin kisim long baim PMV bilong ol.

PMV fe bilong las yia i bin stap long 50 toea long ol bikipela manmeri na 20 toea long ol skul sumatin.

Long nau PMV fea ol i askim long en em i go antap long 80 toea long ol bikipela manmeri na 50 toea long ol liklik tasol konfemesen bilong dispela em opis bilong ICCC i mekim wok luksave na bai i

tokaut long tudei.

Long wanem taim dispela nupela PMV fea i stat em tu bai ICCC tokaut long en bihain long olgeta pablik i kisim toksave.

Planti bilong ol pablik i bin mekim bikipela tok komplem long noken apim ol PMV fea long wanem ol PMV i no save pinisim ol ron bilong ol long mak ol atoriti (Len Transpot Bod)) i bin makim ol long mekim.

Na tu planti bilong ol PMV tu i bagarap pinis tasol ol i wok long ron yet na karim pasindia i go i kam long rot.

Long pasin na ron biong ol PMV insait long NCD yumi no klia bai i senis o nogat wantaim dispela nupela PMV fea na bai yumi lukluk na skelim dispela tasol.

Hap Hap Nius

Planim ol dai man

Pot Mosbi Jenerel Haus Sik long las wik i bin statim wok long planim ol dai man husat i bin stap longpela taim long bokis ais (mog) bilong haus sik. Dispela i kamap bihain long nogat wanpela wan pisin bilong ol dai man i kam na kisim ol ol bodi bilong ol long planim. Mekim na PMGH haus sik i bin stat long planim ol bodi we long wanwan dei ol i planim moa long 7-pela bodi. Dispela ol bodi we sampela bilong ol tu em ol pikinini i bin stap long bokis ais moa long wanpela yia olgeta. Ol wokman long haus sik i tok planti bilong ol bodi i bin bagarap pinis na ol Wantok i no kam long kisim ol bodi we long nau bokis ais bilong haus sik i wok long pulap olsem na mipela i planim ol.

Pati tasol tingim laip tu

Ol manmeri husat i laik go aut long pati long ol nait klab insait long NCD i mas lukautim gut ol yet. Dispela em tok bilong NCD Polis Komanda Asisten Komisina Tony Wagambie bihain long ol raskol i bin holim wanpela man na stilim karbi-long em las Sarere. Dispela man i wok long lusim tripela meri long Gerehu long haus bilong ol bihain long pinis bilong nait long pati long Sarere bik moning taim siks-pela raskol i stilim ka bilong em. Ol raskol i bin holim em wantaim ol bus naip na ol botol

Ol Laloki viles kot opisel i no kisim pei

OL VILES kot opisel long Laloki, Sentral provins i tok ol i no kisim pei bilong ol long wanwan mun bihain long 9-pela yia olgeta.

Viles kot opisel i save kisim K25 na K30 olsem pei bilong ol long wanwan mun we provinsel gavman i save baim ol.

Wanpela viles kot klak bilong Laloki Joe Maso i bin autim dispela wari bilong ol we em i bin tok olsem ol i no bin kisim wanpela pei bilong ol stat long 1996 we e mi tok tu nogat wankain pasin i wok long kamap long ol arapela opisel insait long Sentrol provins.

"Ol i no baim mipela yet maski mipela i go pinis na lukim ol opisel long Viles Kot seksen long provinsel het kwata long Konedobu. Taim mipela i kamap long givim tok wari bilong mipela ol i save painim ol ekskus na tok ol i mekim wanpela pepa o submisin pinis long baim mipela", Maso i tok.

Em i tok bipo i nogat kain ol hevi long peimen taim mipela ol viles kot opisel i bin stap aninit long lukaut bilong Nesenel Jastis dipatmen.

Long neks wik bai mipela i statim wok bilong mipela bihain long holidei malolo na mipela i luk olsem bai mipela i wok hat nating. Sapos nogat pei i moabeta long ol i ken pasim dispela viles kot opis long provins.

Long wankain tu Maso i tok long las yia Nesenel Gavman i bin makim sampela mani olsem K200,000 igo long baim 500 viles kot opisel insait long provins tasol dispela man i bin go long nara-pela hap.

Clerk blong Sentrol Provinsel Asembli Jimmy Aniawa husat i bin gat liklik luksave long dispela komplem i tok ol viles kot opisel long Mekeo (Kairuku/Hiri elektoret) i bin kamap long provinsel gavman hetkwata long Konedobu we ol i bin putim dispela komplem.



Strongim Infomol Sekta...Siti Menesa bilong Nesenel Kapitel Distrik Bernard Kipit i mekim toktok long ol pablik long Gordens maket long lonsin bilong NCD Infomol sekta Lo dispela wik. Foto: JOE IVAHARIA

PNG's Most Popular 15 Seater Bus

HIACE

After Sales Backup

- Biggest Vehicle Parts Supply in country
- Largest Service Backup in PNG
- PNG's Only Quality Assured* Motor Dealer

Visit our Website: www.elamotors.com.pg

*QUALITY ASSURED AS/NZS ISO 9001 : 2000



Ela Motors

TOYOTA TSUSHO (PNG) LTD

✓ 15 BRANCHES NATIONWIDE ✓ 41 YEARS TOYOTA EXPERIENCE IN PNG ✓ TOYOTA HISTORY DURABILITY, RELIABILITY AND RESALE VALUE

Gan Kontrol Komiti redi long toktok wantaim ol pipel

NESENEL Gan Kontrol Komiti bai kirapim wanpela bikpela wok bilong ol liklik taim long toktok long ol pipel long pasin bilong holim na yusim ol gan.

Siaman bilong komiti, olpela Jenerel bilong PNGDF, Jerry Singirok, i tok ol plen bilong wanpela progrem long karimaut dispela ol wok i wok long redi nau na ol bai tokaut long Pot Mosbi na wok bai kirap na i ron i nap long wanpela bikpela bung bilong toktok long ol gan we bai i kamap long Goroka long Jun.

Mista Singirok i tok pasin bilong holim gan na yusim long rot nogut em i no gutpela na i save bagarapim sindaun bilong planti manmeri bilong PNG na ausait wantaim na sapos i nogat wanpela samting i kamap long stretim dispela, em bai bagarapim kantri.

Ol ripot i kam long polis i soim olsem planti bilong ol bikpela trabel i save gat of man i yusim gan long wokim olsem of bikpela stil yusim gan, roberi, reip, kilim man na brukim haus na stil.

"Dispela kain samting i save bagarapim ikonomi bilong kantri, of bisnis na ol manmeri tu i save kisim taim.

"Pasin bilong holim gan na yusim long rot nogut i no gutpela long kantri na bai i no inap helpim kantri long kisim ol foren investa o of ausait bisnis husat i laik putim mani i kam insait long kantri, i no gutpela long tred na sekyuriti bilong ol pipel," Mista Singirok i tok.

Em i tok dispela ekasesais o progrem ol bai bihainim em i namba wan taim stret we ol bai lukluk i go insait moa na wokim moa wok painim aut long pasin bilong holim na yusim gan long rot nogut na ol bai i lukluk tu long ol rot bilong daunim dispela ol pasin.

"Em i stap long pasin bilong wanwan manmeri olsem na mipela i mas traim na stretim.


"Mipela i save olsem dispela bai i wanpela hatpela wok tasol em i mas kamap sapos yumi i laik stretim PNG," Mista Singirok i tok.

Komiti i singaut long ol pipel long givim tingting long pasin bilong yusim gan na ol i ken toktok wantaim komiti taim komiti i raun long ol provins na mekim wok long toktok long dispela o taim ol i kamap long tok bek so long redio.

"Dispela ol lain husat i save yusim gan long wokim ol bikhet pasin tu i ken toktok wantaim mipela na tok long wanem as tru ol i save mekim dispela kain ol pasin," mista Singirok i tok.

Em i tok komiti i kisim pinis planti toktok na tingting bilong ol pipel i stap wantaim ol tasol ol i laikim sampela moa i kam long ol pipel long olgeta hap na mak bilong komynuniti long helpim wok bilong ol.

Mista Singirok i tok amamas tu long gavman long sapat bilong en long dispela wok na em i singaut long ol narapela tu long sapatim na tok komiti bai stretim ol progrem na putim long pablik long patim tok long en pastaim long ol i givim long gavman.



• Gan. Bikpela hevi long PNG.

Noken bagarapim ol pikinini

I gat tripela bikpela rait bilong ol pikinini

Dispela em ol tripela bikpela rait aninit long *Convention on the rights of children* bilong United Nations. Lukim ol rait we i kam aninit long ol dispela rait long ol wik i kam.

1. Rait bilong stap laip

Dispela em i min olsem pikinini mas gat inap kaikal, gutpela ples long sliip, kilipela wara na ol gutpela lukaut na sevis long helpim.

2. Rait bilong gutpela was na lukaut

Dispela em i min olsem yumi olgeta i mas banisim pikinini gut we ol kainkain hevi i no ken bagarapim ol.

"Em i tambu long wanpela i bagarapim pikinini o pusim pikinini i go insait long ol birua o pait o pasin nogut bilong ol bikpela manmeri.

3. Rait bilong developmen o go het

Ol pikinini i mas stap long ples we i nogat bikpela hevi o birua na ol i mas gat gutpela skul, pilai, gutpela helt sevis na gutpela sosel laip na strongpela kalsa we i nogat wanpela man o lain i ken daunim em o krosim em tumas.

Dispela em i no min olsem ol papamama i nogat rait long stiaim pikinini bilong ol yet.



WANTOK i go pas long dispela kempen.

Wok bung long helpim ol mama na pikinini

Veronica Hatutasi i raitim

WOK bung i mas kamap namel long ol edukesen, wefea na meri netwok grup long Bogenvil na provinsel gavman long traim helpim ol mama na pikinini husat i bungim hevi long peim skul fi. Na bikpela samting em long rejistaim nem bilong ol mama na ol pikinini i stap long dispela kain hevi, bosman bilong ol skul long Bogenvil, Tony Tsora, i tok.

Mista Tsora i mekim dispela

toktok bihainim askim bilong *Wantok Niuspepa* long wanem luksave na helpim Dipatmen bilong Edukesen i givim long ol mama na ol pikinini we ol i bin kilim dai ol papa bilong ol long bikpela hevi na pait long ailan moa long 10-pela kris-mas i go pinis.

Mista Tsora i tok baset o mani plen bilong Bogenvil long dispela yia i soim olsem sampela kain helpim bai i go long ol mama na pikinini i stap long dispela ol ples.

"Baset bilong Bogenvil long

dispela yia i katim i go long edukesen i soim olsem bai i gat sampela kain helpim i go long ol mama na pikinini husat i bungim hatpela taim long peim skul fi.

"Dispela em ol i bin kilim dai ol papa bilong ol long Bogenvil hevi.

"Tasol ol mama i no kisim ripot bilong ol long soim na mipela i ken lukluk long ol. Long las yia, sampela helpim i bin go long ol sumatin i stap insait long skul fi hevi.

Sapos ol mama i ken kam

long mipela wantaim sampela ripot long karamapim olgeta mama long Bogenvil i stap long wankain hevi long lusim ol papa long pait na nau ol i kisim taim long peim skul fi, em bai mipela i kamapim wanpela polisi long helpim ol," em i tok.

Dispela em i spesol keis na bai gutpela sapos i gat rejistresen bilong olgeta mama wantaim wankain hevi em bai gutpela bikos bai mipela wok long baset long helpim ol, Mista Tsora i tok.



• Tripela mama long Buka i autim stori bilong hevi ol i bungim long laip wantaim nogat man. Ol man na brata bilong ol i bin dai long Bogenvil hevi. Foto: VERONICA HATUTASI

Ol mama salim hombru

ASKIM i go long gavman long go hetim long lo i karamapim hombru na pasin bilong wokim na salim dispela.

Provinsel Polis Komanda bilong Is Sepik provins, Leo Kabilo, i tok olsem bihainim planti mama i wok long salim hombru.

Ol ripot i tok ol mama i wok long salim wanpela botol hombru namel long K10 na K20 bikos ol i laik kisim mani bilong peim skul fi na ol arapela kaikai samting bilong famili.

Planti ol mama i salim hombru em ol dispela bilong ol setelmen ol i bin kirapim long taim vanilla bisnis i bin kisim bikpela mani. Na tu, ol dispela we ol i rausim ol long skwata setelmen long ol arapela provins olsem Is Nu Briten na Madang.

Mista Kabilo i tok polis i bin salim wanpela petisen o askim i go long provinsel gavman long rausim ol setelmen tasol nogat samting i

kamap yet.

Em i tok ol loman i wari bikos planti ol yangpela manki krismas bilong ol em 14 yia i wok long baim na dringim hombru na wokim ol trabel long famili, komyuniti na sosaiti.

Em i tok long nau, ol polis i wok long sasim ol lain i wokim na salim na baim hombru aninit long Smuk Nogut Ekt bilong sasim ol manmeri i yusim ol strongpela drag, tasol dispela i no gutpela tumas. Na gavman i mas kirapim stret dispela lo.

Em i tok tu olsem ol i bin sasim pinis tripela mama long salim hombru long Wewak taun maket.

Long wankain taim tu, sampela mama long ol arapela provins i wok long salim hombru tu long kisim mani long helpim peim skul fi bilong ol pikinini. Ol loman na atoriti i mas stopim dispela pasin bikos em i bagarapim planti yangpela.

Ol Bethel Luteran Mama strongim wok

Paulus Tali i raitim

OL BETHEL Luteran Sios mama i save strongim tru wok bilong ol insait long komyuniti na ol wel pam blok.

Dispela em long Kimbe insait long Wes Nu Briten provins.

Wanpela meri husat i save go pas long wok bilong ol Bethel mama em Rosa Mekori i bin tok ol mama i save givim taim bilong ol stret long karimaut wok bilong Bikpela.

Em i bin tok olsem maski pasto i no stap, ol mama yet i sanap strong long skruim ol

wok bilong sios long taun na long ol welpam blok.

Em i tok planti long ol mama i bilong Wes Nu Briten yet tasol i maritim ol man Morobe na ol i bilong Luteran Sios. Ol meri nau i kamap olsem ol Luteran Sios memba na ol i holim strong long bitip na karimaut ol sios wok.

Bikpela hatwok bilong ol i bin kamap long ples klia taim ol bin holim wanpela bikpela konferens o bung bilong ol Luteran Sios mama insait long Niugini Ailans rijon i no longtaim i go pinis.

Lo bilong lukautim ol mama na pikinini meri



Lo i tambuim pasin pamuk wantaim ol arapela pasin nogut long ol pikinini

Ol dispela rong em pamuk pasin

Skruiim ol toktok long Lo bilong PNG long pasin pamuk wantaim ol arapela pasin nogut i go long ol pikinini. Ol dispela rong em pasin pamuk wantaim pikinini we krismas bilong em i stap aninit long 16 kris-mas.

Pasin bilong mekim pikinini raun olsem pamuk na soim bodi Pasin bilong mekim pikinini kamap pamuk man o meri na soim bodi em i rong long Papua Niugini. Aninit long nupela lo, ol manmeri husat i mekim ol pikinini i mekim dispela pasin bai kisim bikpela mekim save.

Pasin bilong mekim pikinini kamap pamuk.

•Em i rong long yusim pamuk pikinini o long baim em long mekim pasin pamuk.

•Em i rong long larim haus bilong yu i kamap olsem haus pamuk bilong ol pikinini.

•Em i rong long kisim ol mani o ol samting em i bilong pamuk wantaim pikinini.

•Em i rong long papa o mama i larim pikinini bilong ol i kamap wanpela pamuk.

•Em i no rong long pikinini sapos em i kamap wanpela pamuk. Ol kain kain pikinini olsem i nidim helpim.

Mekim save: Manmeri husat Kot i painim olsem em i wokim ol dispela pasin, bai i go katabus inap em i dai.

Ol dispela toktok kam long Family and Sexual Violence Action Committee Sapos yu laik kisim helpim long ol, etres em long telipon namba: 3211744 Feks: 3217223.

Sotpela tok lukaut

Skruiim toktok long Famili Piening rot

Operesen bilong pasim bel we ol i ken wokim long olgeta haus sik na sampela helt senta. Long wanem taim stret na yu ken kisim operesen bilong pasim bel?

Yu ken kisim operesen bihain tasol mama i karim bebi. Sampela taim dokta i ken karimaut operesen bilong pasim bel long taim dokta i katim mama long kisim bebi i kam aut. Ol speselis i ken karimaut dispela operesen tu. Gutpela sapos yu toktok wantaim man bilong yu bipo yu kisim operesen.



Kuk Kona wantaim MERI WANTOK

Stail Kuk na Sel

Yu mas i gat:

Kuk baraun na wait mit bilong kuka

Muli juis

Parsley

Sol

Pepa pauda bilong kuk

Bretkrans

Sel na ol han bilong kuka

We long Kukim

1-Putim 1-pela tebol-spun bretkrans long braunpela mit bilong kuka

2-Putim tu sol, pepa, muli juis, na parsley yu katim katim pinis.

3- Pulumapim i go insait long sel bilong kuka

4-Kisim waitpela mit bilong kuka na putim so, pepa na muli juis wantaim parsley em yu katim katim pinis.

5-Putim dispela

namel long sel bilong kukana raunim arere wantaim repela mit, 6-Bilasim wantaim ol hap parsley na ol han bilong kuka.

Sel (Oyster)

1-Opim sel wantaim naip na rausim antap sel.

2-Sindaunim antap long aia na kaikai wantaim muli na (temon juis) na pepa.

Sapos yu gat sampela we long kukim ol kaikai olsem saksak, banana, taro, o kaukau na yu laik serim wantaim ol narapela meri, plis, salim pas i kam long mipela na bai mipela i putim long nius-pepa.

TOKTOK NATING
Wantaim
Fr. Paul Liwun SVD



LONG wanpela apinun, i gat wanpela liklik meri, krismas bilong em 10 yia i bin kamap long haus bilong Pater long kam long haus bilong ol na prea wantaim papa bilong em. Pater i tok orait na em i go lukim famili bilong ol.

Taim Pater i kamap long rum bilong papa, em i bin lukim man ya i slip tasol tupela han bilong em i bin sapatim het bilong em. I gat wanpela emti sia i stap klostu long bet bilong em. Pater i bilip olsem ol i bin tokim dispela man, Pater bai kam visitim em. Pater i tok; "Ating yu stap wetim sampela visita?" Man i bekim; "Nogat. Na yu husat?" "Mi em i nupela peris pris bilong yu," pater i tokim em. Na Pater i tok moa; "Taim mi lukim wanpela emti sia i stap, mi tingim olsem sampela lain i bin tokim yu olsem mi bai kam." "Oh ya...dispela sia?", sik man i askim. Bihain em i tokim Pater long pasim dua bilong rum. Man i tok; "Mi no bin save askim wanpela man long pasim dua. Mi tu i no save askim ol pikinini meri bilong mi tu long pasim dua. Na em i tok moa olsem; "Long laip bilong mi, mi no save gut yet, olsem wanem mekim prea. Long Sande, taim mi bihainim misa/lotu, mi save harim Pater i toktok na givim skul long prea. Tasol i nogat wanpela skul bilong Pater i bin go insait long bel bilong mi. Olsem na mi lusim ol kain kain pasin bilong wokim prea, inap long wanpela de long 4-pela yia i go pinis, gutpela pren bilong mi i bin tokim mi; Nyadu, ...prea em i wanpela liklik wok long tokok wantaim God tasol. Mi i gat wanpela rot bilong helpim yu long wokim prea. Insait long rum bilong yu, yu sindaun na putim wanpela emit sia long pes bilong yu. Nau long bilip bilong yu, lukluk long God i sindaun long dispela sia. Dispela i no wanpela giaman toktok tasol. Nogat. Bikos Jisas, pikinini bilong God i bin tokim yumi olsem em i bai stap wantaim yumi olgeta taim. Nau...lukluk long sia na toktok wantaim em na opim yau na harim gut olsem yu harim mi toktok nau."

"Pater. Long dispela as tasol mi bin traim nau. Mi bin traim planti taim na mi amamas na mi laikim tru. Olgeta de mi spendim planti taim bilong mi long toktok wantaim dispela emit sia. Tasol, mi mas lukaut gut. Bikos, sapos pikinini bilong mi i lukim mi toktok long dispela emit sia ol bai kirap nogut na tingim olsem mi longlong pinis na salim mi go stap long haus sik bilong ol longlong lain." Taim Paer i harim toktok bilong sik man em i bin givim strong long dispela sik man long bihainim dispela we bilong prea bilong em. Pater i prea wantaim dispela sik man, na givim sakramen unsio na blesim dispela sik man na i go bek long haus pater. Tupela naif bihain, dispela liklik meri krismas bilong em 10, i bin ringim pater na tokim Pater olsem papa bilong em i dai pinis long apinun. Pater i askim liklik meri olsem; "Papa bilong yu i bin dai gut?" Na meri i bekim; "Ya, Pater. Em i dai gut tru. Long 2 kilok apinun, mi laik go long stua, Papa i bin singautim mi go long rum bilong em na stori long mi long wanpela fani stori na em i bin kis long sait pes bilong mi. Na long 3 kilok taim mi kam bek long stua, mi painim Papa bilong mi i dai pinis. Tasol mi bin painim samting i narakain. I luk olsem, bipo em i dai, papa i bin pundaun. Bikos mi bin painim Papa indai na het bilong em i pas long dispela emti sia i oftaim stap long sait bilong bet bilong em."



"Yupela i mas Prea long God i helpim mipela."

Ol brata, mipela i gat wanpela tok moa. Yupela i mas prea long God i ken helpim mipela, na bai tok bilong Bikpela i ken ran i go long olgeta hap na kisim biknem nem wankain olsem em i bin kisim namel long yupela. Na yupela i mas prea long God i ken kisim bek mipela long han bilong ol man nogut. Bikpela i save mekim pasin i tru. Olsem na yumi inap long bilip tru long em. Em bai i strongim na lukautim yupela, na Satan bai i no inap mekim wanpela samting long yupela. Na Bikpela i mekim mipela i save gut olsem, yupela i mekim olgeta pasin mipela i tok long yupela i mas mekim. Na bihain tu yupela bai i mekim olsem tasol. Mipela i laik bai Bikpela i ken stiaim tingting bilong yupela, na bai yupela i ken save tru long pasin bilong God bilong laikim tru ol manmeri, na long pasin bilong Kraiss bilong sanap strong na karim hevi.

2 Tesalonaika 3: 1-5

Nupela hetman bilong Emmanuel Lutheran Sios kisim blesing

Paulus Tali i raitim

EMMANUEL Lutheran Sios kongrigesen long Gerehu Stes 2 insait long Pot Mosbi las wik i lukim wanpela nupela hetman bilong ol i kisim blesing.

Harry Aboya bilong Okapa long Isten Hailans provins i bin kisim blesing long han bilong oipela distrik presiden, Pasto Anonga Pininga.

"Yu mas wok klostu wantaim pasto long lukautim kongrigesen long sait bilong lotu na ol narapela wok bilong misin," Pasto

Anonga i tokim Mista Aboya.

Dispela bung tu i lukim moa long 500 manmeri i kamap.

7-pela nupela yangpela manmeri i bin kisim blesing bilong konfemesen long wankain taim tu.

"Wasman i mas lukautim gut sipsip olsem nau ol yangpela i kisim konfemesen.

Dispela i makim ol i kam insait long haus lotu olsem banis bilong God," Pasto Barry Wilson bilong Good Shepherd

Lutheran Sios long Koki i tok taim em i autim tok.

Pastor Barry i tokim ol yangpela husat i kisim konfemesen tu olsem ol i lusim papamama bilong ol na ol i mas sanap strong long bilip bilong ol yet.

"Preia em i ki bilong Jisas Kraiss olsem na yu i mas pre strong na save olsem dispela konfemesen i helpim yu long go insait long banis na haus bilong God," Pasto Anonga i tokim ol manmeri husat i bin kamap na amamas long dispela bung.

Skruim wok bilong Bikpela wantaim baik

MASKI ples i maunten na bikbus we i pulap long ol natnat i dringim blut bilong ol, 43 yangpela man bilong Morobe provins i bin raun long ol baisikel o wilwil long mekim ol bisnis man na ol memba i luksave long ol sosel hevi i bungim ol yangpela.

Ol dispela yangpela i bin lusim Morobe provins na bihainim maunten rot na kamap long boda bilong Sentral provins na kam kamap long Mosbi bihain long tupela wik. Mosbi em i dispelpa ples we politikis na bisnis i kamap strong long en.

Lida bilong grup em ol i kolim long Morobe Bikers Adventure Klabb Jay Simon i tok ol bin wokim dispela long kamapim aweanes long HIV AIDS, vailens egensim ol meri, sot long samting (poverty), ol famili i bruk na ol arapela sosel hevi i karamapim ol.

"Mipela i bin ron long baisikel long kamapim aweanes long ol dispela samting na kamapim mani tasol i no kisim gutpela sapat tumas long ol bisnis haus. Tasol Baibel Sosaiti i bin askim ol sapos ol i ken salim ol buk Baibel na dispela em i nambwan taim we wanpela Kristen oge-naisesen i bin askim mipela long karimaut kain wok olsem," Mista Simoi i tok.

Ol dispela yangpela baisikel man bai i bihainim ron olsem long Magi Haiwe long Sentral provins inap ol i go kamap long Alotau long Milen Be provins.

Ol i wok long lukluk long pablik long mani na ol arapela sapat long skruim wok aweanes na ol i askim pablik na ol bisnis haus long sapatim ol.

"Welfea Minista Ledi Kidu i bin helpim mipela gut taim mipela i kam kamap long Mosbi. Em i bin painim haus long mipela i slip long en wantaim kaikai tu," Mista simoi i tok.

Eksekutiv Seketeri bilong Baibel Sosaiti, Leontine Tamate, i tok ol baisikel manki bai helpim long tilim ol buk Baibel na ol arapela samting olsem ol kalarim buk, membasip fom bilong Baibel Sosaiti na buk i gat ol Baibel stori.

Baibel Sosaiti i givim ol dispela wanwan man wanpela Buk Baibel bilong ol i ritim na save long Tok bilong Bikpela. Na tu, long helpim ol long save long em na em i kam insait long laip bilong ol taim ol i kari-



• Sampela memba bilong Morobe Bikers Adventure Klabb.

maut wok.

Misis Tamate i tok Tok bilong Bikpela i stap long buk Baibel em i bekim bilong ol sosel hevi na ol narapela (hevi) ol yangpela i bungim long tude na givi9m Baibel i go long ol bai strongim ol long wokabaut bilong ol long baisikel i go long Alotau na ol arapela raun bilong ol.

Ol lain manki bai raun i go long Alotau long Milen Be bihainim rot long Sentral provins i go na bihain long dispela, ol bai kisim sip i go bek long Lae insait long Morobe provins gen.

Mista Simoi i tok ol i plenim gen narapela wokabaut long baisikel na dispela taim, ol bai raun i go long Bogia long Madang provins na i go olsem long Wewak, Vanimo na go olsem long Irian Jaya long Wes Papua. Ol bai kamap long hap taim Tred Fea So i stap na dispela em long mun Ogas long dispela yia.

Mista Simoi i tok planti ol manki wantaim em i kam long ol famili wantaim hevi na papamama i dai long HIV AIDS. Na em i tok dispela asosiesen bilong ol baisikel lain em i olsem famili bilong ol.

Bruder Peter Hinawai kamap dikon

MENDI Katolik Daiosis i bin gat selebresen las Sande Januari 23 taim Bruder Peter Hinawai i bin kisim blesing bilong kamap Dikon.

Bisop Stephen Reichert bilong Mendi Katolik Daiosis long Sauten Hailans i bin givim blesing bilong Dikon long Bruder Pita Hinawai Katidral haus lotu long Mendi.

Bruder Pita em i bilong Homaria long Sent Josef Peris long Margarima.

Em bin skul long Sen Fidelis

Seminari long Kap Madang na pinisim gret 11 na 12.

Bihain em i go stadi long Gut Sepet Kolis long Banz, em bikpela semineri bilong ol daiosisen kendidet long Asdaiosis bilong Hagen.

Em i mekim pastoral wok bilong em wantaim Pata Henri long Pangia na spiritual yia long Wewak.

Las tru Pita i kisim moa save long tok bilong God na ol skul bilong Katolik Sios long Holi Spirit Kotis na Katolik Tiolojikel

Institut long Bomana, Pot Mosbi.

Taim em i kamap diken pinis, Bruder Pita bai stap long Mendi na wok long nupela Katekis Skul inap long taim em i kamap daiosisen pris.

Bruder Pita i mekim planti gutpela wok long ol hap em i bin stap long em na dispela makim bilong em olsem dikon em i kaikai bilong hat wok bilong em. Ol lida na manmeri i amamas long lukim wankain wok i kamap nau tu.



• Bruder Peter.

Anglikan Sios glasim "mercy killing"

KILIM dai long marimari o Mercy Killing o Euthanasia i wanpela bikpela samting we planti sios long wol i egensim bikos bikpela bilip ol i sanap long en em God tasol i ken kisim laip, i no man.

Mercy Killing em i kamap taim dokta i ken givim marasin o sut o lusim laip sapot long man o meri husat i karim bikpela pen tumas na i no inap long orait. Marasin tasol i holim em i stap laip.

Long sampela kantri tasol nau, lo i tok oraitim mercy killing i kamap, maski ol sios i egensim yet dispela.

Tasol long las wik, ol ripot i kamap olsem sinia edvaisa bilong het bilong Anglikan Sios em Asbisop bilong Kenteberi, Dokta Rowan Williams i tok i gat strongpela tingting long sori i stap we i ken larim Mercy killing o soim marimari long kilim dai man o meri i sik nogut tru.

Ripot i tok canon Robin Gill em profesa bilong Tiooloji long Kent Yunivesiti long Ingran i tok strong olsem pipel na haus-lain husat i helpim ol lain i sik nogut tru na i no inap long orait na ol i stap long bikpela pen tasol marasin i holim ol i stap i mas noken kisim mekim save long lo.

Em bin givim piksa bilong Diane Pretty husat i bin gat bikpela sik long kru na em bin kempen strong long rait bilong helpim em i dai tasol em i lus.

Profesa Gill i tok i gat strongpela keis long voluntia long kisim euthanasia o helpim em i dai. i gat bikpela sapot long keis bilong Dianne Pretty.

Long las wik, Asbisop bilong Kenteberi Dokta Rowan i bin singautim Profesa Gill long sindaun long komiti bilong palamen (long Ingran) we i mekim wok painim long pravit membas bil we Lord Joffe i laik putim kamap we bai helpim ol lainil gat sik ol i karim bikpela pen long en na ol i no inap long orait.

Profesa Gill i tok em i no klia long tingting bilong Asbisop long dispela samting tasol em yet i bilip strong olsem lo i mas noken kotim na givim mekim save taim ol i helpim man i laik dai long dispela kantri o sapos ol i go long ausait kantri long helpim wanpela famili memba i dai long kantri we lo i narakain.

Voluntia Euthanasia Sosaiti i wanpela grup i wok long kempin long senisim lo bilong euthanasia i givim ful sapot. Na ol i lukim olsem Anglikan Sios o Sios ov Ingran i wok long go isi liklik long lukluk bilong em egensim euthanasia o marimari kilim dai.

"Asbisop i makim Profesa Gill i soim olsem em i laik go insait long ol toktak i karamapim dispela bikpela samting na mi bilip em bai strongim ol arapela kleji long

long givim sapot,' sief eksekutiv bilong sosaiti i bin tok.

Wanpela mausman bilong Sios ov Ingran (Anglikan Sios) i bin tok tingting bilong profesa Gill i no makim maus bilong sios tasol i bilong em yet.

"Sios ov Ingran i bin wokim join stetmen wantaim ol Katolik bisop long Assited Dying Bill i egensim long givim tok orait long euthanasia o mercy killing,' sios mausman i bin tok.

Narapela memba bilong Jenerel Sinod i bin tok planti Kristen i no inap wanbel lo tingting bilong Profesa Gill bikos God tasol i ken pinism laip bilong man.

Profesa Gill i gat intres long euthanasia long planti yia nau na long 1998 em bin kamapim wanpela buk ol i kolim Euthanasia and the Churches.

Em bin kairmaut tu wanpela rises long ol lain i save go olgeta taim long sios na painaut olsem bikpela mak inap long 66 pesen long ol i sapotim marimari kilim dai long helpim ol lain i sik nogut tru we marasin tasol i holim ol i stap long dai.

Long 1998 Lambet konferens, ol Anglikan bisop i bin wanbel olsem noken suvim o ovarim long givim marasin taim sikman i no inap long kamap orait i stap insait long bilip bilong ol Kristen long wol tu.

Lusim Ples

Wantaim Bisop Peter Fox bilong Anglikan Sios, Pot Mosbi.

SEA of Galilee o Solwara bilong Galili i mas wanpela long ol naispela ples tru long dispela graun. Wara i save pulap long ol pis, planti pisin i pulap long dispela hap na ol liklik maunten o hil i lainim nambis i go em i luk nais na grin.

Em i isi stret long pilim olsem yu stap klostu long Jisas na ol lain poroman bilong em bikos tingting i ken rausim planti tausen krismas na long ai we i stap long tingting, wanpela i ken lukim "ol liklik bot bilong painim pis we ol seil bilong ol i plai nabaut long win, ol manki i pilai long nambis, ol manmeri bilong Capernaum i maket na Jisas yet i wokabaut long ol hil klostu.

Tasol long dispela taim nau, i gat ol kibut-sim o ol vites we ol Jew o pipel bilong Israel i stap wantaim long en, ol ples we ol turis i go long malolo na lukim ples i stap long en, ol sios namel long ol olupela bilding we sampela i bagarap tasol ol man i ken harim yet ol Hibru o Jew i stori na toktok long kain nek we bai yu ting olsem ol i singsing.

Na wanpela i ken harim nek bilong ol pisin i singsing i stap. Wara bilong Galilee em i swit moa long dring na

em i klia tru. Sapos i no bin gat pait na ol ami i kem long iskos bilong nambis na ol mainfil wantaim na tu, pait long Golan Heights, ples bai luk olsem piksa bilong heven.

Em bin mas hat long Simon Peter, Andrew, James na John long lusim olgeta dispela samting bihain tasol ol bin wokim dispela long bihainim Jisas.

Taim Peter i go lapun long sevim Bikpela long autim Gospel na wet long haus kalabus long Rom wetim ol i hangamapim em, tingting bilong em i mas go bek long Galilee. Em bin wanpela longpela na hatpela wokabaut.

Long ol wod o toktok i stap long ol tokples bilong yumi, i nogat planti wod i we yu ken kolim na laik krai olsem long wod "Home" o ples. Yumi save hangere long em, olsem tasol Peter i bin mekim.

Ekspiriens bilong em i soim wanpela hatpela samting long laip bilong ol Kristen. Yumi no kisim singaut long long sanap nating tasol long wokabaut i go long ples yumi no save long en wantaim Jisas em i Rot, trupela na Laip. (John 14:6). "Long hia, yumi nogat siti bai stap oltaim oltaim, tasol yumi wok long painim siti bai i kam yet." (Hibru: 13: 14) Trupela ples bilong yumi em Heven na Laip em i jeni o wokabaut i go long Spes na Taim we yumi i mas kamap long en.

Ol Baibel bai givim gutpela stia long polis

Aiva Tamate i raitim

POLIS Dipatmen i bin kisim moa long 800 liklik blupela poket sais Baibel long PNG Baibel Sosaiti.

Eksekutiv Dairekta bilong Sosaiti Leontine Tamate i tok Sosaiti i save kisim mani long donesen bilong publik na salim ol buk Baibel long Mosbi na kantri tasol ol dispela liklik buk Baibel ol i givim long Polis Dipatmen em long gutpela tingting na wok namel long ol.

"Sapos Polis Dipatmen i laik donetim sampela mani i go long Baibel Sosaiti, e mi samting bilong ol," Misis Tamate it ok.

Em i tok moa olsem bikpela samting em long ol polis manmeri i kisim Tok bilong God na em bai stiaim ol gut long laip na wok bilong ol long lukautim lo na oda long kantri.

Inspekta Adam Busil bilong Polis Pablik Rilesens taim e mi kisim ol Baibel long han bilong Misis Tamate i bin tok ol i plenim long holim wanpela pereid



• Misis Tamate (lephan) i givim ol Baibel long Mista Busil bilong Polis Pablik Rilesens divisen long Polis hetkota long Konedobu. Foto: AIVA TAMATE

bilong ol Komisina o publik pareid we ol bai givim ol Baibel i go long ol wan wan polis man na meri.

Em i tok olsem hap wok bilong en em long wok tu wantaim ol yut, sios na famili insait long polis fos yet na ol dispela

buk Baibel bai givim gutpela helpim tru long stiaim na strongim ol long spiritual sait na kaunseling.

Wari long ol pikinini na mama graun

WANPELA bikpela wari we Luteran Wol Federesen (LWF) i gat long birua bilong sunami long Saut Is Esia em long ol pikinini na envaironmen o mama graun.

Long toktok bilong em, Jenerel Seketeri bilong LWF em Reveren Dokta Ishmael Noko i tok dispela nupela yia i bin stat wantaim pen long sait bilong piksa long lukim bikpela solwara i solap i karim ol pikinini, sampela long han bilong ol papamama na ol i no inap long sevim ol.

"Ol pikinini i laikim lukaut i kamap long ples klia long dispela birua na em i gutpela skul long yumi i lainim na putim ol laik bilong ol pikinini long namel long ol prairoriti long ol plening bilong ol rilijes komyuniti na sosaiti," Dokta Noko i bin

tok. Long ol ripot, planti pikinini i bin lus long sunami na planti moa i nogat papamama bikos sumani i kilim dai ol (papamama).

Dokta Noko i bin tok bikpela samting tu i mas kamap nau long lukautim envaironmen bikos planti eria long nambis em ol liklinim na katim ol diwai bilong mekim ol risot na ol haus na dispeia i wanpela asua we i bin isi long sunami long bagarapim na karim olgeta samting long rot bilong em. Em i askim sapos moa pikinini i bin sevim laip bilong ol sapos moa long ol diwai na bus long nambis i sanap yet.

Dokta Noko i wari tu long ol hevi i karamapim ol pikinini we i nogat papamama long lukautim ol bikos ol i ken kisim ol

olsem ol pikinini soldia, kisim ol long mekim wok pamuk na trefikim ol drag.

Tu, em i wari long ol pikinini we papamama i dai long HIV AIDS na ol haus na famili we ol pikinini tasol i stap na go pas long em.

Bihainim ol dispela wari, Dokta Noko i askim sios long kontribuit moa long welfea bilong ol pikinini husat i bihain taim bilong ol sosaiti.

Long wankain taim tu, LWF i wok wantaim ol memba sios na tu, ol arapela sios grup long helpim wantaim ol rilif wok long Indonesia, India, Sri Lanka na ol arapela kantri moa i bin kisim bagarap long sunami na wok bilong ol i wok long helpim long kamapim gutpela sindaun gen.

Vatiken egensim haitim na kisim go aut sunami pikinini

VATIKEN i egensim pasin bilong trefikim o haitim na karim i go aut long kantri ol pikinini na pipel bihainim Disemba sunami long Saut Is Esia.

Nau mak i stap olsem klostu 200,000 pipel i bin dai na moa long milien moa i kisim bagarap na hevi i stap long Indonesia, Sri Lanka, India, Tailenm Maldives na ol arapela kantri long Afrika.

Presiden bilong Pointifikel Akademi Bisop Elio Sgreccia husat i kisim dispela wok nupela tasol i bin tokim Vatiken Redio olsem palnti pikinini i kamap ol ofen o i no moa gat papamama bihainim sunami na sampela ejensi i wok long ofaim ol pikinini long adopsen o ol narapela i lukautim. Tasol ol i salim ol long sampela manimak.

"Yumi mas rausim dispela kain pasin," em bin tok.

Taim nupela yia i bin stat, Vatiken i bin gat bikpela wari long ol sunami pikinini na hetman bilong Katolik Sios long wol, Pop John Paul 2 i bin salim mesej bilong sori na helpim i go long ol kantri na famili we birua i bagarapim ol stret.

Em bin tok bilip long lukim ol gutpela taim long dispela yia em i stap long olgeta pipel i pas wantaim na helpim wanpela narapela wantaim helpim bilong Bikpela. Na em bin tok bilip i skulim yumi olsem Bikpela i no save lusim yumi long ol hatpela taim na taim nogut.

Long wankain taim tu, Kadinel Christopher Schonborn bilong Vienna na Presiden bilong Austria Bisops Konferens i bin lukluk raun l go long Aceh long Indonesia we i bin kisim bikpela bagarap tru long sunami. Em bin go wantaim Nunsio bilong Indonesia na Asbisop bilong Medan em Asbisop Alfred Malcolm Ranjith long lukim ples na pipel i kisim bagarap.

Nius Bilong HIV AIDS



wantaim David Ephraim

INSAIT long ol bikipela bus antap long maunten i kam inap long nambis bilong yumi i gat planti kros, pait i wok long kamap insait long planti famili. Dispela kain hevi i wok long kamap namel long ol yangpela na ol mamapapa bilong ol. Kain pasin olsem long dring, smok, nogat wok, raskol pasin na boi na gel pren pasin. Moa long dispela bikipela kros i wok long kamap taim ol i painim aut olsem ol i gat HIV AIDS.

Plantu taim dispela kain hevi i wok long kamap namel long ol famili bikos long pasin na laipstail i wok long senis taim developmen i wok long go bikipela insait long kantri bilong yumi we ol planti manmeri i no redi long go insait long en. HIV AIDS em i nupela yet insait long kantri bilong yumi. Plantu manmeri i no save long rid na rait na planti i stap yet wantaim pasin na tingting bilong ol pasin tumbuna we i wokim hat moa long kisim nupela kain we long lainim ol long HIV AIDS na ol narapela bikipela hevi i wok long kamap na bagarapim famili bilong yumi ol Papua Niugini.

Dispela em wanpela hevi we i wokim rot bilong skulim ol manmeri bilong nau long ol bikipela hevi na senis i hat moa.

Long kisim nupela senis i go insait long ples bilong yu, yu mas pastaim stadi na luksave long wanem kain laipstail ol wantok bilong yu stap long en nau. Taim yu luksave orait yu kamap wantaim ol wei long bringim senis long mak we ol bai klia long en.

Noken hariap na kisim senis olsem Wayahers intent sistem i go insait long bik bus na putim tasol ol manmeri bai mekim wanem long en? Dispela bai wokim yu kamap longlong long ai bilong ol develop kantri manmeri.

Intenet em wanpela save kilim system we i ken helpim planti manmeri tasol tingim level bilong save bilong ol manmeri long ples pastaim yumi bringim ol bikipela senis i go insait. Pastaim long senis i go insait i mas gat gutpela i stap dispela i save wokim ol manmeri i helti na fit wantaim bikipela moa tingting long helpim ol yet. Dispela bai opim tingting bilong ol long painim rot bilong senisim na developim living standed bilong ol.

Long pinis bai mi tok yu nogat narapeta humen rait i stap tasol yu gat bikipela rait long stap laip. Mekim yus. HIV AIDS stap pinis blokim em bipo em i kilim king bilong yu i dai.

Long Tok Lukaut long dispela wik bai mi toktok long suksesful o gutpela laip. Sakses em i taim yu i inapim ol gol o strongpela tingting bilong yu long laip.

Mi bilip olsem yupela olgeta manmeri i laik kamap suksesful long laip bilong yupela we long bhain taim bai yupela luk bek long rot yu bin wok-about long en long kamap suksesful long laip bilong yupela na hamamas long en.

Plantu bilong yupela bai tingting olsem sukses em i wanem? Sakses em i no yu gat olgeta samting yu laikim long en, em i no mani, i no namba long wok bilong yu, em i no ol narapela manmeri apim nem bilong yu, em i no olgeta samting bilong graun yu gat long en.

Tasol em i taim God yet husat i wokim yumi olgeta i tokim yu olsem "yu win man tru, yu gutpela wokman tru". Sakses em taim man i hones long wok bilong em na soim stretpela pasin long lukautim ol responsibility o wok we God i givim em. Em olsem bos bilong yu i givim yu wok long wokim na yu pinis gut long we em i laikim long en. Sakses em i sanap strong long tok tru wantaim olgeta bel save na tingting bilong yu inapt aim graun i pinis. Sakses em taim yu pinisim gut ol laip gols bilong yu wantaim olgeta save yu gat na wantaim olgeta strong inap yu nogat win long kisim moa em taim yu dai. HIV AIDS stap pinis askim yu yet sukses em wanem? Taim bilong wok, lainim na kamap suksesful long laip.

Pe bilong ol tisa long kantri i go antap moa

Veronica Hatutasi i raitim

OL TISA long kantri i kisim luksave long hatwok ol i mekim na ol bai kisim narapela 4 pesen (%) moa long pe bilong ol long dispela yia, Siaman bilong Nesenel Tising Komisnin, Alan Jogioba i tok.

Dispela em antap long 4 pesen go antap long pen a bonus ol bin kisim long las yia. Olgeta dispela samting i karamapim go antap long pe i stap aninit long Memorandum ov Agrimen bilong yia 2004 inap long neks yia 2006. Na dispela narapela 4 pesen long pe bilong ol tisa i go antap bai kamap long namba wan haf bilong dispela yia, Mista Jogioba i tok.

"Gavman bilong PNG i luksave long gutpela wok yupela i mekim olsem ol tisa na i peim yupela dispela 4 pesen i go antap na bonus wantaim," Mista Jogioba i tok.

Taim em i tok tenkyu i go long ol tisa long gutpela wok ol bin mekim las yia na taim dispela nupela yia taim skul i laik stat,

Mista Jogioba i askim olgeta tisa long senisim pasin na tingting i no gutpela bilong las yia na statim dispela yia gut wantaim gutpela na senis pasin na tingting.

Long dispela wik Mande Jenuari 24, olgeta tisa long kantri i sapos long stap long skul na stat wok bikos skul bai stat long neks Mande Jenuari 31.

Taim Mista Jogioba i tok welkam long 34,728 skul tisa long olgeta level (elementeri, praimer, hai skul, vokesenel, sekonderi, teknikel, bisnis kolis, tisa kolis na institut), em strongim ol long givim gutpela edukesen i go long ol sumatin.

"Mi tok welkam long yupela olgeta long 2005 akademik yia na bilip olsem yupela bai givim kwaliti edukesen i go long ol sumatin.

"Tingim, ol papamama, ol was papamama, ol sponsa na gavman i tromoim bikipela mani long skulim ol pikinini.

"Ol tisa i save kisim pe long skulim ol pikinini. Olsem na mi askim yupela long

wok gut na karimaut gut ol wok olsem ol tisa long ol pikinini na kantri," Mista Jogioba i tokim ol tisa.

Mista Jogioba i tok em i bikipela samting long ol tisa i pulumapim ol Risamsen Duti Fom taim ol i stat na Hetmasta, Apointing Atoriti na tisa yet bai sainim dispela fom.

Mista Jogioba i tok wantaim nupela gavman peirol sistem, ol i mas pulumapim dispela fom long kisim pei.

Em i strongim olgeta tisa long stap long skul long taim na ol dispela i no go kamap long skul long taim kamap long skul long dispela wik na redim ol samting bipo skul i stat neks wik.

"Yupela i gat wok long stap long skul long dispela wik. Ol pikinini i laikim yupela long stap long skul long dispela wik," em i tok.

Long makim Nesenel Tising Komisnin, ol papamama, was papamama, ol skul pikinini na gavman, mi laikim olgeta tisa i mas stap long skul bilong em long dispela wik," Mista Jogioba i tok.

Ol Bogenvil tisa mas wokim insevis trening

Veronica Hatutasi i raitim

I GAT bikipela nid o as tingting long ol tisa long olgeta level long ol skul long Bogenvil long kisim trening na apgetim save bilong ol, wanpela tisa husat i no laik bai Wantok Niuspepa i putim aut long niuspepa i tok.

Dispela i tok Bogenvil i mas apgetim edukesen sevis bilong em na dispela i karamapim ol tisa husat i mas kisim moa insevis na ol arapela trening. Bikipela lukluk i mas go long ol elementeri tisa na skul.

"Long kamapim gut ol edukesen sevis long provins, em i bikipela samting long apgetim save bilong ol tisa long elementeri level i go antap. Na ol bai lainim gut ol sumatin.

"Long wankain taim tu, ol elementeri tisa i mas kisim moa trening na tu, apgetim save bilong ol. Plantu bilong elementeri skul tisa i no kisim trening na ol i no kwalifaid tisa.

"Tu, long dispela taim, i nogat pemenen kurikulum bilong ol elementeri level skul.

"Moabeta ol elementeri tisa i kisim moa trening na tu, olgeta tisa i mas kisim trening inap long diploma level.

"Olsem em i bikipela samting long ol tisa long olgeta level long Bogenvil long kisim moa trening olsem insevis na ol arapela trening bilong apgetim save bilong ol tisa," tisa i tok olsem.

Em i tok Lahara kos we plantu ol tisa long Bogenvil i bin sindaun long em long las yia krismas i gutpela bikos em i givim sans long ol tisa long apgetim save long wok bilong ol.

Bipo long Bogenvil hevi, ol skul long ailan i save mekim gut tasol nau, dispela i no kamap. Na tisa i tok em i wanpela eria we i autim long ples klia stret olsem ol tisa long ailan i mas kisim moa insevis trening kos.

Long wankain taim tu, tisa i tok wanpela hevi we plantu tisa long ol rurel skul long Bogenvil i bungim em long pe bilong ol.

Em i tok plantu taim, ol tisa i no save kisim potnait peisek bilong ol na dispela i save abrusim plantu mun. Mekim na plantu tisa na ol famili bilong ol i save stap long hevi bikos ol



• Ol skul sumatin long Bogenvil i redi long go long skul. FAIL POTO

i mas gat mani long baim ol samting long go hetim gut laip na sindaun bilong ol.

Em i tok em i hat tru long ol tisa i stap longwe long ol ples skul long go na sekap long ol pei bilong ol long benk bikos long trenspot hevi. Dispela em bikos ol mas peim bikipela mani long ol ka long go long Buka we beng i stap na i go bek gen. Wanpela man i save peim K100 long wanpela we na K200 long i go na i kam long Buka.

Long wankain taim tu, tisa i tok bikhel pasin insait long ol skul i wok long kamap we sampela manki i save dringim hombru.

Em i tok tu olsem pasin bilong kisim spakbrus mariwana i wok long kam insait we sampela skul manki i save smokim mariwana.

Tisa i tok sampela ol spakbrus em sampela lain i save karim i go long ailan long sip na sampela ripot i tok spakbrus i gro long sampela hap bilong ailan.

Em i tok ol polis na ol loman na ol atoriti i mas sekim gut ol sip na pasindia taim ol i kam sua long Buka bris, Buin na Kieta long lukim olsem ol dispela samting nogut i no go long ailan na kamapim lo na oda na sosel hevi.

HIV AIDS woksop givim gut trening

Veronica Hatutasi i raitim

ANGLIKEN Sios long PNG bai holim ol woksop na aweanes trening long HIV AIDS insait long kantri long wanpela mun.

Dispela wok i bin stat long las Sarere na em bai kamap long 4-pela provins we Angliken Sios i gat ol bikipela opis bilong em. Em long Kimbe insait long Wes Nu Briten, Dogura na Tufi Dineri long Milen Be na Oro provins, Newton Kolis long Oro provins, Niugini Ailans na Aipo Rongo Daiosis bai holim woksop long Kefamo insait long Goroka, Isten Hailans na laspela em long Pot Mosbi.

Pater Nicholas Mkaronda bilong Afrika i go pas long dispela program we i bin stat long las Fonde Jenuari 20, em taim we Pater Nicholas i bin kam long PNG. Ol dispela trening woksop bai pinis long Februari 20.

Olgeta 125 kleji o ol pater na bruder wantaim ol bisop bilong ol long olgeta Angliken Sios Daiosis insait long kantri i wok long sindaun long ol trening woksop we bai kamap long tripela de insait long wan wan wik.

Provinsal Projek Opisa wantaim Angliken Sios i tok as tingting long ol dispela trening woksop em long redim ol pater long lidasip wok bilong ol, pastoral na spiritual wok insait long ol komyuniti na ol institusen we sik AIDS i kamapim bikipela bagarap.

Tu, em i bilong kamapim wankain level bilong luksave long HIV AIDS, rot em i kamap, wanem samting i kamapim dispela sik na ol kikkbek bilong dispela sik, luksave long bhain taim bilong dispela binatang bilong HIV AIDS long ol wan wan manmeri, ol famili, komyuniti na nesen long sea long ekspirians bilong Afrika long dispela sik we i bin bagarapim tru kantri.

Tu bilong glasim long sait bilong sios i karamapim tok klia na kamap wantaim sampela tingting long watpo sik ya i kamap, i kalap i go long plantu manmeri na na wanem samting binatang i wokim.

Narapela as tu em long luksave long wanem samting ol i ken mekim long resim aweanes, long stopim, na senisim pasin, lukautim ol lain i stap wantaim sik HIV AIDS, na helpim ol long stap bhainim Positive Living na gutpela laip, serim ol preia, pasin bilong sios long wokim fotu long planim man i dai, liteji material na ol risos na luksave long prektikei, spiritual na pastoral sapos bilong ol pater husat i stap long fron bilong ol HIV/AIDS wok.

Ol kleji, ol bisop, ol pasto na ol woklain bilong sios bai sindaun long ol trening woksop i kamap long ol daiosis het opis insait long ol wan wan provins bilong ol.

Dispela woksop bai helpim tru ol manmeri i go long en na ol pipel i lainim long ol.

Sunami - Ol sapot na helpim i go long Esia

Sri Lanka Komyuniti givim K40,723.48 long helpim

Maisan Pahun i raitim

SRI LANKA Fund Raising Committee i salim 15,000 Swiss Frank (K40,723.48) i go insait long International Federation of Red Cross and Red Crescent societies long helpim hevi long Esia.

Ol Sri Lanka komyuniti long Papua Niugini i bin kamapim bikpela fan resing draiv long helpim ol lain i kisim bagarap long Esia Sunami. Ol i givim helpim mani i go long Red Cross yusim Telegraphic Transfer. Gavana Jenerel (GG) na Patron bilong Red Cross PNG Sir Paulias Matane wantaim het bilong Red Cross PNG opis Mista Ervin Bulathsinghala i bin kamap witnes long dispela na i tok tenkyu i go long ol

PNG Sri Lanka komyuniti.

Long makim maus bilong ol Sri Lanka komyuniti memba Wansantha Kumarasiri na Dush Dahanayake i tok amamas i go long Sir Paulias Matane long kamapim tingting long helpim ol lain i kisim bagarap long sunami.

Mista Kumarasiri na Mista Dahanayake i tok tenkyu tu i go long ol pablik long PNG, ol ogenaísesen, kampani na intanesenel komyuniti insait long kantri long sapotim dispela fan resing wok.

"Na tu spesel tenkyu i go long ol midia haus long karimaut toksave long dispela bagarap sunami i kamapim," Mista Kumarasiri i tok.

Dispela helpim mani (15,000 Swiss Frank) ol i givim i 48

pesent (%) tasol long helpim ples i bagarap. Planti moa plen bilong kamapim fan resing i stap yet inap long Februari long dispela yia.

Olsem na ol dispela fan we bai i kam bihain bai i go long helpim wokim projek olsem klasrum long ol skul na haus bilong ol pikinini i nogat papamama. Olgeta fans na mani Sri Lanka komyuniti ikolektim bai KPMG kampani bai oditim. KPMG Auditors em wanpela kampani husat i voluntia long helpim wok bilong sunami long mani sait na kamapim gutpela rekot long mani ol manmeri i givim.

Dispela mani ol Papua Niugini i givim bai i go long ol kantri sunami i bagarapim long helpim ol lain i stap laip yet. Moa bai i go long helpim ol pikinini i stap long bagarap eria.

Komiti bilong Skate helpim

PABLIK i givim bikpela sapot tru long sunami apil we Sir William Bill Skate i go pas long en long bungim ol mani na helpim, bilong givim i go long ol manmeri i kisim bagarap long Indonesia long Disemba 26, 2004. Wankain tu ol i bungim helpim tu bilong givim i go long ol manmeri bilong Manam husat i bin kisim hevi long bagarap bilong maunten paia long las yia.

Sir Bill Skate i mekim singaut i go long olgeta pipel givim helpim i go yet long ol manmeri long givim helpim i go yet long Nesene! Rilif Apil Kodineting Komiti we Gavman i sanapim long bungim ol helpim bilong ol pipel bilong Papua Niugini.

Ol wok olgeta grup i mekim long bungim ol helpim i no bilong wanpela man o apim nem bilong wanpela man o grup tasol, em i tok.

Dispela em bilong bungim helpim i go long ol brata susa bilong Esia husat i kisim bikpela bagarap long birua bilong solwara o sunami, Sir William Bill Skate i tok.

Sir William i tok Aceh sunami rilif apil i bin kamapim pinis K167,674 kes mani wantaim ol kaikai na kolos we i kos samting olsem K100,000.

Em i mekim bikpela tok amamas i go long ol lain i bin kamapim Nu Yia kaikai na danis bilong Indonesia sunami apil we i bin kamapim bikpela namba bilong mani we i kamap olsem K86,070 kes mani na wanpela bikpela kontena nevi bisket i kam Lae Biscuit kampani.

Ol helpim i go long han bilong Sir William na Indonesia Embeseda Johannes Djopari long Indonesia embesi long Mosbi long dispela wik.

Ol i salim bikpela tok amamas na tenkyu i go tu long Mista Chan, Mista Ng, Misis Kathy Johnstone, Misis Rosa Yip, Misis Loulo Tan na Misis Lena Hanafi long go pas long dispela wok bilong pulim mani na ol kago i go long Aceh apil.

Ol sapot i kam tu long ol bisnis na kampani olsem Brian Bell, Cathay Club Inc. Chin H Min & Sons, DAC Real Estate, Gadens Lawyers, Hourani Diesel, Ivan Lu, Kerewara Ltd, Kwila Insurance Corporation, Nesa PNG Foam, Patricks Transport, PBC Supa Hosel, Super Value Store. Wankain amamas tu i go long ol pipel bilong Papua Niugini long givim sapot bilong ol long kamapim dispela bikpela wok bilong helpim.

Planti manmeri bilong PNG i bin givim gutpela helpim long ol brata susa bilong ol i stap long hevi.

Air Niugini givim K150,000 long sunami bagarap

Insait long kantri planti manmeri long ol wokples, stesen, na taun i bungim ol samting bilong givim i go long Esia Sunami eria na ol Manam pipel long Madang provins. Sampela bisnis haus na ogenaísesen tu i wok long kamapim bikpela helpim long helpim ol lain i kisim bagarap.

Air Niugini balus kampani tu wantaim ol wokman bilong em i bin wari long wanem samting i kamap long Esia Sunami na Manam ailan we maunten i pairap na

bagarapim ol ples na ol laip bilong ol manmeri.

Olsem na olgeta wokmanmeri bilong Air Niugini i bin bungim mani mak olsem K100,000 i go long nesenel Gavman Fanresing Komiti. Aninit long dispela Nesene! Gavman Fanresing Komiti Nesene! Gavman i lukautim olgeta mani i kam long ol pablik na gavman ogenaísesen na bai salim i go long ol lain i helpim long karim aut wok rilif long Saut Is Esia.

Long narapela helpim Air Niugini i givim K50,000 i go long ol pipel long Manam Ailan nau i stap long ol kea senta long bikples Bogia bihain long Maunten i bin pairap na bagarapim ples bilong ol.

Air Niugini i givim dispela mani i go long Caritas PNG.

Caritas em wanpela wol rilif opis bilong Katolik sios we i save helpim ol lain i stap long bagarap long na ol lain i no gat sans long gutpela laip na mekim sindaun bilong ol i gut moa.

TSUNAMI CHARITY CONCERT

Port Moresby Country Club

Saturday 29th January 2005

1pm - 5pm

Featuring:

- * Patti Potts Doi
- * Sounds of Daudai from Daru
- * Klantzman Band
- * Freelancers Band
- * Simply Grooving Band
- * Sri Lankan Dance Group
- * Black Ranzition Band
- * Soul Harmony
- * Straky
- * Ojamu
- * Eddie's Blues Band
- * X-Tensions Band
- * Junior Souls
- * Tamariki Dance Group
- * Kimmora Dance Group
- * Siale Dance Troupe

Come along to help those who have suffered from the tsunami through the spirit of music

Adults
K15.00

Children
K5.00

All proceeds to:
PNG Red Cross and Sri Lankan Community Tsunami Appeal

A Community initiative of:



Supported by members of Media Council of PNG



Tingim tu Madang Ramu Haiwe

Ol tisa i longlong bihainim lamsam Disemba 2004

Dia Edita,

Mi sem na les liklik long pasin bilong mipela ol tisa bilong PNG. Mi lukluk raun long Hagen, Banz, Minj, Simbu na ol ples olsem taim olgeta tisa long PNG i kisim holide pe bilong mipela, ai yo, man i no save kaikai bual, spak, smok, danis na toktok long pablik i mekim save stret long mekim ol dispela ol samting.

Ol tisa, em wanem kain nau ya? Dispela i gutpela pasin o nogat? Plis bihain taim yumi noken mekim olsem. Ol pikinini bai lukim na bihainim wankain pasin ya. Mi sem tru.

**MATT DEDEBOH HOLEYAH
JIWAKA TISA DALAKI**

Ritim gut Baibel na kisim gut save

Dia Edita,

Long mun Novemba 11-17 2004 mi ritim wanpela pas bilong brata John Lumbu long Lae i raitim long *Wantok Niuspepa*, em i bin tok aut long de sabat na Sande.

Insait long pas bilong en, seken hap em tok olsem ol lain i save lotu long sabat tasol bai go long Heven bikos ol i save holim na strongim sabat.

Brata, mi laik tokim yu stret yu no inap painim wanpela singel teks insait long Baibel long Buk Gen Rev bai toktok long dispela, nogat tru.

Olsem yu bin tok long (Matyu 5:8) Jisas bai lukluk tasol long bel bilong manmeri na ol i gat pasin bilong Jisas o bel bilong ol i klin.

Em tasol bai go long Heven. Yu no ken toktok beksait long arapela sios, bilip bilong yumi tasol bai skelim.

Long namba tri lain bilong brata John i givim sampela Baibel teks olsem, Matyu 12:1-14, Mak 2:23-28, 3:1-6, Luk 6:1-11.

Brata i luk olsem yu yet i no save ritim ol dispela Baibel teks gut. Sapos yu sindaun na ritim gut, yu inap long luksave ya.

Long kliaim tingting bilong yu long Buk Kolosians 2:16-23 Jisas olgeta taim i save stap long rait sait o save rait na fea olgeta taim.

Olsem na ol perisi i traim tru long painim asua o rong long Jisas. Yumi no ken paolim ol manmeri wantaim giaman toktok na asua.

Narapela yu tok olsem dai bilong Jisas em i pinisim sabat na wokim nupela kontrak na yu tok olsem Sande

em nupela kontrak bilong Jisas na tu yu tok God salim Jisas i kam daun long pinisim nupela kontrak.

Brata, i luk olsem tru tru yu no save ritim Baibel gut o pasta bilong yu i haitim tok tru long yu.

Inap yu lusim dispela ples nau yu stap long en na mi laikim yu pre wantaim bel bilong yu long God na God bai givim yu spirit bilong rit na luksave long buk Baibel na em bai givim yu dispela tingting bilong luksave.

Plis yu ritim dispela teks Matyu 5:17-19 na em bai givim yu klia tingting long nupela na olpela kontrak yu bin toktok long en.

Narapela, dai bilong Jisas em i no brukim laplap long tempel i kam daun long graun olsem yu bin tok. Matyu 15:38 i tok olsem laplap hangamap long tempel i bruk namel.

Yu kisim dispela toktok long we, maski long paolim ol manmeri bilong God. Laspela yumi no ken paolim ol manmeri bilong God bikos Baibel i tokim yumi klia olsem wanem yumi planim em bai yu kisim.

Olsem na brata lukaut gut long ol toktok yu tokim na moabeta yumi stadim Baibel gut.

**KOIS KAUPA
YONKI
ISTEN HAILANS
PROVINS**

Dia Edita,

Mi wanpela manki Kobon insait long Simbai distrik long Madang provins. Dispela em i namba tu taim bilong mi long kisim maus bilong pipel long distrik na rait i kam long *Wantok Niuspepa*.

Wari bilong mipela i go olsem, mipela tingting planti long Madang Provinsel Gavman i no tingim moa ol pipel long distrik. Planti yia i go pinis, na ol memba givim baksait long mipela olgeta. Mipela pipel i makim ol lida bilong karim hevi bilong pipel na developim distrik tasol ol lida i no mekim wok bilong ol.

Mipela laikim wanpela bikpela samting em Madang Ramu nesanel haiwe na bris bilong Wara Ramu. Hia em i strongpela singaut bilong pipel i go long Open Memba Ben Semri, Madang Provinsel Gavman na Nesanel Gavman long ol i mas lukluk stretim Midel Ramu Haiwe wantaim Wara Ramu bris.

Mipela laikim wok bilong rot mas stat long dispela yia 2005 na yia i kam.

Nesanel Gavman i fandim K3.3 milien kina long rot projek insait long Midel Ramu Distrik tasol mipela skelim dispela mani i no inap long rot projek. Mipela i laikim 20 i go antap long 50 milien kina inap long wokim na pinisim nupela rot projek.

Mipela i ken wokim ol liklik wok bisnis na lukautim mipela yet. Tasol wanpela samting i pasim rot bilong kisim sevis, em bikpela problem em rot trenspot tasol. Olsem na mipela toktok planti long ol lida long karim ol hevi bilong ol trangu pipel na stretim bel wari bilong ol.

Ol lida long gavman ol i bin tok promis long mipela long planti samting, tasol ol i no mekim wok bilong ol na inapim dispela ol tok promis bilong ol. Hia em i askim bilong mipela. Mipela pipel makim ol lida long pait hat long palamen na bringim sevis i kam long distrik.

Tasol yupela ol lida i no mekim wok bilong yupela. Yupela slip nating long palamen na pairap olsem dram na nogat

kaikai bilong em. Yupela kamap lida long tingim pipel o dringim kap ti long palamen. Yupela husat ol lida slip nambaut na i no mekim wok bilong yupela. Yupela mas kirap na mekim wok bilong yupela na inapim ol laik bilong ol pipel.

Mi pikinini ples, mi no amamas wantaim ol lida bilong gavman bikos ol i givim baksait long ol pipel long independens i kam inap nau. Mipela i no pipel bilong Fiji, mipela i no pipel bilong Vanuatu o mipela i no pipel bilong Solomon Ailans. Mipela bilong Papua Niugini stret na bilong wanem na gavman lus tingting long ol Simbai pipel? Bai yupela mekim wanem samting na bai pipel i amamas wantaim yupela ol lida? Save na tingting i stap long yupela yet.

**SIMON BIDIK KOBON
SIMBAI
MADANG PROVINS**



Mambu
... Mekim save long winim mambu long Mambu na Garamut Festival long Is Sepik provins las yia. Dispela festival we i bin kamap namba wan taim, i bin kamap tu long Independens long amamasim dispela de na planti manmeri husat i bin i go long lukim dispela festival i bin amamas long kala na kalsa we i bin kamap.
Foto: BIG JOE

Bilip long Jisas Krai tasol em rot

Dia Edita,

Mi laik bekim pas bilong Kulina Nane bilong Lae, Morobe provins i bin kamap long *Wantok Niuspepa* Disemba 9-16, 2004. Het tok em i rait olsem "As yumi save long kaikai" Taim em i sapatim pas bilong lapun Peter Nan, Avi Blok, Westen Hailans provins na bekim pas bilong Mista PI long Lorengau.

Mi bin ritim tripela pas olgeta long *Wantok Niuspepa* na mi skelim olsem; pas bilong tupela lapun Peter wantaim Kulina sut stret na toktok long kaikai abus o pik mit. Na pas bilong brata PI em i olsem, yumi mas bilip long Jisas Krai tasol na bai God i kisim bek yumi na givim yumi laip i stap gut oltaim. Na em i tokim Lapun Peter taim em i bekim pas bilong em, sampela gutpela poin brata PI i mekim, emi klia tru olsem dispela pasin bilong kaikai abus klin na i no klin, em i namel long Israel na God tasol. Na i no yumi Jiu lain olsem PNG, tripela man i tokaut long tupela kain bilip. Tambuim kaikai pik mit bilip na bilip long Bikpela Jisas Krai tasol.

Bilip bilong Peter na Kulina olsem taim yumi kaikai pik mit, bai yumi kamap doti long ai bilong God na heven tu. Bikos pik em i no klinpela enimol laka! Kulina em i bilip kaikai ol frut tasol na i stap gut na klin olsem Adam na lv long gaden Iden. Tupela i kaikai frut na dring wara tasol. Na

em i tok long ol enset long Heven tu. Tasol wanpela samting tasol em i no tokaut klia olsem nau mi i stap long gaden Iden o heven wantaim ol enset na mi kaikai frut tasol i stap, nogat. Mi ritim pas bilong em, em i stap long Lae. Lae em i Gaden Iden, Heven o PNG? Tasol brata PI em i bilip long Bikpela Jisas Krai tasol na God em i save tekewe sin bilong yumi long blut bilong Jisas Krai na bai yumi kamap klin long ai bilong God.

Dispela tupela bilip i soim yumi ples klia tru olsem, men made o home made bilip na bilip tru femenen Baibel bilip olsem God em yet i tok long en.

Nogut yumi tok pait nating. Yumi mas i go long God yet Holi Baibel long Jon 3:16 na larim em yet i tokim yumi wanem bilip em i tru na wanem bilip em i giaman. Yumi olgeta ritim Jon 3:16. God i gat wanpela pikinini tasol i stap. Tasol God i laikim tumas olgeta manmeri bilong graun olsem na em i givim dispela wanpela pikinini long ol. Em i mekim olsem bilong olgeta manmeri i bilip long em ol i no ken lus nogat, bai ol i kisim laip i stap gut oltaim oltaim. God em yet i tokaut long dispela ves 16. Olgeta manmeri husat i bilip long pikinini bilong God Jisas Krai bai ol i kisim laip oltaim. Em i no tok olsem olgeta manmeri i no kaikai pik mit o kipim de sabat o bihainim 10-pela lo o kaikai frut tasol bai ol i kisim laip i stap gut oltaim

nogat ya.
Dispela kain bilip ol i kolim home made o men made bilip. Bilip tru i stap long tok tru bilong God yet. Em i tok pinis man i bilip long Jisas Krai Bikpela tasol. Olsem brata PI em i bilip na em i tokaut long bilip bilong em. Olsem Baibel i tok long Rom 10:11. Man i bilip (Jisas) em bai em i no kisim sem. Yumi i go long God yet long tupela Baibel ves moa na larim em yet i tokim yumi. Wanem samting i save mekim yumi kamap klin long ai bilong Holi na Hevenli God em yet. Ritim Ef 1:7 na 1 Jon1:7-9. Dispela Baibel ves em yet tokaut ples klia tru. Blut bilong Jisas Krai tasol em i save baim bek yumi na tekewe olgeta sin bilong yumi na mekim yumi kamap klin long ai bilong Holi God. Kulina Nane yu tambuim pik mit na kaikai frut tasol, dispela i no mekim yu i kamap klin long ai bilong God. Yu tanim bel long sin pasin bilong yu na bilip long Bikpela Jisas Krai bai God i kisim yu na wasim sin bilong yu. Planti manmeri ol i bin kaikai pik mit pinis na planti i no kaikai pik mit tu olgeta i stap long heven wantaim God (Jon 14:1-3). Bilong wanem? Bikos ol i bilip long Jisas tasol. Jon 14:6.

**PETER KELO
KAINANTU
ISTEN HAILANS PROVINS**

WANTOK
KOMENTRI

Rot bilong AIDS i op long kilim PNG

Papua Niugini i gat bikpela rekot long pasin bilong paitim meri na bagarapim meri na tu pasin pamuk i bikpela hia long PNG. Dispela em rekot ol saveman i mekim stadi na painimaut.

Long ol asples nau em sik AIDS i go bikpela pinis bikos pasin bilong i go i kam long taun na arapela provins i opim rot long sik nogut ya i go insait long ol asples. Narapela as tu sik AIDS bai kamap bikpela long ol asples em ol kampani na bisnis i kamap long ples olsem maining, timba kampani na arapela bisnis projek we i save kisim ol wokman i kam long arapela hap provins na taun we ol inap karim sik nogut ya i kam givim ol meri bilong ples. Bikos ol meri bilong ples bai seksek long ol wokman bilong ol dispela kampani long prenim ol na ol bai inap kisim sik AIDS na go bek givim long ples.

Dokta Hunter i tok pasin bilong ol man na meri long i laik pren o pamuk i wankain tasol. Planti meri i gat planti poroman bikos ol i laik slip wantaim ol long kism mani. Planti man tu i laik amamas tasol na planti yangpela meri nau i mekim pamuk pasin olsem wok, ripot bilong Dokta Hunter i tok.

Dokta Hunter i tok tu olsem Papua Niugini i gat bikpela nem long pasin bilong pait na bagarapim o reipim ol meri.

Insait long rekot bilong ol arapela kantri long Pasifik na wol tu, PNG i gat dispela bikpela nem nogut. Long sampela ples taim man i paitim meri em yumi tok em skul pasin. Long PNG i gat planti pait pasin i save kamap long long ples na taun taun na ol pikinini i save lukim ol dispela pasin na kisim save long en we ol tu inap surukim pasin pait yet taim ol i bikpela. Pasin bilong holim na bagarapim ol meri o reip em bikpela tru long PNG.

Em i tok ol dispela pasin i kamap bikos wok panimaut bilong ol tu i soim olsem ol tida long ples na komyuniti nau i no gat strong moa olsem bipo. Ol manmeri tude i bikhet moa na sakim lo na oda o kastom bilong ples na komyuniti. Narapela tu em em atoriti bilong gavman long daunim hevi bilong lo na oda na ol pasin nogut o trabel nabaut tu i no wok gut moa.

Olsem na wantaim ol kainkain hevi na trabel ol pipel i save mekim tude bai mekim isi tru long sik AIDS bai karamapim olgeta na bagarapim planti tausen manmeri tru, Dokta Hunter i tok.



JADA 27/01/05

Gan pretim fridom bilong mipela

LO bilong tambuim sotgan i wok long kisim bikpela sapot long planti pipel na wanpela komiti nau i go pas long strongim dispela lo insait long kantri.

Nesenel Gan Kontrol Komiti bai kirapim wanpela bikpela wok bilong ol liklik taim long toktok long ol pipol long pasin bilong holim na yusim ol gan.

Siaman bilong komiti, olpela jenerol bilong PNGDF, Jerry Singirok na ol i redi long opim program bilong ol long Goroka long Jun.

Pasin bilong holim gan na yusim long rot nogut em i no gutpela na i save bagarapim sindaun bilong planti manmeri bilong PNG na ausait wantaim na sapos i nogat wanpela samting i kamap long stretim dispela, em bai bagarapim kantri.

Ol ripot i kam long Polis i soim olsem planti bilong ol bikpela trabol i save gat ol man i yusim gan long wokim olsem am hol ap, roberi, rep, kilim man na brukim haus na stil.

Dispela kain samting i save bagarapim ikonomi bilong kantri, ol bisnis na ol manmeri tu i save kisim taim.



TOK PISIN
wantaim
PETER MAIME

Pasin bilong holim gan na yusim long rot nogut i no gutpela long kantri na bai i no inap helpim kantri long kisim ol foren investa o ol lain ausait long kantri husat i laik putim mani i kam insait long kantri, i no gutpela long tred na sekyuriti bilong ol pipol tu.

Dispela ekseksais o progrem ol bai bihainim em i nambawan taim stret we ol bai lukluk i go insait moa na wokim moa wok painim aut long pasin bilong holim na yusim gan long rot nogut na ol bai i lukluk tu long ol rot bilong daunim dispela ol pasin. Em i taim nau long eksen i kamap long dispela bikpela hevi we planti pipel i save stap wantaim pret long laip na sindaun bilong ol.

Em i stap long pasin bilong wanwan manmeri olsem na mipela i mas traime na stretim.

Ol pipol i mas givim tingting bilong ol long ol pasin bilong yusim gan na ol i ken toktok wantaim komiti taim komiti i raun long ol provins na mekim wok long toktok long dispela o taim ol i kamap long tok bek so long radio.


Dispela ol lain husait i save yusim gan long wokim ol bikhet pasin tu i ken toktok wantaim komiti long wanem as tru ol i save mekim dispela kain ol pasin.

Dispela komiti i kisim pinis planti toktok na tingting bilong ol pipol i stap wantaim ol tasol ol i laikim sampela moa i kam long ol pipol long olgeta hap na levul bilong komyuniti long helpim wok bilong ol olsem na mipela olgeta i mas givim tingting bilong mipela long dispela birua samting.

Yumi olgeta i save olsem gan em birua samting we i save kisim laip bilong ol manmeri na pretim laip bilong ol manmeri. Olsem na yumi mas strong long rausim dispela birua samting bai komyuniti i ken stap gut na wokabaut bilong yumi i ken fri i go i kam.

Manmeri laikim eksen lida long 2005

Bilong wanem na i gat nid long Lidasip: Lidasip i no samting we man i holim long bilasim em yet long namba na biknem we bai em i ken pilim gut olsem yet i go moa. As tru bilong man o meri i kamap Lida em long kamapim samting na impruvim laip na sindaun bilong pipel i go long mak we yu inap long kamapim. Long kamapim sampela kain wok long inapim nid bilong ol manmeri na i no bilong bosim nara-



OL PRINSIPOL BILONG GUTPELA LIDA
wantaim
Pastor na Evangelist
OHARE JABERE

pela manmeri. I no bilong yu ken holim pawa na kisim gutpela samting long yu yet. Lidasip yu holim em long bai yu ken kamapim sampela kain wok i kamap ples klia. Sampela kain visen na

plen bilong yu i ken kamap ples klia taim yu wok hat long implimentim ol polisi na visen bilong yu.

Na Lidasip i stap long kamapim wok bilong God hia long Papua Niugini. Bihainim laik

bilong God long wok misin na ivenjelisim long bringim moa manmeri i kam insait long Kingdom bilong God, long kamapim laik bilong God hia long graun bilong yumi Papua Niugini long bringim manmeri i kam klostu long God na bai ol i ken lotu tru long God long Spirit na long pasin i tru.

Long Papua Niugini i gat planti manmeri i tingting planti na i laik save wanem kain man-

meri i mas i kamap Lida stiaim kantri bilong yumi.

Na long sios tu, ol manmeri i laik painim ol gutpela Lida bilong strongim sios na kantri. Long Baibel, Bikpela Jisas Kraus i tok yumi mas was gut bai yumi makim ol gutpela manmeri tasol i kamap Lida. Dispela Wantok Niuspepa komentri i ken helpim yu save olsem Lida em i wanem kain man tru tru.

WANTOK

Published Weekly, Wednesday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: 325 2500
Fax: 325 2579
Email: word@global.net.pg

Pe bilong wanpela yia
52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager
Justin Hansu Kili

Editor
Yakam Kelo

Published by Jeremy Burgess and printed by Pacific Star P.O. Box 6817 Boroko NCD at allotment 13 section 38 Waigani drive, Port Moresby

Word Publishing Company limited is owned by the four major churches of Papua New Guinea- Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.

WOL NIUS WOL NIUS WOL NIUS WOL NIUS



WOL NIUS WOL NIUS WOL NIUS WOL NIUS



Polis Sekyuriti

Palestina:
Ol polis opita bilong Palestain i sanap was antap long wanpela trak wantaim masin gan. Ol i wok osem sekjurit taim Palestinian Authority i bin laik brukin sampela biding i go down long namba rot long Gaza Sit, long Tunde, Jenuari 25, 2005.
Foto: AP/LETTERIS PITARAKIS



Was Gut

Irak:
Wanpela soldia bilong Amerika i was long wanpela man Irak ol i bin hollin pasim taim ol i patrol long wanpela hap long siti i go long rot bilong Irak, Mosul. Ol i blip osem dispala man i bin laik kamapim sampela birua o i save wok bung wantaim ol pahman husat i save kamapim ol birua. *Foto: AFP/MAURICIO LIMA*

Em Nau



Australia:
Meri Rasia husat i namba 4 top tenis pilala long wol, Maria Sharapova, i paitim bel long wanpela gem em i bin pilal egensim Svetlana Kuznetsova, wanpela meri Rasia tu, long Australian Open tenis resis long Melbon, Australia long Jenuari 25, 2005.
Foto: STEVE CRISP/REUTERS



Mekim Musik

Brazil:
Ol man i pilal musik klotu long hap we World Social Forum (wol sosef kibung) i wok long kamap long fran bilong wana Guialba long Porto Alegre, long Jenuari 24, 2005. Wol Social Forum i wanpela kibung we ol grup bilong shif sosef, husat i save egensim tingting o bilip bilong neo-liberalism, i ken bung long pahman tek long ol tingting, kamapim ol askim, na toktok long ol ekspition bilong ol. *Foto: REUTERS/MARIANA BAZO*



Ol Soldia Kisim Sas

Myanmar:
Bipela memba bilong United Wa State Arm (UWSA) long Myanmar i kisin sas long wanpela kot long Amerika, bilala long kot i pahimaut osem ol i bin bosim wanpela bikpela grup we i save mekim na salim heroin, wanpela drag we i ken bagarapim man husat i kisin. Long foto em sampela UWSA soldia.
Foto: AFP/AL/EMMANUEL DUNAND



Wok Kempen

Irak:
Wanpela man Irak husat i mekim wok bilong kempen, i hangampim ol belawa opita bilong Adrian Pineda, wanpela bikpela politosen bilong Irak husat na dipela foren rihara bilong ol long Baghdad long Jenuari 24, 2004.
Foto: REUTERS/ALI JASIM



Makim

Israel:
Wanpela solida bilong Israel i makim gan bilong em long wanpela operesen long siti long West Bank, Nablus.
Foto: AFP/JAAFAR ASHTIVEH

WOL NIUS WOL NIUS WOL NIUS WOL NIUS



Painim

Sri Lanka:
Wanpela mun bihain long sunami birua i bin kamap long Sri Lanka, guria bilong ol man long we dispela guria i bin kamap i pinis na ol i stat long raun painim ol samting we ol i ken yusim o salim namel long ol pipia we dispela birua i bin kamapim.
Poto: AFP/PRAKASH SINGH



Beten

Sri Lanka:
Wanpela man husat i no bin dai long sunami i beten long wanpela Buddhist tempol long Sri Lanka.
Poto: AFP/PRAKASH SINGH



Hevi

Indonesia:
Wanpela mari Aceh na bambuna mari bilong em i wokabout namel long ol haus i bin bin bagarap long sunami long plex Lamauweh long ni bilong Banda Aceh. *Poto: REUTERS/SUPRI*



Nogat Haus

Sri Lanka:
Ol dispela pikinini Sri Lanka i nogat haus bihain long sunami i bagarapim plus bilong ol na ol i wak long stap long wanpela kam. Long dispela poto ol i wak long painim plus long amamasim ol yak. *Poto: AFP/PRAKASH SINGH*




Kaikai

Indonesia:
Wanpela boi bilong Aceh i putim kaikai bilong em we i kam long ol eid lain i go bek insait long wanpela plastik beg long refuji kam long sili we sunami i bin bagarapim tru, Banda Aceh long allan bilong Sumatra long Indonesia.
Poto: REUTERS/KHIMASA MAYANA



Lus

Sri Lanka:
Wanpela posta (pepa long wol) i som toksave na piksa bilong sampela braiz na husat i bin lus long taim bilong sunami. *Poto: AFP/PRAKASH SINGH*



Bilip I Stap

Thailand:
Wanpela turis i waswas long nambis long taim san i go daun long Phuket, Thailand, hap we sunami i bin bagarapim tu. I gat bilip olsem laip i bai orait gen. *Poto: AFP/FAH/SAEED KHAN*

Stori bilong wanpela man husat i save salim ol ston bilong bus bilong em we sampela bilong ol i gat pes bilong ol man, sampela i gat bilong man na meri na sampela moa i gat piksa bilong man, meri na pikinini wantaim.

Salim ston em hap wok bilong Teine

Arthur-Louis Kengoa i raitim

SAPOS yu save stap long Mosbi siti, ating yu bin go long Tabari pinis. Em hap ples long Boroko klostu long bas stop we ol manmeri i save salim bilum, banara na spia, basket, ston akis (tamiok) na ol kain kain samting bilong yumi ol Papua Niugini stret.

Ating sapos yu bin i gat taim long sindaun liklik na stori wantaim sampela bilong ol dispela maket lain, bai yu lainim sampela samting o kisim sampela tingting we i gutpela long laip bilong yu.

Long namba 11 mun bilong yia i go pinis (2004), wanpela man Hailans i bin kam long Mosbi. Tasol em i no bin go raun nating nating long olgeta hap bilong siti. Em bin sindaun olgeta de bilong mun Novemba na Disemba long 2004 long Tabari tasol.

Man ya bilong ples Nondugl, em long boda bilong Westen Hailans na Simbu Provins. Taim Sylvester Teine bin flai long Air Niugini balus i kam long Mosbi, em bin putim insait long bek bilong em ol sampela kain ston.

Ol dispela ston i no ol ston nating. Nogat tru! Ol i gat bikpela wok long laip bilong Sylvester na famili bilong em, olsem em yet i autim stori bilong em long *Wantok Niuspepa*.

"Mi save salim ol dispela ston na lukautim famili bilong mi na baim sukul pi (skul fi) bilong ol pikinini bilong mi. Wanpela pikinini bilong mi em i wok (moni) pinis na nau em helpim ol liklik bilong em. Tasol mi noken wetim em, mi mas go het yet long mekim dispela wok.

"Mi statim dispela wok long yia 1980 long ples bilong mi yet, em Nondugl. Mi save salim long Goroka So na Hagen So na Lae So. Na tu mi save salim long Nesenel Musiem (National Museum)," Sylvester i tok.

Ol ston bilong Sylvester i narakain olgeta. Ol i gat pes bilong ol man long en. Sampela ston i gat pes bilong wanpela man tasol.

Ol narapela ston i gat pes bilong man na meri. Na ol narapela ston i gat pes bilong man, meri na pikinini (olsem wanpela famili).

Sylvester i tok olsem em bin statim dispela wok bilong salim ol ston taim em lukim olsem ol i no wankain olsem ol narapela ston - "ol i gat pes bilong man. Em bikpela samting tru." Na taim em statim dispela wok, em kisim ol ston long tupela bikpela hul bilong ston.

Wanpela em long Maunten Polamb long Nondugl yet na narapela em hapsait tasol long Jimi. Em tok dispela hul bilong ston long Jimi em Aipe Ku. Sylvester tok olsem long kisim ol dispela ston, em bin stretim long pasin bilong ples olsem bai wanbel i ken stap olgeta taim.

Olsem na ol lain i laik baim ston, ol i no save baim tasol bikos i gat gutpela kala o stail. Ol i save askim pastaim.

"Ol kainkain lain i save baim. Ol Papua Niugini, o waitman na ol Siapan (Japanese) tu.

"Planti man laik baim ol save askim pastaim - ol kain askim olsem: Yu kisim long we? Em ol wanem kain ston? Bilong wanem yu mekim olsem? Ol i no save baim nating.



• Ol kain ston we i gat pes bilong man, meri na pikinini em Sylvester i save painim long bus bilong em long Jimi, Westen Hailans provins. Ol Foto: ARTHUR-LOUIS KENGOA



• Salim ston i helpim gut tru Sylvester long stap bilong em na famili bilong em.

Nogat tru."

"Ol ston i gat pes bilong man na mi no save senisim. Nogat, mi save salim olsem mi kisim long en. Ol man i save laikim olsem."

Tasol pasin bilong ol narapela manmeri i no gutpela tumas. I gat ol lain husat i save lap long Sylvester o tok baksait long em.

Tasol ol dispela kain pasin em liklik samting tumas long Sylvester. Em i no save wari o tingting planti long dispela.

Em i tok dispela em 'liklik toktok' na 'liklik tingting' tasol bilong ol man. Kalkai bilong dispela wok i bikpela tumas.

"Long dispela wok tasol na long moni bilong dispela wok na mi baim skul fi bilong ol manki.

"Wanpela nau wok long Elkom (PNG Pawa), narapela em bodi bilda (pilai sports bilong kamapim bodi o masol long bodi) em Johnny Glen Teine, narapela pinisim gret 10 na marit na narapela i mekim gret 11. Las pikinini i stap yet long skul long ples."

"Planti lain i save lap long mi tasol mi amamas taim mi lukim ol turis na ol Siapan na waitman i baim na givim mi mani.

Ol dispela lain i no inap givim mi mani o helpim mi. Mi mas helpim mi yet na famili bilong mi."

Moa yet Sylvester i tok olsem sin-

daun bilong ol man long ples na long siti o ol taun i wankain tasol

Em olsem i gat bagaras na hevi long olgeta hap, long ples na long taun. Ol kain hevi bilong developmen, rot bilong mekim o kamapim mani, na long sindaun bilong ol famili.

Olsem na Sylvester i tok wanwan man na meri imas traim long halivim em yet na famili bilong em.

"Nau em i no gutpela taim. I gat hevi long ples na tu i gat hevi long siti. Yumi yet mas painim wei long lukautim yumi yet."


"Mi save salim ol ston long K500 tasol taim ol givim K150 o K200 mi wanbel na kisim tasol. Nau i no gutpela taim na mi no inap long kisim ol dispela ston i go bek long ples."

Ples Nondugl i longwe long Mosbi siti, tasol long wanem liklik save na tingting em i gat, Sylvester i soim olsem long dispela taim bilong planti hevi, yumi olgeta i ken stap gut na kantri bai i ken go het yet.

Em sapos yumi yusim tingting na save yumi gat pinis long en, maski sapos yumi no bin go long skul."

Olsem tasol na sapos yu save stap long Mosbi siti, orait sapos yu go long Tabari wanpela taim long dispela yia, traim sindaun na tok pisin wantaim sampela ol wantok bilong yumi.

Tru tumas, bai yu kisim sampela gutpela tingting na sampela gutpela save, olsem mi bin kisim long Sylvester.



OL MUWI LONG MOSBI ATS TIETA:

Sapos yu stap long Mosbi Siti na yu laik lukim muvi piksa long bikpela vidio skrin, raun i go long Mosbi Ats Tieta long Waigani na lukim ol dispela piksa long Sarere, Jenuari 29:

12 kilok apinun

FUNGUS THE BOGEYMAN

Gutpela muvi bilong ol pikinini. Fungus em nem bilong wanpela kain tewel man i save pretim ol pikinini. Em i laik poretim ol manmeri na em i pulim i go daun long ples bilong em.

2 kilok apinun

ALIEN VS PREDATOR

Tupela bikpela samting nogut ya em tupela alien. Ol bai bung na pait. Insait long dispela muvi, ol saintis i painim wanpela bikpela pyramid long Antarctica na dispela tupela lain i wok long pait i stap.

Oshen- 'Rising Son' bilong Papua Niugini

Didi Meri i raitim

LONG ol naispela grin maunten wara bilong Finsafen i go daun long waitpela wesana nambis bilong Hawaii, Jason Hershey i stap long lewa bilong olgeta manmeri.

Planti i save long arapela nem bilong em, 'Oshen' na em yet em i wanpela Allan Warrior husat i wok long pait long makim ol bilip bilong em insait long musik.

Nau yet manki Finsch ya i stap raun insait long kantri long promotim namba 5 albam bilong em, 'Rising Son'.

Em i skin kirap long kam bek long ples na i wok long amamas long san na liklik ren tu. Narapela bikpela samting em i amamasim stap em ol kaikai bilong PNG yet we em i no save lus ting long en.

Em taim em i gat fri taim, em i save mekim ol dispela samting.

Tasol pastaim, em i bin go bek long Finsafen na stap long hap inap long tripela wik bilong stap wantaim famili bilong em.

Em i no guria long go bek long Hawaii na em bai stap bek long hia inap long mun Epril.

Olsem na noken wari, bai yu gat sans long lukim em yet.

Toksave i kam long ol lain bilong em i tok olsem Chin H Meen bai kamapim wanpela musik konsert wantaim Oshen yet. Olsem na sapos yu save indai kirap long dispela stail manki, putim iau na lukluk tasol long niuspepa long taim ol i makim bilong dispela musik konsert.

Dispela nupela albam bilong em i gat ol singsing olsem "Dynamite" wanpela singsing bilong wanpela rap musik grup bilong Hawaii yet ol i kolim ol 'Sudden Rush' na Laka Carpenter bilong Sharpnote Records long Honolulu. Em i gat wanpela nupela kain pairap na i Oshen yet i putim liklik stail bilong em bihain long em i bin stap long Jamaica.


Wanpela hap singsing long dispela nupela albam tu we bai i ken tanim tang bilong yu, em "Saltwater Anthem" o singsing bilong solwara.

Dispela singsing em i wanpela singsing tumbuna bilong Hawaii, tasol Oshen na Laka Carpenter i tanim na tromoi 7-pela tokples i go insait. Ol tok ples em Hawaii, Tahiti, Tonga, Samoa, Fiji, PNG na tok Inglis yet.

Tasol em i kisim nem 'Rising Son' bilong dispela nupela albam i kam long wanem hap?

Oshen yet i tok olsem dispela nem i soim olsem em yet i wok long groa olsem wanpela musik atis na em i pikinini tru bilong Pasifik.

Em i tru, musik na nem bilong Oshen i bikpela



• Manki nogut bilong Finsafen, Jason Hershey husat ol man i save kolim Oshen, bai kamapim nupela albam.

insait long Pasifik pinis, na hap bilong singsing bilong em 'Throw Away The Gun' i bin stap insait long wanpela bikpela muvi long Amerika '50 First Dates' we tupela biknem ekta bilong US, Adam Sandler na Drew Barrymore i bin mekim long Hawaii.

Planti moa singsing bilong em i wok long kamap insait long ol TV so long Hawaii.

Oshen i salim wanpela tok i go long olgeta man-

meri i laikim musik bilong em olsem em i mekim musik bilong yupela tasol.

Em i wok long mekim dispela na makim Papua Niugini olsem wanpela gutpela embeseda long musik bilong em tasol.

Oshen i tok, "Sanap strong long pasin tumbuna bilong yu na kalsa bilong ol. Bel isi, laikim arapeta na onaim ol arapeta em i stretpela pasin. Mi bai mekim ol dispela samting i go long taim yet.

SEKIM TV LONG DISPELA WIK.

8.30PM - FRAIDE NAIT MUWI - THE QUEST

Jean Claude Van Damme i stap insait long dispela muvi. Taim em i yangpela manki yet, em i save stil nabaut long strit. Bihain long em i kalap hait long wanpela sip kepten i painim em na em i wok long sip. Tasol i no long taim na ol arapela lain i kisim em i go long wanpela ailan na salim em olsem wanpela pait man.



8.30PM - TRINDE NAIT - QUARANTINE

Ol teroris man nogut i traim wanpela kain sik bilong kilim man long wanpela liklik ples na ol i kilim olgeta manmeri. Presiden bilong Amerika i go pas long ol saintis long painim wanpela marasin bilong dispela sik. Ol i mas painim kwiktaim nogut dispela sik i kilim dai olgeta manmeri long wol.



Ben promotim rait bilong ol pikinini

DISPELA grup i bin kamap insait long musik indastri wantaim wanpela bikpela as tingting na em bilong strongim kempen egensim pasin bilong maritime ol yangpela. Dispela toktok em ol i tromoi insait long musik ol ben memba yet i raitim.

Ol yangpela memba bilong dispela ben i bilip olsem olgeta marit bilong ol yangpela we papamama i save makim long ples i save kamapim kainkain hevi long bihain taim na ol pikinini bilong ol i kamap bihain i save karim bikpela pen nating.

"Planti long ol yangpela manmeri nau husat i save marit taim ol i yangpela tumas yet i nogat plen na i nogat eksperiens long ol salens i save stap insait long famili na marit laip," Chique M. Kuks, lid singa bilong Pikinini Black Bokiss, wanpela nupela musik ben i kam long Raikos long Madang provins.

Chique i bin i kam sindaun long opis bilong las wik, na em i stori, "Ol dispela yangpela marit aninit long 20 krismas i save kamapim kainkain hevi na ol liklik pikinini i save kamap na i save painim bikpela hevi tru. Ol i nogat gutpela kaikai, nogat skul na ol pikinini i save stap nating bilong wanem ol yangpela papamama i no inap painim inap mani long lukautim ol gut."

Chique i tok ol yangpela meri husat i nogat strong i save karim hevi olgeta taim

bilong wanem ol marit bihainim pasin tumbuna i wok long makim ol nating, na ben bilong em i no laikim stret dispela kain pasin bilong wanem i save bagarapim ol rait bilong ol meri long tok nogat.



Pikinini Black Bokiss i kamaut wantaim namba wan albam bilong ol, 'Lusim Ples', wanpela projek we ol i stretim insait long 6-pela yia olgeta. Ol dispela manki Raikos i bin makim rot bilong musik bilong ol stat long 1998 yet long painim rot bilong mekim samting long laip bilong ol.

Nem bilong albam yet i makim laip bilong ol manki taim ol i yangpela yet. Taim ol i lusim ples na ol papamama na i go raun nating.

Bihain long ol i skul long Raikos Hai Skul, ol i bungim wanpela bikpela askim tru. Bai ol i go we nau?

Chique M. Kuk, brata bilong em Rusty, Kamilus 'Kokoros' lven na brata bilong em Keiyu i tingting planti long skul bilong ol na pasim tingting long painim wok na traun strong bilong ol long pilai musik.

Laip bilong mekim nem long musik tu i pulim ai bilong ol, na ol i bihainim tasol.

Long 1999, ol manki i pekim olgeta samting bilong ol na lusim ples bilong ol. Ol i wok-about 3-pela nait na 3-pela de i go long Wasu long Morobe long painim nupela laip.

Taim ol i stap long Wasu, ol bikpela lait na arapela samting bilong siti laip we ol i save harim planti stori long en i pulim ol na ol i go het long Lae siti.

Chique, Rusty, Kamilus na Keiyu i bin lusim Lae long go long Pot Mosbi we ol i painim sapat na stap long haus bilong ol wanfamili na poroman.

Ol i katim wanpela demo kaset na givim long Pacific Gold studios long traun.

Ol i kisim tingting bilong PGS, tasol i bin i gat planti arapela musik atis husat i bin go kamap pastaim long ol.

Ol i no bin save olsem bihain long en, PGS i bin pasim dua bilong em na salim olgeta samting i go long CHM Supersounds.

Sampela mun i lus insait long siti na ol dispela manki Amele Ples long ples bus bilong Raikos i stat long pilim laip em i hat tru. Ol i nogat ma'ni bilong baim kaikai, ol i traun long kisim helpim long ol wantok long haiarim ol instramen bilong ol poroman bilong wanem ol i laik pilai musik na mekim mani.

Ol i painim hat tumas na ol i tanim i go long ol poroman na



lain famili i stap long Gabadi ples long Sentral provins.

Taim ol i stap long Gabadi, ol i kisim ol arapela musik atis bilong Sentral na Galp provins. Gita man Sonny Param, Ben Mikes na Sam Aikati i bin bung wantaim ol long ben.

Em nau Pikinini Black Bokiss i bungim olgeta kain kain kalsa na ol manki i raitim ol singsing na lainim gut long redi long namba wan albam bilong ol.

Taim ol i kam bek long siti, ol i painimaut olsem ol bai wet wanpela yia moa, olsem na ol i traun long resim mani bilong ol yet.

Alphonse Diru we planti manmeri i save kolim em Kanage em i namba wan man i haiarim Pikinini Black Bokiss long pilaim musik bilong em taim em i rekodim namba wan musik albam bilong em wantaim CHM Supersounds. Chique na Kamilus i pilai gut tru na Kanage i singautim ol i kam bek long rekodim namba tu albam bilong em.

"Em i hat tru long painim mani olsem na mipela i stretim mipela yet na yusim wanem hap liklik mani mipela i mekim long pilai musik nabaut long siti," Chique i tok. "Long dispela taim nau mipela i gat plen pinis long baim ol musik instramen bilong mipela yet na mipela i lukautim gut tru mani mipela i wok long mekim."

Long stat bilong 2004, tok-save i kam olsem CHM Supersounds i redi long rekodim ol namba wan singsing long albam bilong ol.

Ol manki i go bek gen long studio aninit long saun enjinia, Dika Dai, na Pikinini Black

Bokiss i rekodim 12-pela singsing long albam bilong ol Lusim Ples.

Planti long ol singsing em ol manki yet i raitim na ol arapela em ol poroman bilong ol i raitim. Ol i singsing long tok pisin, tok ples Simbu, Koiari, Baniara, Gabadi, Motu na Inglis.

Ol i tok dispela musik albam em bilong olgeta ples insait long kantri.

"Ben i nogat wanpela fevret singsing bilong wanem mipela i bilip olsem olgeta samting mipela i givim long ol manmeri long musik bilong mipela," Lid Singa na Asisten Menesa bilong ben, Chique i tok. "Na em i gutpela tu bilong wanem Kamilus, Keiyu na mi yet mipela i laikim ol singsing bilong mipela long sutim tru bel bilong ol manmeri i harim."

Wanpela long ol singsing we Chique i raitim em i kolim Lukluk Gut i stori long hevi i stap taim ol manmeri i marit yangpela long han bilong ol famili bilong ol.

"Ol ben memba bilong Pikinini Black Bokiss i egensim tru dispela pasin na mipela i singaut strong long ol sief, ol lida bilong ples na ol papamama long lukluk long dispela hevi na senisim dispela kain pasin tumbuna bilong wanem i no save helpim wanpela manmeri," Chique i tok.

***Yu ken ritim stori bilong ol musik man/meri long What's On With Raitim insait long POST COURIER tasol, Trinde, olgeta wik.**

EMTV GAID

Time	Program	Time	Program
5.30	JOYCE MEYER MINISTRY	5.00	JOYCE MEYER MINISTRY
6.00	TODAY SHOW	6.00	TODAY SHOW
9.00	MALOLO CLUB	9.00	CREFFLO DOLLAR
11.00	CREFFLO DOLLAR	10.00	DR PHIL
11.30	DR PHIL	11.00	EMTV PRIME LINE UP
12.30	EMTV PRIME TIME LINE UP	2.30	KIDS KONA
4.57	EMTV TOKSAVE	4.57	EMTV TOKSAVE
5.00	THE PRICE IS RIGHT \$100,000 SUPER SHOWCASE	5.00	THE PRICE IS RIGHT
6.00	NATIONAL EMTV NEWS	6.00	NATIONAL EMTV NEWS
6.30	A CURRENT AFFAIR	6.30	A CURRENT AFFAIR
6.59	LOTTO DRAW	6.58	TOK PISIN NEWS UPDATE
7.00	CHM SUPER SOUND	7.00	LOTTO DRAW
7.57	EMTV TOKSAVE	7.01	PRaise
8.00	FEAR FACTOR	8.00	THE APPRENTICE
9.00	WITHOUT TRACE	8.30	THE ALAN BORDER MEDAL
10.00	RUBY WAX with LIZA MINELLI	10.30	EMTV NEWS REPLAY
10.30	EMTV NEWS REPLAY	11.00	CHM SUPERSOUND
11.00	WALKER TEXAS	12.00	NIGHTLINE
12.00	NIGHTLINE	12.30	CLOSE
0.30	STATION CLOSE		

Time	Program	Time	Program
4.59	STATION OPEN	5.29	STATION OPEN
5.00	CREFFLO DOLLAR	5.30	JOYCE MEYER MINISTRY
5.30	JOYCE MEYER MINISTRY	6.00	TODAY SHOW
6.00	TODAY SHOW	9.00	CREFFLO DOLLAR
9.00	ONE DAY SERIES - AUST V PAK	9.30	DR PHIL
12.30	SOME CALL IT SPORT	10.30	EMTV PRIME LINEUP
1.00	CRICKET CONTINUES	12.15	CRICKET: PAK V WINOIES
4.57	EMTV TOKSAVE	6.00	NATIONAL EMTV NEWS
5.00	THE PRICE IS RIGHT \$100,000 SUPER SHOWCASE	6.30	A CURRENT AFFAIR
5.30	CRICKET CONTINUES	6.58	TOK PISIN NEWS UPDATE
6.00	NATIONAL EMTV NEWS	6.59	LOTTO DRAW
6.30	A CURRENT AFFAIR	7.00	CRICKET CONTINUES
6.58	NEWS UPDATE TOK PISIN	8.30	HOLIDAY SHOWDOWN
6.59	LOTTO DRAW	9.27	EMTV TOKSAVE
7.00	FRIDAY FIGHT NIGHT FINAL	9.30	THIRD WATCH
8.30	FRIDAY NIGHT MOVIE: THE QUEST	10.30	EMTV NEWS REPLAY
10.30	EMTV NEWS REPLAY	11.00	ER
11.00	NIGHTLINE	00.00	NIGHTLINE
00.30AM	STATION CLOSE	00.30	STATION CLOSE

Time	Program	Time	Program
7.00	BARNEY	6.29	STATION OPEN
7.30	JAY JAY THE JET PLANE	5.30	JOYCE MEYER MINISTRY
8.00	PLANET FANTA	6.00	TODAY SHOW
9.30	DOWNLOAD	9.00	CREFFLO DOLLAR
10.00	SO FRESH	9.30	DR PHIL
11.30	X TEAM	10.30	EMTV PRIME LINE UP
12.00	SURFSPORT	12.15	CRICKET: PAK V WINOIES
1.00	THEY MUST BE MAD	6.00	NATIONAL EMTV NEWS
1.30	THE WONDERS OF AUSTRALIA	6.30	A CURRENT AFFAIR
2.30	SATURDAY AFTERNOON MOVIE: MY FAVORITE YEAR	6.58	TOK PISIN NEWS UPDATE
4.30	THE CAR SHOW	6.59	LOTTO DRAW
5.00	ESCAPE WITH ET	7.00	CRICKET CONTINUES
5.30	FISHING AUSTRALIA	8.30	HOLIDAY SHOWDOWN
6.00	NATIONAL EMTV NEWS	9.27	EMTV TOKSAVE
6.30	SPECIAL PRESENTATION CIRQUE DU SOLEIL "NOUVELLE EXPERIENCE"	9.30	THIRD WATCH
8.00	SOUTH PACIFIC MUSIC	10.30	EMTV NEWS REPLAY
8.57	EMTV TOKSAVE	11.00	ER
9.00	XENA WARRIOR PRINCES	00.00	NIGHTLINE
10.00	HECULES	00.30	STATION CLOSE
11.00	EMTV NEWS REPLAY		
11.30	THE LEGENDARY HIDDEN CITY		
0.10	KING OF QUEENS		
00.40	CLOSE		

Time	Program	Time	Program
6.59	STATION OPEN	8.00	WORLD OF WILDLIFE
7.00	WORLD OF WILDLIFE	7.30	BUSINESS SUCCESS
7.30	BUSINESS SUCCESS	8.00	SUMMER SUNDAY
8.00	SUMMER SUNDAY	9.00	STAP WANTAIM MAUNTEN PAIA
9.00	STAP WANTAIM MAUNTEN PAIA	9.30	SAMOA TARO INDUSTRY
9.30	SAMOA TARO INDUSTRY	10.00	PACIFIC DIARY FARMING
10.00	PACIFIC DIARY FARMING	10.30	PACIFIC SMALL BUSINESS
10.30	PACIFIC SMALL BUSINESS	11.00	THE PACIFIC WAY
11.00	THE PACIFIC WAY	12.00	SUNDAY AFTERNOON MOVIE: DENNIS THE MENACE
12.00	SUNDAY AFTERNOON MOVIE: DENNIS THE MENACE	2.00	THE MAKING OF SINBAD
2.00	THE MAKING OF SINBAD	2.30	JAPAN TOPIC VIDEO
2.30	JAPAN TOPIC VIDEO	2.45	SURFSPORT
2.45	SURFSPORT	3.15	CRICKET - AUST V PAK
3.15	CRICKET - AUST V PAK	6.00	NATIONAL EMTV NEWS
6.00	NATIONAL EMTV NEWS	6.30	CRICKET CONTINUES
6.30	CRICKET CONTINUES	11.15	EMTV NEWS REPLAY
11.15	EMTV NEWS REPLAY	11.45	PRaise
11.45	PRaise	00.45	STATION CLOSE



Fear Factor
Fraide, 8.00



CSI
Mande 9.30pm

NATIONAL WEEKLY HIT PARADE		
YUMI FM NATIONAL WEEKLY HITPARADE		
Sarere Januari 29, 2005 Twisties i sponsa		
Singsing	Musik Atis	Dispela Wik
Lili	Itambu	1
Mi no biksot yet Dadii Gii		2
Kande	Dadii Gii	3
Towescop	Itambu	4
Iti Bayama	Armstrong	5
Dimigura	Bits & Pieces	6
Kudougou	Vanessa Q	7
Sigi Mangi	Grumo Masalai	8
Sweet Karanas	O-shen	9
Lewa	Hausboi	10
Na Wonde	Tom Lari	11
Kina.com.pg	Simbary	12
Sharon	Uralom Kania	13
Jombie Kunex	New Painim Wok	14
Manipure	Pongoros	15
Lareva	Ex Hollie M	16
Veuaka	Pune Kapa	17
Parasite	Monica Maibak	18
Hard Life	X-Anats	19
Naike	Hausboi	20

CATHOLIC RADIO 103.5 FM

Table with 2 columns: Time and Program Name. Includes programs like ANGELUS, MEDITATION/INSPIRATIONAL MUSIC, VATICAN WORLD NEWS, etc.

Table with 2 columns: Time and Program Name. Includes programs like ANGELUS, MEDITATION/INSPIRATIONAL MUSIC, VATICAN WORLD NEWS, etc.

Table with 2 columns: Time and Program Name. Includes programs like ANGELUS, MEDITATION/INSPIRATIONAL MUSIC, VATICAN WORLD NEWS, etc.

Table with 2 columns: Time and Program Name. Includes programs like ANGELUS, MEDITATION/INSPIRATIONAL MUSIC, VATICAN WORLD NEWS, etc.

Gutpela long man i mekim asua i holim pablik opis yet o nogat?

Planti paul pasin i wok long kamap insait long ol pablik opis bilong gavman o stet we planti ol sinia opisa i bin kisim hevi wantaim polis o lo i stap. Sampela bilong ol i wok na stap yet long dispela ol opis maski ol i gat hevi wantaim lo na polis. Hia em tingting bilong ol manmeri we ol i tokaut long wanem ol opisa inap long stap na wok yet long dispela ol pablik opis o nogat taim ol i bungim hevi wantaim lo. Joe Ivaharia i raun na kisim tingting bilong ol manmeri.



Maggie Field

Mi bilong Sentral provins na wok wantaim Air Niugini. Mi ting olsem i no gutpela pasin long ol man i gat hevi wantaim lo long stap na wok o holim pablik opis. Dispela em i wankain pasin olsem korapsen long opis. Mi laik ol i noken larim kain ol man olsem wantaim kain pasin long holim pablik opis bikos em i brukim lo bilong yumi. Nau yumi kisim Independens pinis klostu 30 yia tasol yumi i wok long mekim ol kain pasin nogut i stap yet. Em i taim bilong yumi long muv i go fowet tasol kain pasin nogut long ol pablik opis i wok long daunim kantri bilong yum i stap.



Jacqueline Obi

Mi bilong Galp na Sentral na wok long Mosbi. Mi ting olsem dispela kain man i gat hevi wantaim lo i mas noken holim ol pablik opis o top posisen nabaut. Ol man tasol wantaim tras o i gat bilip na gutpela pasin i mas holim ol pablik opis. Planti paul pasin i kamap pinis long ol pablik na stet opis we gavman nau i wok long kisim taim i stap tasol em i asua bilong ol. Long wanem ol yet i save makim ol wok man long dispela ol pablik opis. Nau yet yumi lukim planti paul pasin, mani i lus na korapsen i stap tasol mi ting bikpela hevi i stap long ol atoriti o minista na ol memba we ol i save makim ol poroman bilong ol long wok holim ol pablik opis. Kain pasin i no gutpela.



Peter Fonda

Mi bilong Rabaul na mi stap hausboi tasol. Tingting bilong mi tu i olsem ol arapela we mi tok i no gutpela long ol pablik seven husat i gat hevi wantaim lo i holim o wok long ol pablik opis. Dispela i brukim ol kain lo bilong pablik sevis na mama lo tu. Bai i gutpela sapos ol i mas lusim dispela opis na larim lo i mekim wok painimaut pastaim long wanem kain hevi bilong ol na long sem taim mi ken klarim nem bilong ol tu. Sapos lo i painim nogat rong bilong ol orait ol i ken go bek na stap long dispela opis na sapos nogat em nau lo i ken mekim-save long ol. Kain pasin bai i winim rispek bilong ol pipel taim ol i nogat kain ol birua wantaim lo. Mi ting tu olsem taim long makim ol wok man long ol pablik opis ol atoriti na gavman i mas sekim na skelim gut ol aplikesen long painim gutpela man long holim dispela pablik opis.



Dickson Dobo

Mi bilong Rigo long Sentral provins na wok wantaim benk. Long tingting bilong mi i olsem buk Baibel i gat tok olsem sapos wanem man i gat hevi o paul pasin na ol i kamap lida bai i paulim ol pipel na wok-about bilong em bai i kranki we ol pipel tu bai bihainim wankain paul pasin bilong dispela lida. Sapos i gat kain man olsem i stap long ol pablik opis tu bai mekim wankain pasin long paulim ol manmeri. Mi no laikim ol man wantaim kain ol hevi wantaim lo i stap na wok yet long ol pablik o stet opis long wanem em i wansait long ol grasrut pipel husat i save kisim taim nogut wantaim lo long stilim ol skon o tinpis long stoa. Ol atoriti i mas noken larim ol kain man wantaim polis rekot long wok na stap long ol pablik opis. Na long wankain tu gavman tai mi laik makim ol man tu i mas makim ol rait man o meri tu.



Susan Makeu

Mi bilong Kerema na mi wok olsem wetres long Welkam klab. Mi ting tu i no gutpela pasin long ol man i gat sampela kain hevi wantaim lo i stap na wok yet long ol pablik na stet opis. Dispela bai i mekim pasin wansait long ol liklik grasrut pipel. Ol bikman i save mekim ol paul pasin na bagarapim kantri tasol ol i no save kisim taim long han bilong lo. Long wanem ol i gat planti mani we ol i save baim ol bikpela loya long lukautim ol long kot nabaut. Tasol turangu long ol grasrut ol i save kisim taim long han bilong lo. Mi ting kain ol man i gat hevi wantaim lo i mas lusim o gavman i mas rausim ol kwik taim long ol pablik opis na lo i mas mekim wok painimaut long ol. Sapos ol i asua salim ol i go long kalabus.




Mathew Nuk

Mi bilong Samarai na mi wok wantaim Pangtel. Tingting bilong mi i olsem dispela kain man wantaim hevi long lo i noken holim ol pablik opis. Yumi ol man. Ol yet i save wanem kain hevi ol i gat na sapos gavman i makim ol kwik taim ol i mas tokaut long dispela. Sapos nogat em bai i asua bilong ol yet sapos lo i bihainim ol long taim bihain. Na sapos ol i stap insait long opis orait ol i mas lusim opis long sevim nem bilong ol yet na larim lo i mekim wok painimaut long wanem kain ol hevi bilong ol. I no gutpela long larim ol i stap long opis. Planti ol bikman i save abrus wantaim lo we i nogat sas long ol tasol trangu ol liklik manmeri i save kisim taim. Na sapos ol bikman i asua na lo i painim rong em nau kotim ol na salim ol igo long kalabus. Sapos ol i no gat rong orait ol atoriti i ken skelim ol na makim ol i kam bek long dispela sem opis wok bilong em. Mama Lo i bilong olgeta.



Frank Kauri

Tingting bilong mi i olsem. Sapos yu wanpela bikman na i holim ol pablik opis na i gat hevi wantaim lo i gutpela long yu mas lusim dispela posisen na opis yu holim na larim lo i mekim wok painimaut long dispela asua bilong yu. Lo em i wankain long olgeta manmeri bilong kantri we i nogat wanpela i stap antap o ananit. Olsem na long kain ol man ol i mas tingting gut long sevim nem o rausim sem pasin ol i mas lusim opis na larim lo i mekim wok bilong en.



Max Mai

Mi bilong Kerema na mi wanpela infomol woka. Tingting bilong mi i olsem i no gutpela long ol man wantaim hevi long lo i holim o stap yet insait long pablik opis. Dispela i no luk gut long ai bilong ol liklik manmeri o grasrut lain we ol i save kisim taim wantaim lo i stap olgeta de na nait. Tasol long ol bikman sampela taim ol i save abrus long lo we ol gat ol kain top loya nabaut long lukautim ol. Olsem na kain ol man wantaim hevi i mas sanap long ai bilong kot we lo bai i luksave long ol tu. Mi laik kain ol man i gat ol hevi wantaim lo long bipo na nau i mas noken holim ol pablik opis na long sem taim gavman i mas lukluk gut taim ol i laik makim ol man long ol bikpela opis long noken kisim kain man olsem.

Alice Mai i bilong Kerema, Galp provins. Mi ting olsem kain man o meri i no ken stap o holim opis long taim ol i gat hevi wantaim lo. I no gutpela long ol i stap long opis long wanem nogut ol i pasim rot bilong ol polis long mekim wok painimaut. I moabeta dispela kain ol manmeri i lusim opis bai polis o ol opis bilong kari-maut lo i mekim wok bilong wantaim nogat planti tingting. Ol atoriti i mas skelim gut ol manmeri bipo long ol i makim ol long holim kain bikpela opis. Ol i mas kisim ol man o meri i gat gutpela wok rekot. Gavman i mas kam gut wantaim kain ol hevi olsem bai em i no pas long korapsen.

Toksava bilong Edita. Ol toktok long disela pes i no makim olgeta tingting bilong Wantok Niuspepa.



Laikim Penpren

Nem: Yojino Kakiyama

Krismas: 62 (man)

Adres: 2-16-5 Ichinomiya, Samukama - Machi, Kanagawa - Psen, 253-0111, Japan
Save laikim: Pilai tennis na wokim gaden.

Nem: Elsie Anthony

Krismas: 12 (meri)

Adres: KVS, PO Box 1374, Goroka, Eastern Highlands Province
Save laikim: Raitim pas long penpren, go long lotu, ritim Baibel na serim presen wantaim narapela na tu raun lukim ol ples.

Nem: Richlove Gorman

Krismas: 28 (meri)

Adres: PO Box KN35, AG, Kwanyako, Ghana, West Africa
Save laikim: Pilai spot na raun lukim ples.

Nem: Alfred Kusi Mensah

Krismas: 17 (man)

Adres: Church of Christ Secondary School, PO Box 237, Ejisu-Kumasi Ashanti Region, Ghana, West Africa
Save laikim: Danis, swimming, ritim stori buk.

Nem: Lyne Gigipari

Krismas: 18 (meri)

Adres: PO Box 1184, Wewak, East Sepik Province
Save laikim: Pilai ragbi, harim gospel keset, go long lotu, harim nius na raitim pas.

Nem: Milley Malsey

Krismas: 24 (man)

Adres: PO Box 400, Kimbe, West New Britain Province
Save laikim: Mekim penpren, ritim buk, wokim gaden na go huk.

Nem: Ken Pokeru

Krismas: 20 (man)

Adres: Anglican Mission, PO Box 6491, Boroko, NCD
Save laikim: Painim pren bilong narapela provins, senisim poto na presen.

Nem: Hanema Luton

Krismas: 19 (man)

Adres: PO Box 170, Goroka, Eastern Highlands Province
Save laikim: Ritim ol buk, tok pilai, bungim nupela wantok, harim musik, pilai volibol, lukim TV, singsing kwaiya, go lotu na raun wantaim ol pren.

Nem: Henry Noel Warupi

Krismas: 32 (man)

Adres: PO Box 474, Gordons, NCD-135
Save laikim: Bungim nupela pren, ritim Wantok Niuspepa, raun long narapela kantri, harim wol nius long Catholic FM radio na BBC FM, ritim Baibel na pre long olgeta de.

Nem: Mongz Elai Anjin

Krismas: 20 (man)

Adres: Huon Gulf, PO Box 144, Lae, Morobe Province
Save laikim: Ritim ol buk, ronim wilwil, pilai gita, raitim pas na swim.

Nem: Ands Tanus

Krismas: 24 (man)

Adres: C/- Kipusing, PO Box 2140, Lae, Morobe Province
Save laikim: Go lotu, pilai musik, pilai spot na bungim nupela pren.



STORI TUMBUNA

BIPO tru, i gat wanpela man na meri na tupela pikinini bilong ol stap. Na man ya i save kaikai kawawar bilong bus tasol. Na meri wantaim tupela pikinini ol i save kaikai taro tasol. Meri i save haitim ol taro aninit long paiawut. Taim man i no stap, em i save kukim na kaikai wantaim tupela pikinini.

Long wanpela de meri ya i go long gaden wantaim namba wan pikinini meri. Na man bilong em i was long liklik pikinini bilong em i go long ples. Klostu long belo, pikinini i krai long hangre. Na papa i kukim ol wel kawawar na givim pikinini tasol, pikinini i no laik. Na em i krai yet. Na papa i ting olsem bilong wanem na mi givim em kaikai na em i no kaikai? Na taim pikinini i krai, em i wok long poinim pinga bilong em i go long ples we mama i bin haitim taro long en. Em nau papa i ting, olsem wanem na pikinini i poinim dispela hap yet? Em i no save ol taro meri bilong em i haitim hia long aninit long ol paiawut.

Olsem na papa i go apim ol paiawut na em i lukim ol taro i stap. Nau em i kisim tupela taro na em i kukim long paia. Na

Meri tanim kamap pis

taro i tan pinis na wanpela em i givim i go long pikinini. Na arapela em i smelim na em i wok long trautim ol kawawar i go aut, na em i kaikai dispela taro.

Na long apinun meri bilong em wantaim namba wan pikinini i kambek. Na meri i hangre nogut, na em i laik kukim taro bilong em. Na em i rausim ol paiawut na em i no painim taro. Na meri i no toktok, em i go ausait na i kisim ol skin bilong mambu na wokim wanpela pis. Na nau em i traim long swim long wara. Na em i lukim i gutpela tru, na em i lusim bek na i haitim dispela skin bilong mambu. Na em i kam long haus na em i askim man bilong em.

Husat tru i kisim taro bilong mi? Na man i tok, oltaim mi olsem longlong man na yu i save givim mi ol wel samting bilong bus na yu yet, wantaim ol pikinini i kaikai ol gutpela taro, a?

Na meri i tok, em i orait. Nau yu ken lukautim tupela pikinini na i stap. Na em i taitim wara bilong susu bilong em i go insait long wanpela mambu, na i givim long bikpela pikinini na i tok. Yu putim i stap na brata bilong yu i krai, orait yu ken givim em. Na taim susu i pinis, orait, yu ken bringim brata bilong yu i kam long wara Ungu, na yu singsing olsem: "Avo mao na ni pamo". Nau meri i kisim skin

bilong mambu na i tanim olsem pis na em i swim i go long raun wara Ungu.

Namba wan pikinini meri i was long brata i go inap susu i pinis, orait, em i kisim brata bilong em i go long wara Ungu na singsing olsem mama i bin tokim em pinis na mama bilong ol i save kam givim susu long pikinini bilong em. Oltaim olsem tasol i go.

Na wanpela taim papa i go hait arere long wara Ungu, na em i lukim olsem wanem na meri, em i save i kam givim susu long pikinini. Em i lukim pinis, orait, em i go bek long ples. Na em i salim tok i go long ples. Na em i salim tok i go long olgeta ples, bai ol man i kam bung na kisim bek meri bilong em i go.

Long wanpela de olgeta man i kam bung, na banisim dispela wara Ungu. Na taim em i kam givim susu yet long pikinini, wantu ol man i kam holim pasim meri. Tasol wantu meri i tanim olsem pis gen na kalap i go pinis long wara. Na em i go olgeta i no kambek moa long dispela hap gen. Olsem tasol long ples bilong mi, meri i wari long taro, ol i save larim bikos meri i wari long taro na tanim olsem pis.

**BRUNO MALAI
JOSEPHSTAAL, MADANG**

Dia Laiplain,

Mi gat bikpela hevi long pasin bilong statim boipren na gelpren pasin na i laikim yu long helpim mi na stretim.

Mi bin traim long abrusim ol manki taim mi stap long komyuniti skul yet na nau mi stap long hai skul. As bilong dispela i bikos mi save lusim samting ol tain i givim o mi yet i baim na mi save wari tru na sampela taim mi save laik hangamapim mi yet.


Mi save pilim olsem sapos mi gat boipren na bihain lusim em tu, bai lewa bilong mi bruk na nogut trutru bai mi hangamapim mi yet. Dispela i as mi save abrusim ol manki bikos nogut dispela bai kamap tru.

Sapos mi gat boipren, em i no min olsem bai em i kamap man bilong mi long bihain taim bilong wanem mi save olsem mi gro yet na mi save bai mi sensim tingting bilong mi long bihain taim.

Plen bilong mi em long gat wanpela boipren tasol husat bai kamap gutpela papa taim mi redi long kamap mama bilong wanem mi les long gat boipren husat bai lusim mi.

Nau yet mi gat wanpela boipren tasol lewa bilong mi i bruk bikos mi save olsem mi bai lusim em bilong wanem em i bilong lain famili bilong mi.

Famili bilong mitupela i no klostu tumas tasol mi save olsem papamama bilong mitupela bai i no inap long larim mitupela i pren. Mi laik maritim wanpela man husat i klostu long mi we mitupela i no bilong



wanpela famili. Wanem kain rot bai mi bihainim long daunim dispela hevi?

Worried

Dia Pren,

Hevi bilong yu i no narakain long Laiplain. Wanpela samting mipela i mas save gut pastaim em wanem as bilong "boipren" na "gelpren"? Wan wan man i lukim as bilong em long we bilong ol yet. Sampela lain i save tingim olsem sapos wanpela meri i tok "dispela i boipren bilong mi" i min olsem tupela i pren, na ol i nogat arapela boipren o gelpren.

Ol arapela i save ting man na meri wantaim i ken i gat planti boipren na gelpren long wankain taim. Sampela i save ting pasin bilong i gat boipren na gelpren i bilong ol long slip wantaim tasol ol arapela i no save ting olsem.

Bai yu lukim olsem i gat planti as long dispela tok boipren na gelpren. Olsem na mipela i no klia tumas long as bilong boipren long pas bilong yu. Dispela i mekim hat long mipela long bekim gut pas bilong yu.

Taim yu stap long hai skul,

em i gutpela taim bilong yu long save long planti ol arapela manki na meri. Yu no tok klia sapos yu save go raun sampela taim wantaim ol meri o stap insait long wanpela grup bilong ol manki na meri. Dispela i gutpela rot bilong save gut long ol arapela man na meri.

Mipela i laikim yu toktok wantaim papamama bilong yu long pilings bilong yu long dispela boipren bilong yu. Sapos ol tok nogat long yu maritim em, em i orait bikos yu bai tokim ol long wari bilong yu na ol bai givim yu sampela gutpela tok stia.

Long bihain taim bai tingting bilong yu i senis long maritim dispela manki o manki ya tu bai tingim olsem em i las long raun wantaim yu na bai yu kisim bikpela wari tru. Yu bai pilim olsem yu laik hangamap(olsem yu bin tok long pas bilong yu) tasol yu bai no inap mekim. As mipela i tingim olsem em bikos long pas yu i soim olsem yu wanpela meri i gat gutpela save na i no inap mekim nating na bringim bikpela wari long famili bilong yu sapos yu kilim yu yet long dispela kain rot.

Tasol mipela i wari long pasin yu laik mekim long painim wanpela man tasol husat bai kamap gutpela papa bikos mipela i save olsem dispela bai i no inap givim yu rait man.

Yu laikim wanpela boipren tasol, wanem rot bai yu save olsem em i rait man sapos dispela i namba wan taim bilong

yu long bungim em (bipo long yu save gut long em)?

Planti meri husat i save makim gutpela man bilong ol yet i save gat planti boipren long sampela yia na bihain makim wanpela tasol long kamap man bilong ol. Sampela meri i save gat planti boipren long wanpela taim na ol arapela save gat wanpela long wanpela taim. Long dispela tupela rot wantaim ol i gat gutpela sans long makim rait man bikos long dispela rot bai ol inap long lukim wanem manki i gat gutpela pasin na makim. Mipela bai askim yu long bihainim dispela kain rot na i no bilong makim nating namba wan man yu ting bai kamap gutpela man long bihain taim bikos dispela kain pasin i ken putim yu long han bilong man nogut.

Las toktok mipela i laik mekim em dispela. Taim mipela i tok wanpelameri i mas gat planti boipren, mipela i no min olsem tupela (boi na gel) i mas go dip long pilings bilong ol. Dispela i ken brukim lewa sapos wanpela bilong tupela i lusim arapela. Dispela i no min tu olsem tupela i ken slip wantaim, nogat.

Mipela i laikim bai tupela i ken toktok na raun wantaim long save gut longol yet. Olsem na yu mas amamas long wanem kain rilesensip yu gat nau. Yu ken tingting long painim rait man bilong yu long bihain taim.

LAIPLAIN

Noken pasim Kainantu RDB brens

...Askim i go long agrikalsa minista

James Kila i raitim

SIAMAN bilong Isten Hailans Kofi Blokholda Asosesin, Kollen Upa long dispela wik i raitim wanpela petisen o tok egens i go long Agrikalsa na Laipstok Minista, Mathew Siune, long noken pasim daun Rurel Developmen Benk (RDB) brens long Kainantu.

Mista Upa i tok egens dispela proposal i disisen we i toktok long klosim na pasim dua bilong RDB brens long Kainantu. Dispela disisen bilong RDB menesman long pasim Kainantu brens em i bihainim ol hevi bilong moni na tu re-straksa bilong RDB em Agrikalsa Minista Mista Siune i bin givim tok-orait long mekim.

"Olsem wanpela lokal man bilong Kainantu eria, mi tok egens tru long dispela disisen bilong RDB menesman long pasim dua bilong RDB brens long Kainantu," Mista Upa i tok.

Em i tok tu olsem dispela brens long Kainantu i save sevim 4-pela distrik olgeta na em i save mekim bikpela wok tru long helpim ol rurel fama insait long dispela provions.

Ol dispela distrik Kainantu brens i save sevim em Kainantu, Obura-Wonenara, Henganofi na Okapa, em i tok.

Ol as tingting Mista Upa i givim long tok egensim dispela disisen bilong RDB menesman long klosim daun Kainantu brens em olsem ol liklik wok bisnis insait long dispela

4-pela bikpela distrik long Isten Hailans bai painim hat-taim stret.

Mista Upa i tok olsem narapela bikpela as tingting bilong em long go egensim disisen bilong RDB menesmen em olsem dispela 4-pela distrik, Kainantu, Okapa, Henganofi na Obura-Wonenara i save kontribiut samting olsem 75-pesen long agrikalsa sekta i go long ekonomi bilong Isten Hailans aninit long helpim i kam long RDB. Olsem na taim benk i pas olgeta ekonomi bai bungim hat taim stret.

Narapela samting Mista Upa i tok em hevi bilong lo na oda bai kamap bikpela taim RDB brens i pas.


Dispela em bikos ol yuts na ol liklik man long ples bai nogat rot long kisim mani long helpim agrikalsa wok bilong ol olsem na ol bai mekim raskol pasin, em i tok.

Mista Upa i tok strong tru olsem Kainantu brens em i save sevim wanpela eria we mak bilong en i mos long 40,000 skwea mail olsem bisnis jon.

Dispela bisnis jon i bikpela moa long Goroka brens we i gat samting olsem 25,000 skwea mails, Mista Upa i tok.

Em i tok strong tu olsem sapos Minista Siune na ol RDB menesmen i lukim gut ol bai painimaut olsem Kainantu brens i gat wok long etktiv lon potfolio em olsem K4.15 milien. Goroka brens i ron long lon potfolio mak em K0.65 milien tasol na em i daubilo tru long wok man bilong Kainantu brens.

Taim Gavman na RDB menesmen i bihainim dispela disisen long pasim benk long Kainantu ol bai bagarapim tru ol liklik man-meri long ol rurel eria husat i save kisim sevis long benk long wok bilong agrikalsa.



¥ Mista Upa i soim kopi bilong petisen em i givim long Mista Siune. Foto: JAMES KILA

Kids Fly FREE*



Air Niugini em i PNG!

AIR NIUGINI'S

DOMESTIC FAMILY FARES DEAL

- Buy one return Adult Ticket and one child travels **Free**.
- ♦ Offer applies to Nambawan, Weekender and Wantok Fares.
- ♦ Offer valid 04 Feb to 23 Mar 2005 inclusive.

* Condition Apply.

Contact your nearest Air Niugini Travel Centre or Travel Agent for further Information.

PXAD 01/05



Bisnis bilong Groim Diwai insait long PNG - Ol hevi bilong planim samting long ol renfores ples

Sapla bilong ol pikinini diwai na lukautim gut

Planti renfores spisis diwai i gat kainkain rot bilong karim pikinini. Olsem, Araucaria spp o klinkii pain i gat ol yia we em i ken karim bikpela namba pikinini diwai na strong bilong em long groa hariap i moa yet. Dispela i save winim ol yia we em i no save karim bikpela. Dispela em namel long 5 na 7 yia.

Wanpela arapela samting i bikpela long ol pikinini em taim em i mau, em i save bagarap kwiktam. Olsem, Flindersia i save bagarap wan mun bihain long em i mau. Klinkii pain long Bulolo i save bagarap samting olsem 10% long olgeta wik bihain long em i mau.

Tasol dispela tupela hevi bilong ol pikinini diwai i no save bikpela tumas sapos yu i gat wei bilong lukautim gut ol dispela pikinini diwai.

Hoop pain i ken i stap long-taim inap long 8-pela yia sapos em i stap long wanpela ples we kol bilong em inap long mak bilong 12 digri selsius.

Tasol wanfamili bilong em, Klinkii pain i mas stap long hap we mak bilong kol i stap long 0 digris selsius insait long ol kontena we i nogat win insait. Planti Mellaceae i ken stap gut long ples we i antap liklik tasol long wara i ken tanim i go blok ais. Wankain olsem planti long ol Pinus spp - diwai we ol i save planim long ol renfores eria.

Long Not Kos bilong NSW Australia, Eucalyptus grandis - diwai we ol i save planim long wanwan renfores eria i save karim pikinini wanpela taim long olgeta yia, tasol sampela taim

we diwai i no inap long karim, em i gutpela sapos yu gat sampela moa pikinini bilong em i stap. Strong bilong dispela pikinini diwai i ken stap sampela yia sapos pikinini diwai i stap insait long ples we i gat ol marasin bilong kilim ol kainkain binatang.

Rot bilong storim gut ol kainkain diwai spisis we ol i ken gutpela long planim, nau i no stap yet.

Gutpela we bilong mekim em long planim ol diwai spisis we i save karim pikinini olgeta taim, bai i nogat hevi bilong painim hap na gutpela rot bilong lukautim ol pikinini diwai.

Sapos yu mas painim hap bilong haitim ol pikinini diwai i gat ol gutpela samting bilong tu long holim long mak bilong kol insait long rum, o aninit long mak bilong blok ais we yu ken lukautim ol insait long bokis ais.

Sapos yu mas i gat samting i winim sais bilong bokis ais bilong haus, bai yu mas baim bikpela mani bilong holim bikpela namba pikinini diwai.

Ol diwai spisis we i no save karim olgeta taim i save hat long holim i stap na i no gutpela long groim long wanpela skim o progrem bilong groim diwai.

Yu ken mekim sampela samting olsem rausim ol yangpela diwai long fores.


Tasol ol dispela samting i save sindaun long taim aninit long ol diwai na taim yu rausim ol, groa bilong wanwan long ol bai i no inap wankain.

• Neks bai mipela i paitim toktok long sampela rot bilong kamapim ol neseri insait long ol renfores eria.

MCCARTHY & ASSOCIATES (FORESTRY) PTY. LTD.
National & International Forest Consultants
mccaf@datec.net.pg

"Long kisim tok stia long olgeta wok diwai"

Bogenvil i no redi long ol ausait bisnis



• Polis bilong Bogenvil i gat bikpela wok long mekim long lukim olsem lo na oda i mas stap na ol bisnis i ron gut. Long poto, sampela i sanap wantaim Minista bilong Inta Gavman Rilesens, Sir Peter Barter, (namel long ol polis) husat i bin mekim bikpela wok tu long karim Bogenvil i kam long mak em i stap long en nau. FAIL POTO

Aloysius Laukai i raitim

WANPELA lida bilong Bogenvil, James Taraisi, i wari long bikpela namba bilong ol pipel bilong Esia husat i wok long traim long kirapim ol stoa long Buka.

Mista Taraisi i tok olsem taim i no stret yet bilong ol bisnis bilong ol ausait long kam insait long Bogenvil bikos nau tasol Bogenvil i pinisim Mama Lo bilong em na bai makim wanpela gavman bihain long dispela yia.

Em i tok olsem em i no taim bilong kamapim ol bisnis olsem ol supamakot taim gavman we bai kamap i no kamapim ol polisi long we ol bai kirapim bek ikononi bilong Bogenvil yet.

Mista Taraisi i singaut long Gavana bilong Bogenvil, John Momis, Edministreta bilong Bogenvil Peter Tsiamalili na Presiden bilong Bogenvil Pipels Kongres (BPC) Joseph Kabui, long tok klia long ol dispela samting.

Em i singaut tu long ol tokel bisnis long Bogenvil long daunim prais bilong ol guds bikos prais i antap tumas em i as ol bikpela bisnis i wok long traim long kam long Bogenvil wantaim ol guds bilong ol we prais i no antap tumas.

Em i givim tok lukaut olsem ol dispela husat i wok long brukim lo na ronim ol bisnis bilong ol long Bogenvil wantaim nogat tok orait long gavman o ol narapela atoriti, i mas stopim dispela pasin.

Long wankain taim wanpela Bogenvil Saina bisinisman, Wally Seeto, i kirapim wanpela stoa pinis long Buka na i wok long wok wantaim 4-pela narapela lain Esia long dispela stoa.

Planti pipel i wok long go long stoa bilong em na bisnis komyuniti long ailan i wok long tingting planti long dispela.

Dispela stoa i bin op bihain tasol long Niu Yia 2005.


Papamama bilong Mista Seeto pastaim i bin ronim Laiken and Sons stoa long Buin pastaim long Bogenvil Kraisis o hevi. Mama i bin karim Mista Seeto long Buin.

Mista Seeto i tok olsem em i wanpela sitisen bilong Bogenvil na em i gat rait long kirapim bisnis long hap.

Em i tok ol narapela lain Esia husat i wok long wok wantaim em i wok long helpim em long kirapim dispela bisnis long Buka tasol na bai go bek bihain long olgeta samting i stret.

Cat 'C' Series Hydraulic Excavators

305C, 307C,
308C, 311C,
312C, 314C,
315C, 318C,
320C, 322C,
325C, 330C



Caterpillar 'C' Series Hydraulic Excavators incorporates innovations for improved performance and versatility.

- **Engines and Hydraulics** - Cat engines combine with proven hydraulics to give consistently high power and control in the field.
- **Structures** - Rugged Caterpillar undercarriage design and proven structural manufacturing techniques assure outstanding durability in the toughest applications.
- **Operator Stations** - Operator work stations are quiet with ergonomic control placement and convenient adjustments, low lever and pedal effort, ergonomic seat design and highly efficient ventilation.
- **Serviceability** - Longer service intervals and easier maintenance results in better machine availability and lower owning and operating costs.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2300
Fax: 472 1477

TABUBIL
Phone: 548 9040
Fax: 548 9155

RABAUL
Phone: 982 1217
Fax: 982 1129

Tok pilai wantaim Kanage olgeta wik!!

Ol tru tru poro o wantok bilong gutpela raitman Kanage i laikim tru sapos yupela i ken salim sampela tokpilai bilong yupela i kam na mipela putim long tok pilai kona bilong Kanage. Salim i kam long TOK PILAI KANAGE P.O. Box 1982, Boroko NCD o kam long opis klostu long BSP Waigani na neksdua long Mondo Sekanhan klos stua. Mipela stap long las opis. Sopotim raitman bilong yumi, Kanage!!



MATT DEDEBOH HOLEYAH BANZ

Kanage em lapun Sepik i stap long blok long Popondeta longpela taim. Lapun misis Kanage i dai pinis na boi nogut em yet i stap.

Wanpela taim ol senses lain i kam bilong kaunim namba bilon gol manmeri. Wanpela senses opisa i go long blok bilong Kanage na askim em, hei pren amas age bilong yu? Kanage harim na het paul na tokim em, yu ting kain lapun olsem mi bai karim kain sik nogut olsem raun.

Em yupela ol wokman bilong gavman tasol i save karim sik nogut ya na givim long ol gutpela lain ya. Koan go pinis. Senses boi ya i save olsem em i no tok pisin stret olsem na em i askim, sori papa, mi laik save amas krismas bilong yu. Taim Kanage harim em tok, mi stap 11 krismas long Popondeta.

Senses boi i paul olgeta long lapun Kanage.

MASTA WAI, MOSBI

Kanage em i bilong Sigiri viles, Banz yet na em i wanpela stim bodi stret. Wanpela Sarere olgeta manmeri bung long Ane Bei ples na kaunsol i givim toktok i stap. I no long taim Kanage wantaim poro bilong en Mak i kamap long wokim nambaut long maket. Man, kaunsol na ol man i wililim tupela na mekim save long tupela stret.

Tupela kisim taim na krai i stap. Bihain Mak lukim pes bilong Kanage na tok ei poro yu lukim olsem pusiket na Kanage lukim Mak na tok ei poro yu luk olsem bafalo. Man, tupela yet kres na trausis i lus na tupela as nating na i no tingim hap bilong go hait. Ol komuniti ronim tupela i go long lain kopi.

MATT DEDEBOH HOLEYAH BANZ

Liklik junia Kanage i wokabout wantaim mama bilong em i kam daun long geit bilong haus bilong ol na wanpela bas bilong haus sik i draiv i kam abrusim junia na mama bilong em. Hariap tru junia i luksave olsem em haus sik bas na em bikmaus. Kam kisim mami i go bek long haus sik. Mipela i no amamas long bebi Anna yupela givim long mami na em kisim i kam long haus ya. Olgeta lain i sanap arere i harim na lap indai olgeta long dispela toktok bilong junia Kanage.

BATA KITT MOSBI

Kanage i wok olsem draiva boi bilong wanpela bikpela

kampani na em i save soim olsem em wanpela stail draiva bilong kampani.

Olgeta taim em i mas mekim olgeta samting wantaim eksen tasol na ol ausait lain i save ting olsem Kanage em wanpela bikbos bilong kampani ya.

Wanpela taim kampani i baim ol nupela ka bilong opis na Kanage kisim bikpela filings long em bai draivim nupela ka na lusim olpela ka long ol sinia opisa i yusim.

Wanpela junia opisa i kirap na askim Kanage, hei bos, nau yu gat nupela ka nau bai bos i promotim yu tu o nogat. Bikos eksen bilong yu i olsem promosen i kisim yu longtaim yet.

Kanage i no bisi, em amamas long nupela ka na draiv na tekov tasol.

KANAGE PREN MOSBI

KANAGE

Raitman long TOK PILAI

Kam na tok pilai wantaim mi olgeta wik!!

KANAGE GO LONG WEWAK NA SALIM VANILA BILONG EM...

BAI MI RICH TRU YAH!

EM KISIM MONI NA TINGTING LONG BAIM WANPELA SIKS PEKS NA DRING BIFO EM I GO BEK LONG PLES...

EM NAU! MI NOKIM WANPELA SIKS PEKS PAS TAIM NA MI GO PLES!!

FLIP!!

EM I NO SAVE OLSEM I GAT KEFIU LONG WEWAK TAUN... HUSAT I RAUN BIHAIN LONG 8 KILOK NAIT BAI PAIA LONG HAN BILONG OL POLIS...

Hic! MI GOKISIM WAN MOA SIKS PEKS..

BAGA DRING NA ABRUSIM TAIM NA EM LAIK GO PAINIM HAUS BILONG OL WANTOK NA POLIS I PASIM EM...

Hic!... KEFIU?! (Hic!)

YU SAVE LONG KEFIU TU?! YU PAINIM WANEM LONG NAIT, AH?!

KANAGE EM SPAK NA EM I NO KISIM GUT TOK TOK BILONG POLISMAN...

Hic!... MI NO SAVE LONG DISPELA MAN KEFIU!... MI SPAK LONG MI YET.. HUSAT EM KEFIU?!! EM BILONG WE?!! SAPOS EM BILONG WASARA BAI MI SAVE LONG EM!!

Pot Mosbi Soka Asosiesen Bel Isi Tonamen

Taim	Tim	Graun	
Sarere 29/01/05			
10:00	Mirel Momase vs ANZ University	B2	1st Kwata Fainol
12:00	Rapatona vs Cosmos	B2	2nd Kwata Fainol

Sande 30/01/05

10:00	Lusa 1st Kwata Fainol vs Lusa 2nd Kwata Fainol	B2	Tri na Foa plesing
14:00	Wina Kwata Fainol vs Wina 2nd Kwata Fainol	B2	Gren Fainol

Pot Mosbi Kriket Dro

Sarere 29 Jenuari 2005

Ples	R6	A Gret (2 Day)	Taim	Mat/Stumps	Ampaia
Amini	OS Hoods	vs	Raukele 10:00am	Hoods (Assn)	Lakani Oala/David Johns
Colts	Chubb United	vs	Dogura 10:00am	United (Assn)	Clive Eilly/Herea Pegi
B Gret (40 overs)					
Rescheduled Matches from Week 3 (Round 1)					
STC	Mobil Steamships	vs	Aussie Hi Com 12:30	M/STC	Iamo Manega
Nomads	Lamana Mariners	vs	OS Hoods 12:30	Mariners	Walo Charlie
MB	PB Cheung	vs	BNG Poreporena 12:30	PCC	Raka Ipi
HMS2	Chubb United	vs	Pari 12:30	United	Vai Nou
R14 Under 19 (30 overs)					
(End of Competition)					
STC	Mobil Steamships	vs	KCC 8:10	M/STC	Numa Alu
R13 Under 17 (25 overs)					
(Stumps Only - Mat Optional)					
Nomads	Mobil Steamships	vs	Lamana Mariners 8:10	Mariners	Walo Charlie
HMS2	Chubb United	vs	BNG Poreporena 8:10	United	Kila Iga
R13 Under 15 (20 overs)					
(Stumps Only - Mat Optional)					
KCC	Raukele	vs	KCC 9:00	KCC	Arutu Goasa
Rules	TST Coasters	vs	Chubb United 2:00	Coasters	Sinaka Kila
Rules	BNG Poreporena	vs	Pari 11:00	Pari	Sinaka Kila
Rules	Dogura	vs	Lamana Mariners 8:00	Dogura	Sinaka Kila

Sandey 30 Jenuari 2005

Ples	R6	A Gret (2 Day)	Taim	Mat/Stumps	Ampaia
Amini	Mobil Steamships	vs	TST Coasters 10:00am	M/STC (Assn)	Vele Kula/Imran Alu
Colts	BNG Poreporena	vs	Lamana Mariners 10:00am	Mariners (Assn)	Hale Ginate/Frank Baroa

B Gret (40 overs)


Rescheduled Matches from Week 3 (Round 1)

STC	Raukele	vs	Dogura 12:30	Dogura	Tony Alu
Nomads	TST Coasters	vs	Curries 12:30	Coasters	Inoa Baeau
MB	Kempa	vs	KCC 12:30	Kempa	Raka Ipi/Kila Kalana
R14 Under 19 (30 overs)					
(End of Competition)					
HMS2	Lamana Mariners	vs	BNG Poreporena 8:10	PCC	Kila Iga
MB	Chubb United	vs	Kempa 8:10	Kempa	Kila Nouairi/Raka Ipi
R13 Under 17 (25 overs)					
(Stumps Only - Mat Optional)					
Rules	Raukele	vs	KCC 12:30	KCC	Sinaka Kila
Rules	Kempa	vs	Pari 2:00	Pari	Sinaka Kila
R13 Women's (25 overs)					
(End of Competition) (Stumps Only - Mat Optional)					
Nomads	TST Coasters	vs	KCC 8:10	Coasters	Herea Pegi
HMS2	BNG Poreporena	vs	Chubb United 12:30	PCC	Kila Iga
STC	Dogura	vs	Lamana Mariners 8:10	Dogura	Walo Charlie

BYE: Under 15 OS Hoods Under 19 Dogura

Toksava:

- 1) Umpires: Club captains to make alternate arrangements if the appointed Umpire is not in attendance.
- 2) Umpires to declare the winner, must print their names in the scorebook as well as sign the book.
- 3) Both Scorebooks to be completed with names of batsmen, bowlers, catches, wicket-keepers, DNBs and the winner declared. Penalty: one point.
- 4) A further penalty of two (2) competition points for failure to hand in your scorebook to Tony Eilly's residence at Hohola by 7pm after the match.
- 5) Balls: 'A' Grade "Googly" (K50), Lower grades "Gem" (K40).



• Damien Wartovo bilong Brown Eagles i tap long fes bes long wanem em i seif.



• Donovan Kabewa (1) bilong PS Rutz na Jacob Peter bilong Kurti Andra traim bun long POM soka belisi pilai



• Gol suta bilong Fairdeal i sut long go egensim Pryde Furniture long Praivet Kampani Netbol Resis.



• Tony William bilong Dolphins i leit long fes bes we George Taule bilong Browns Eagles i autim em.



• Belisi soka pilai long Bisini soka graun. Fainol long dispela wiken. Ol poto: JOE IVAHARIA

Maski em i lus Molik i bin kamapim gutpela pilai...

Davenport i namba wan meri tenis long wol.

MELBOURNE, Australia- Namba wan Australia tenis pilaia i lus long Lindsay Davenport bilong Amerika husat i namba wan tenis bilong ol meri long wol.

Molik husat i pilai long win wantaim olgeta lewa bilong em bipo long ol Australia spota long dispela Australia Tennis Open long aste.

Bihain long strongpela pait we i kisim moa long tu-na-hap-aua aninit long 100 digri dispela pilai Davenport bihain tru i win wantaim sotwin.

Dispela win bilong Davenport i helpim em long go insait long semi fainol we bai kamap tede.

Molik i stap long namba 10 ples long wol we em i pusim Davenport wantaim ol stronpela pilai bilong em na planti manmeri i ting meri nogut bilong Australia bai win tasol save bilong Davenport long tenis i win liklik na dispela i helpim em long win.

Davenport husat i gat 23 krismas i mekim wanpela long ol 12-pela brek poin long namba ri set we i kisim tupela fainol long taim em i go pas wantaim 15-40.

Long taim em i laik winim Gren Slem taitol we las taim em i win em long 2000, Davenport i mekim olgeta manmeri i kirap nogut taim em i bungim Frans meri Nathalie Dechy husat i stap long namba 19 ples.

Dechy i traim hat yet long winim namba 12 ples meri Patty Schnyder bilong Switzerland 5-7, 6-1, 75 long Trinde kwata fainol.

Tupela pilaia tu i kamapim wanpela strongpela pilai we i kisim tupela aua na 33 minit olgeta.

Dechy husat i no kamap liklik long wanpela kwata fainol bilong Gren Slem long ol 36 pilai bilong em i wilwilim wina bilong Frans Open Anastasia Myskina 6-4, 6-2 long Mande.

Davenport tu i strongim kona bilong em i lait yet long go insait long ol fainols wantaim namba 7 tenis pilai bilong ol meri long wol na Amerika wantok bilong em yet Serena Williams husat bai bungim Maria Sharapova bilong Rasia. Sharapova i wina bilong las Wimbledon sempionsip long narapela semifainol pilai.

Molik husat i luk gut long kamap olsem namba wan Australia meri long winim Australia Open tasol i lus. Las Australia meri husat i winim Open taitol em Evonne Goolagong long 1978.

Tasol maski Molik i lus planti ol sapota i amamas tru long wei i pilai we dispela em i namba wan taim bilong em long kamap long kwata fainol long wanpela Gren Slem pilai.

Molik i ron bihain long renk bilong tennis long wol tasol i mekim planti ol manmeri i kirap nogut long lukim em i kamap long namba 10 ples. Las taim em i stap long 12 ples.

Long fes namba wan 10-pela ples bilong ol meri em stat long namba wan Davenport, Amelia Mauresmo (Frans),



• Namba wan Australia meri tenis pilaia Alicia Molik i lus long Lindsay Davenport bilong Amerika long kwata fainol. Tasol maski em i lus long dispela Australia Open tonamen em i kamapim gutpela ol pilai. Ol stori na poto long dispela pes: SYDNEY MORNING HERALD

Anastasia Myskina (Rasia), Maria Sharapova (Rasia), Svetlana Kuznetsova (Rasia), Elena Dementieva (Rasia), Serena Williams (USA), Justine Henin-Hardenne (Belgium), Jennifer Capriati (USA) Venus Williams (USA), Vera Zvonareva (Rasia) na Alicia Molik (Australia).

Long wankain taim long pilai bilong ol man Australia man na bipo wol namba wan Lleyton Hewitt i pairapim Spain man Rafael Nadal long Mande long go insait long kwata fainol long aste.

Hewitt i gat planti ekspirians na i winim isi tasol Nadal 6-

1, 6-1 long tupela set.

Hewitt bipo i winim US Open na Wimbledon Open tasol i no bin go insait long wanpela kwata fainol yet bihain long narapela 8-pela pilai em i kamap long en.

Long wol renk bilong ol man namba wan 10-pela man em Roger Federer (Switzerland) Lleyton Hewitt (Australia), Olivier Rochus (Belgium), Joachim Johansson (Sweden), Carlos Moya (Spain), Fernando Gonzalez (Chile), Ivan Ljubicic (Croatia), Taylor Dent (USA), Juan Ignacio Chela (Argentina) na Ivo Minar.

Manki- nupela nem long gem golf

Birdie, igel na sapos nogat albatross em ol biknem nem long pilai bilong golf tasol nem manki i no wanpela nem yu bai save laik harim long golf.

Tasol sapos yu no save dispela em nem ol i kamap taim ol pilaia i pilai long namba tu raun long Saut Afrika Open long Durban Kantri Klab long Fraide.

Long taim lokel profesinol pilaia Mark Murless i kamap long namba 7 we i kamap tu long grin sait banka na long taim em i wokabaut i go log bal bilong em em i lukim wanpela manki i stap long liklik bus na i wok long lukluk long em

Long taim Murless i lukluk i stap dispela manki i laik long lusim bal i go

daun tasol abrus na em i holim bal i ron i go insait long bus.

Tasol em ron i go insait manki ya i pilim bal i strong tumas na i no gutpela long kaikai na olsem em i tromoi i go daun long wanpela ples nogut.

Long lo bilong pilai golf Murless long lukim em i pilai yet em i mas putim bal long wanpela mak we i moa klostu long dispela hap we bal bilong em i stap. Taim em i mekim olsem em i no ken stop long pilai.

Long dispela taim ol i wok long pilai long par-72 raun.

Tasol long namba wan de long 76 long Fonde las wik dispela i min olsem Murless i misim kat long tupela sot.

Dispela i lukim em i lusim taim long Sarere long tingting olsem em i namba wan golfa long Yuropian Tua long mekim dispela pilai i kamap manki.

Birdie, igel na sapos nogat albatross em ol biknem nem long pilai bilong golf tasol nem manki i no wanpela nem yu bai save laik harim long golf.

Clark helpim Australia long win

SYDNEY, Australia: Australia betsmen Michael Clarke i amamasim 100 ron bilong em long taim em i helpim Australia long winim Pakistan long kriket pilai bilong tupela.

Ol Pakistan bai oltaim tingim dispela pilai we olgeta pilaia bilong Pakistan i go aut long dispela wanpela-de kriket pilai bilong ol.

Clark i mekim 103 ron we dispela i hapim evereds bilong em i go antap long 123.67 long ol intenesel pilai bilong em.

Na sapos ol Pakistan i laikim moa Clark i soim olsem ol i no ken lukluk moa long kisim ansa.

Long wanpela pilai bipo long Clark i kamapim 100 ron bilong em klostu namba wan pilaia bilong Pakistan Shoaib Malik i holim bal tasol i abrus.

Stail pilai bilong Clark i mekim Australia i abrusim Pakistan husat i mekim tasol 163 ron long 36.2 ovas.

Opena bilong Australia Mathew Hayden i mekim tasol 27 ran long 65 bal na dispela i mekim planti man i askim sapos i gutpela Clark i kisim ples na stap long opena.

Clark i gat namba long paitim bal.

"Taim (Adam Gilchrist) i kam bek mi bai stap daunbilo gen long lada na dispela em i orait," Clark i tok. "Tasol sapos wanpela taim mi kisim bet long oda long ol namba wan ples dispela bai i gutpela tru.

Planti taim pesman Shoaib i klostu i laik autim tiket bilong Clark na bihain Ricky Ponting tasol dispela i no inap. Ponting i



• Wanpela kriket pilaia.

mekim 17 ron na i no go aut.

Tasol maskim ol i lus Pakistan i kamapim wanpela tupela pilai.

"I gat planti manmeri long Pakistan husat i tok mi no kepten tasol mi wari long dispela," Inzamam-ul-Haq i tok.

Planti Pakistan sapota i wari olsem top pilaia bilong ol Akhtar i no stap. Sapos em i stap i gat bilip Pakistan inap long mekim sampela gutpela ron. Tasol asua long em i gat hevi long bodi bilong em i mekim em i no pilai.

Tasol maski Akhtar i pilai Australia i gat sampela gutpela boula olsem Glen McGrath, Bret Lee, Michael Kasprovwicz na Shane Watson long stopim Pakistan.

"Dispela em i no gutpela tumas long taim yu pilai long ples bilong yu yet," Ponting i tok long pilai bilong Clark.

Andrew Molen i stori long ol samting i kamap long Morata ov sisen ragbi lig Stet ov Orijin pilai.

Stail bilong Morata long Stet ov Orijin

WANPELA liklik wara i brukim tupela stes - Morata wan long dispela sait na Morata tu long hap sait. Tasol las tripela wik bilong Stet ov Orijin i tokaut planti long dispela liklik paret.

Dispela salens i putim stret tingting i go insait long het bilong ol manmeri olsem tru i gat dispela tupela sait.

Long taim dispela gutpela luksave i kamap long wankain taim tu dispela pilai i bungim tupela sait wantaim moa klostu.

Pastaim ol manmeri long dispela tupela sait i save lukim ol yet olsem ol i bilong Morata tasol. Ol i no tingting tumas long narapela narapela. Tasol nau ol i lukim olsem i gat sampela mak i narakain long ol yet na olsem i gutpela tru ol i ken stap wantaim maski i gat dispela ol kankain mak ol i gat long en.

Ol kain mak olsem wanpela i bilong Kandep na narapela i bilong Kainantu o narapela i bilong Sepik na narapela i bilong Tolai o wanpela i bilong Hailans na narapela i bilong Papua.

long en long ov sisen pilai bilong mipela.

"Bipo i save gat ol spesel pilai long krismas we mipela i save salensim ol tim bilong narapela hap long siti olsem Gerehu na Hohola tasol nau mipela i laik traime strong bilong mipela yet," Vais Presiden bilong lig na Gem Kodineta, John Mauwi i tok.

Em i tok lig i gat tingting long makim wanpela gutpela tim long dispela Stet ov Orijin pilai na bungim inap mani tu long helpim ol long ronim lig na tu long salim dispela tim bilong ol i go long lpatas kap, narapela bikpela ov-sisen pilai we i save kamap long Hailans na Lae.

Morata Stet ov Orijin i save wok olsem, tim bilong Morata wan em Maroons na Morata tu em Blues na ol pilaia bilong dispela tupela tim i kam long ol sinia tim o A gret pilai bilong dispela ov sisen pilai bilong ol.

"Husat i stap long hapsait long wara bai pilai long tim bilong em i makim dispela hap.

"Olsem sapos em i save stap long Morata wan tasol em i pilai long wan-



• Morata Blues kepten Kevin Kepas i painim taim nogut wantaim difens bilong Morata Maroons.

soim planti gutpela na bikpela sain pinis long lukluk na ron bilong em long bihain taim.

Yumi olgeta i harim olsem bikpela hevi i bin painim ol lain long Esia taim sunami o solwara i kirap na kilim ol pipol na bagarapim ples.

Bihain long dispela planti manmeri long ol narapela kantri i helpim long putim han na givim mani na ol samting i go long helpim dispela ol lain husat i kisim bagarap long stretim ples na laip bilong ol ken. Papua Niugini tu i helpim na namel long ol grup na ogenaisesen na ol komyuniti husat i helpim em Morata lig.

"Mipela i laik soim olsem mipela tu i ken kisim bagarap sapos sampela samting i baragapim mipela na olsem mipela i laik long helpim," Presiden Billie Yaki i tok taim em i givim mani i go long Embeseda bilong Indonesia.

Lig i bin bungim mani inap K2010 wantaim 510 rupiah we em i mani bilong Indonesia yet, long namba tri gem bilong Morata Stet ov Orijin we Memba bilong Nesanel Kapitel Distrik na Siaman bilong Sunami Nesanel Disasta na Imejensi Sevis, Sir

William Skate, i bin i stap na lukim. K1800 i kam long mani ol i kisim long get, K110 i kam long raun kempen bilong ol yet na pastor Joseph bilong Morata i putim K100 antap.


"Tenkyu tru long yupela ol pipel bilong Morata.

Dispela mani yupela i givim em i no mani nating, yupela i givim lewa na tingting bilong yupela tu," Sir William i tok long pasin ol i wokim.

Na long Stet ov Orijin tupela tim i tok; "I nogat wanpela tim i lus insait long dispela gem, tupela tim wantaim i win bilong wanem as ting bilong yupela long pilai i no long win o lus tasol long helpim ol lain i kisim bagarap na long dispela yupela i sempion bilong Morata na Pot Mosbi."

Petron o waspapa bilong lig, Rex Paki husat i sponsaim Morata Stet ov Orijin salens wantaim K1000 na trofi i tok taim em i amamas long ol pilai em ol i kamapim.

"Mi tok amamas na tenkyu i go long yupela long pasin yupela i soim na mi bai sapatim Morata Orijin na ol narapela pilai bilong lig," Paki i tok.



• Difens bilong Wes Kange i kurakum long Warriors long Morata ov sisen ragbi lig pilai long Kone Tigers pilai graun.

Dispela Stet ov Orijin i bringim gutpela luksave na kamapim tingting we narapela i tingting moa long narapela. I olsem pilai i kamapim gutpela luksave na wanbel pasin.

Pastaim long dispela Stet ov Orijin i gat tu Morata ov-sisen ragbi lig kompetisen we Morata lig yet i wok long ronim.

Pastaim long dispela Stet ov Orijin i gat olsem 14 tim insait long tripela divison. dispela ol divison em A, B na C gret.

Morata lig i stap olsem lig 23 yia olgeta.

Dispela namba bilong em long stap i mekim ol opisel i kamap wantaim tingting long ronim Stet ov Orijin pilai.

Ol i opisel i laik lukim ol top pilaia bilong wanwan tim bai pilai insait long tupela tim na kamapim Morata Lig Stet ov Orijin.

"Mipela i kamapim dispela pilai long senisim we em mipela i save pilai

pela tim bilong Morata tu, long taim bilong Stet ov Orijin em bai i go bek na pilai long sait bilong Morata wan we em i kam long em," Mauwi i tok.

Morata lig i kamapim sampela ol biknem pilaia long Pot Mosbi taun kompetisen we sampela i pilai pinis makim kantri olsem Geno Kima na Nixon Nagle na kain samting olsem Morata Stet ov Orijin bai i nap long kamapim sampela moa gutpela pilaia.

Dispela kompetisen tu i helpim long daunim ol bikhet pasin long Morata we i bagarapim nem bilong ples.

"Taim lig i stat inap nau mi lukim olsem bikhet pasin insait long Morata i wok long go daun na Morata Stet ov Orijin mi ting bai pulim planti moa manmeri i kam na dispela bai i helpim long daunim nem nogut bilong ples," Mauwi i tok.

Dispela sisen em i namba wan taim bilong Morata Stet ov Orijin tasol em i



• Morata Blues hap Stanley Douglas i save em i hat long brukim kain difens. Maroons win 13-6

Saina i laik helpim PNG long spots

Maisan Pahun i raitim

OL SPOTS bodi long kantri i mas wok strong wantaim long kamapim gutpela pilai namel long ol spots manmeri insait long kantri long wanem Saina i tok pinis long helpim kantri redi long Beijing 2008 Olympic.

Vais Minista bilong spot na Vais Siaman bilong Saina Olimpik Komiti (COC) Yu Zaiqing wantaim 4-pela opisel bilong Beijing 2008 Olimpik komiti bin tokaut long raun bilong ol long Pot Mosbi.

Zaiqing wantaim Dairekta jenerol na deputi jenerol bilong State Spot Jenerol Edministresen ov Saina i bin toktok wantaim Minista bilong Spots Dame Carol Kidu na ol opisel long PNG Spot Komisen na Federesen.


Insait long toktok bilong ol Zaiqing em i tok bai gavman na COC i helpim PNG long sait bilong Saina givim teknikol trening na asisten i kam long ol PNG spots, kamapim kosing progrem na helpim long ol spotting progrem insait long kantri.

Dispela ol tripela tingting Zaiqing i tok bai kamap long bihain taim sapos ol PNG spots opisel na Minista Dame Kidu i kamapim bilong ol na salim i go long Embasi bilong Saina long Papua Niugini Li Zhengjun.

Long 2008 Beijing Olympic Gems Saina gavman i redi long helpim PNG gavman long spot. Long dispela sampela mani bai kam long Olimpik Komiti (IOC).

Nau yet Beijing siti i redim wok long kisim na lukautim moa long 25,000 etlits na ofisal. Dispela gems bai lukim tu 20-30 tausen nius ripota go ripot long ol pilai we ol pilai bilong wara bai kamap long ol siti arere long nabis bilong China.

John Kambuou bilong PNG Spot Komisen (PNGSC) i amamas long ol tingting bilong Zaiqing na i tok kantri bai salim ol etlits long boksing, swimming, taikwando, wetlifting, judo na suting i go long Beijing Olimpiks.



• PNG pilai i rebouns long putim basket egensim tim bilong Guam long 2003 Saut Pasifik Gems. Gutpela indo stedum bai ken holim ol bikipela pilai. FAIL POTO

"PNGSC bai kamapim wanpela dokumen na lukim ambasado Zhenjun long kamapim wanpela Memorandum ov Andastending (MOU) we bai i go long Chinese deliget," Kambuou i tok.

Ol samting em PNGSC i tok long kisim helpim em,

- wanpela spots sains senta
- indo stadium na jimnasum long NSI (

- Goroka)
- senisim ol trek long Sir John Guise Stedum
- kamapim spot skolasip na
- senis long spots progrem namel long PNG na Saina. Dame Carol Kidu wantaim ofis bilong Community Development na Sports i bin kamapim dispela bikipela miting namel long tupela kantri..

PNG Spot Federesen statim fanresing

LONG taim Trukai Industri i lonsim 2005 Trukai Fan Ran 'T' set em i tokaut long kisim PNG biknem wetlifita Dika Toua olsem wokmeri bilong em.

Dispela i min olsem maski Toua i stap wok wantaim Industri o i stap tren long narapela kantri olsem nau em i stap tren long Fiji o em i kamap long sampela hap kantri long pilai em bai kisim yet foitnait pe bilong em.

Trukai Industri maketing menesa Bret Schofield i tokaut long dispela stap bilong Toua long taim bilong lonsing long Tunde.

Long amamas long Toua Seketeri Jenerol bilong PNGSF Sir John Dawanincura i tok em i laikim ol spotmanmeri mas traime bihainim lekmak bilong Toua.

"Em i save kaikai, silip na trenim wetlifiting tasol," Sir John i tok. "Dispela em kain komitmen em Toua i gat long en.

"Long aste (Mande) taim em i pundaun long ples balus em i go stret long jim na tren. Toua i save tren tripela taim long wanpela de.

Dispela yangpela Hanuabada meri i winim gol medol long 53 kilo gren divison long Olimpik Yut tonamen long Sydney, Australia las wik.

Schofield i tok Industri i amamas long pas wantaim Toua.

Na long resing mani bilong Federesen em i tok las yia Industri i bin kamapim K245,691 we em i bikipela moni em i kamapim long ol dispela taim em i mekim wok long kamapim mani bilong Federesen. Long dispela yia Industri i lukluk long kamapim K300,000.

Trukai i mekim sponsasip aninit long Platinum grup (ol sponsa i givim mani mak olsem K250,000 i go antap).

Trukai husat i wanpela opisel sponsa tu i bin lonsim 2005 Trukai fan ran we bai i kamap long Sande Jun kilok bik mon-



• Daniel Duncan bilong Trukai Industri i givim sek plek kad long PNGSF presiden Sir Henry ToRobert bilong 2004 fanresing. Lukluk em fanresing siamam Syd Yates. Foto: JOE IVAHARIA

ing. Ol dispela mani i bilong helpim Federesen long salim PNG Tim i go long mini-Saut Pasifik Gem long Palau long dispela yia.

PNG i mas kamapim K1.9 milien long salim tim. Long fan ran dispela yia bai i wankain olsem ol arapela yia we bai mipela i mekim oksen bilong ol t-set na ol kampani husat i baime ol t-set i ken prinim nem bilong ol long sioi na soim nem bilong kampani bilong ol.

Fan Ran t-set oksen bai i kamap long Fonde Epril 4 long Royol Papua Yot Klab we bai i stat long 6 kilok long nait.

Long dispela t-set oksen bai planti ol skul long NCD bai i kisim bikipela helpim wankain long ol spot etlits na ol sariti grup tu. Schofield i tok tu olsem wankain tu bai mipela i kisim wanpela biknem spot man-

meri olsem ges spika long toktok long taim bilong dispela T-sioi oksen. "Mi laik tok tenkyu long ol bisnis haus na pablik long sapot bilong ol long 2004 Trukai Fan Ran na mipela i lukluk gen long sapot bilong yupela long dispela yia", Schofield i tok. Long Mande dispela wik NEC Business Solutions kampani i bin mekim K20,000 sponsasip i go long Federesen.

Dispela sponsasip i karamapim 13-pela niupela telepon set we kampani i givim i go long Spot Federesen long senisim ol olpela telepon lain long opis bilong em.

Rijinol menesa bilong kampani Graeme O'Flaherty i tok kampani bilong i amamas long givim kain sapot i go long Federesen long wanem em i mekim gutpela wok i stap long developim ol spot na tu long helpim na potim ol spot.

Manalos kaikaim wantok Malangan

Andrew Molen i raitim

GUTPELA wei bilong paitim bal na ron i lukim Manalos i ronowe long Malagan wantaim 7-4 skoa insait long A-Gred sofbol pilai bilong ol man long Pot Mosbi.

Tripela hom ran i kam long David Maira long fes na namba tri ining na Daniel Piarkolos long seken ining we i lukim ol i givim Malagan 6-0 long fes tripela ining.

Ol narapela lain i kisim ol rans bilong Manalos tu insait long dispela ol ining em Ora Gimi long fes na Paul Bogen na Robert Livingood long namba tri ining.

Plantu beta bilong Malagan i kisim taim tu long han bilong pita bilong Manalos, Isimel Maranapal husat i kisim nainpela straikaut.

Ol Malagan i no was na holim bal gut long fil na dispela i lukim Manalos i ron isi i go long ol bes.

Namba foa na faiv ining i lukim Malagan i kam bek strong na nogat wanpela tim i skorim wanpela poin long dispela tupela ining.

Malagan i kisim strong bilong ol bek na Willie Petali i go na paitim wanpela hom ran bilong ol manki bilong em long namba siks ining.

Long laspela ining bilong gem John Moni i bihainim Petali na paitim wanpela hom ran long kisim em na Xavier Knox husat i stap redi long ted bes long ran i go long hom bes.

Laspela beta bilong Malagan, Chris Timi i skorim laspela ran bilong ol we i lukim ol i winim las tupela ining, 4-0 tasol dispela i no bin inap long abrusim skoa bilong Manalos husat i go pas pinis.

Long ol narapela A Gred gem, Brown Eagles i kaikaim Dolphins 11-6, Elcom paitim Bears 13-3 na Gazelle i waraim Kopex 13-0.

Hohola Spots

BIKPELA spot pilai nau i wok long kamap long Hohola Sabeb 2 long Nesenel Kapitol Distrik.

Hohola 2 Spot Asosiesen i bin stat namel long las yia we ol komyuniti i bin kamapim tingting long bungim ol yangpela manmeri wantaim ol papamama long pilai spot. Wantaim kain tingting ol i statim dispela asosiesen we ol i bin makim ol eksekutiv long lukautim na ronim dispela asosiesen. Presiden bilong asosiesen Blaise Golu na tresera Joe Lahari wantaim ekting seketeri Tera Haro i tok asosiesen i wok long pilaim tupela spot- basketbol bilong ol meri na tas ragbi bilong ol man.

I gat 12-pela tim long basketbol na 13-pela long tas ragbi we ol tim i kam long ol wanwan rot insait long Hohola namba 2 eria.

Tresera bilong asosiesen Joe Lahari i bin tokim Wantok Spot olsem olgeta pilai bilong ol i save kamap long Hohola spots oval. Long stat bilong kompetisen mipela i no bin bungim wanpela hevi i kam nau we mipela stap long raun namba 9 na i gat tupela moa ran i stap bipo long ol fainols i kamap. Bihain long raun 9 las wiken long basketbol pilai bilong ol meri Figgy Dumpers wantaim ol pilai bilong ol olsem kepten Itari Lahari, Lydia "abida" Mitaharo, Taisi Taule, Mary Pasi, Kela Steven wantaim tupela susa Rose na Babra i bin soim ol arapela tim long lukaut long ol taim ol i nekim bipo kompetisen lida Paradise 20-10 insait long mein gem.

Kepten Lahari i bin go pas long skorim 12pela poin wantaim sapot i kam long wan pilai bilong em Rose we long hap taim Figgy i bin go pas long skoa 9-8. Paradise i kam bek strong long seken hap we skipa Helen Eri sinia i traime long kirapim strong bilong ol pilai bilong em olsem Wendy Memafu, Rosa Laumaea, Laho Horope na Veronica Mark tasol i no inap. Figgy i bin kamapim gutpela difens long pasim ol stret na winim gem 20-10 long ful taim. Long ol arapela pilai Flames i winim Loukas 17-13, Osi Steelers i bin pretim ol nupela kompetisen lida Erima bipo ol i bin lus 22-24, Darks i waraim Dogs 26-4, Cedar winim Zerupi 27-20 na Karma nekim Teak 20-15. Bihain long dispela raun 9 poin lada i sanap olsem; Erima 16, Cedar 14, Paradise 14, Darks 12, Flames 11, Zerupi 9, Loukas 8, Figgy 8, Karma 6, Osi Steelers 5, Dogs 3 na Teak nogat poin yet.



WANTOK Spots



PM holim Manam na sunami golf salens

Andrew Molen i raitim

MOA long 30 kampani i rejistarim tim bilong ol pinis long pilai insait long dispela Praim Minista Golf Salens long kamapim mani na salim i go long ol lain pipel bilong mipela long Manam husat i kisim bagarap long maunten na ol lain long Esia husat kisim bagarap long sunami.

Dispela pilai bai kamap long tumoro long Pot Mosbi Golf Klub.

Sampela ol kampani husat i givim nem pinis em Deloitte, IPBC, Mirupasi Lawyers, POSF, Rio Tinto, EMTV, Global Construction, Pot Mosbi Country Klub, PNG Pawa, Sefti PNG na Steamships Hardware.

Menesa bilong Pot Mosbi Golf Klub Roger Wilson i tok olgeta samting i redi na ol i wetim tasol long pilai we ol kampani i mas rejisterim ol pilaia bilong ol wantaim K1000 bipo long ol i pilai.

Independen Pablik Bisnis Koporesen (IPBC) long las wik i givim K30,000 we IPBC siaman i givim mani long tonamen ogenaising komiti Nick Kuman long POM Golf Klub.

Long taim Sief Eksekutiv Opisa bilong IPBC, Masket langalio, i givim mani em i tok IPBC i ibikpela bodi bilong ol bisnis han bilong gavman olsem Telikom, Elcom, Air Niugini tasol dispela wanwan bilong ol tu i givim helpim i go long ol pipel bilong Manam na Esia long ol yet.

Em i tok Telikom bai i givim K150,000 we K100,000 bai i go long Manam na K50,000 bai go long Esia sunami apil.

Dispela pilai i lukluk long traim na bungim mani mak olsem K72 000 tasol dispela bai i stap long amas tim i kamap long pilai na amamas ol i putim.

"Mipela save olsem mipela bai i no inap long bungim kain mani olsem ol lain i



Seif...Tony William bilong Dolphins i kirapim das long kam seif long hom bes. Redi long autim em George Taule bilong Brown Eagles. Eagles win 11-4. Lukim stori long pes 31. Foto: JOE IVAHARIA

bungim long Australia we inap olsem \$14 500 000 (AUS) tasol amas mipela i ken bungim em inap bekim wanem helpim

mipela i save kisim bipo taim mipela i kisim bagarap." Kuman i tok. Tasol i no olgeta mani long dispela pilai

bai i go long wanpela hap. Hap mani bai i go long Esia na hap bai i go long ol lain bilong Manam.

Contex
DIGITAL DVD PLAYER
Model: DV-3858

- Totally compatible with DVD/SMCD/VCD/DVCD/CD/MP3
- High Quality Picture & Sound
- DTS Digital Output
- Multi Angle Viewing
- Hi Definition System
- Karaoke Function

K 349⁰⁰

VCD/MP3/
DVCD/CD
PLAYER
Model: VCD-2009

- Compatible with MP3
- Digital Karaoke Function
- LCD Display
- Super Error Correction
- PAL/NTSC
- Picture Zoom Function

K 199⁰⁰

VCD
WALKMAN
Model: V-802

- Compatible with VCD/CD/CD-R/MP3
- Key Function
- LCD Display
- Multi Play Mode
- PAL/NTSC
- Infra red Remote Control

K 239⁰⁰

Brian Bell
Shop with a friend

WHOLESALE ENQUIRES WELCOME

Buy Wisely !! These quality products are backed by Brian Bell's warranty, Spare Parts and Service.

PLAZA 305 5411 HOME CENTRE CITY, GORDONS 325 5485 LAE HOMECENTRE CITY 472 3200 GOROKA 732 1622 KOKOPO 932 9027 MT HAGEN 542 1999 MADANG 852 1899